

বৃষ্টি আর নক্ষত্র



চিরা য় ত ঞ্ হ মা লা



.....আ লো কি ত মা নু ষ চা ই.....

বৃষ্টি আর নক্ষত্র

অনুবাদ

ননী ভৌমিক



বিশ্বসাহিত্য কেন্দ্র

বিশ্বসাহিত্য কেন্দ্র প্রকাশনা ৪০১

গ্রন্থমালা সম্পাদক
আবদুল্লাহ আবু সায়ীদ

প্রথম বিশ্বসাহিত্য কেন্দ্র সংস্করণ
অগ্রহায়ণ ১৪২০ ডিসেম্বর ২০১৩

দ্বিতীয় সংস্করণ দ্বিতীয় মুদ্রণ
অগ্রহায়ণ ১৪২২ ডিসেম্বর ২০১৫



প্রকাশক

মো. আলাউদ্দিন সরকার
বিশ্বসাহিত্য কেন্দ্র

১৭ ময়মনসিংহ রোড, বাংলামটর, ঢাকা ১০০০
ফোন ৯৬৬০৮১২ ৫৮৬১২৩৭৪, মোবা. ০১৮৩৯৯০৬৭৫৪

মুদ্রণ

ওমাসিস

২৭৮/৩ এলিফ্যান্ট রোড, ঢাকা-১২০৫

প্রচ্ছদ

খুব এস

অলংকরণ

ওল্যা পুস্কারিওভা

মূল্য

একশত বিশ টাকা মাত্র

ISBN-984-18-0400-X

BRISHTI AR NAKKHOTTRO

A collection of Russian Stories for children

Translated from Russian by Nani Bhounmik

Published by Bishwo Shahitto Kendro

17 Mymensing Road, Banglamotor, Dhaka 1000 Bangladesh

Email : bskprokashona@gmail.com www.bsksale.com

Price Tk. 120.00 only

সূচি

মিশকার রান্নাবান্না	৭
নিকোলাই নোসভ	
যখন যেটা	১৫
ভিক্টর গোলিয়ভ্কিন	
সাগরের প্রজাপতি	২০
খালিদা হাসিলভা	
‘শুনছি, ঘাস বাড়ছে...’	২৩
সেমিওন গুরতাকভ	
তুলকা	২৮
আলেক্সান্দর বাত্রভ	
মাষেতের টুপি	৩২
আল্লেই দুগিনেৎস	
সার্কাসের মেয়ে	৪৪
ভিক্টর দ্রাগুনস্কি	
ছেলেটার জন্য রঙ	৫২
ভ্লাদিমির জেলেজনিকভ	
বৃষ্টি আর নক্ষত্র	৫৭
ভ্লাদিমির ক্রাপিভিন	

মিশকার রান্নাবান্না

নিকোলাই নোসভ



সেবার মায়ের সঙ্গে আমরা গাঁয়ের বাগান-বাড়িতে আছি। মিশকা এল দিনকতক বেড়াতে। কী যে আনন্দ হল বলবার নয়। ও না থাকায় ভারি একলা লাগছিল। মা-ও খুশি হল খুব।

বলল, ‘যাক, এসেছিস বাঁচা গেল। দুজনে মিলে তোদের আনন্দে কাটবে। তবে শোন, কাল আমায় শহরে যেতে হবে, দিনকতক আটকে যেতেও পারি। আমি না থাকলে অসুবিধা হবে না তো?’

আমি বললাম, ‘কিছু অসুবিধা হবে না, আমরা তো বাচ্চা নই!’

‘তোদের কিছু নিজেই রান্না করে নিতে হবে, পারবি?’

‘পারব বইকি’, বলল মিশকা, ‘না পারার কী কাছে।’

‘বেশ, তাহলে সুরুয়া আর পরিজ রাঁধিস। পরিজ রাঁধা সবচেয়ে সোজা।’

‘তা পরিজই রাঁধব, কী আর হয়েছে!’ বলল মিশকা।

আমি বললাম, ‘দেখিস মিশকা, রাঁধতে যদি না পারিস? আগে তো কখনো রাঁধিসনি।’

‘ভাবনা নেই, মা কেমন করে রাঁধে তা আমার দেখা আছে। পেট ভরেই খাবি, উপোস দিতে হবে না। এমন পরিজ রাঁধব যে হাত চাটবি।’

সকালে আমাদের দুদিনের মতো রুটি আর চায়ের সঙ্গে খাবার জন্যে কিছু জ্যাম রেখে মা কোথায় কী আছে দেখিয়ে দিল, বোঝাল কী করে সুরুয়া আর পরিজ রাঁধতে হয়, কতখানি খুদ দিতে হবে, এইসব। আমি সব শুনলাম, তবে মনে রইল না কিছু। ভাবলাম, ‘কী দরকার মনে রেখে, মিশক’ তো সব জানেই।’

তারপর মা চলে গেল, আমি আর মিশকা ঠিক করলাম নদীতে গিয়ে মাছ ধরব। ছিপটি ঠিক করলাম, কেঁচো খুঁড়লাম

আমি বললাম, ‘আরে দাঁড়া, দাঁড়া! নদীতে গেলে রান্না করবে কে?’

‘রান্না করে কী হবে?’ বলল মিশকা, ‘যত ঝামেলা! গোটা পাউরুটিটা খেয়ে কাটিয়ে দেব। আর রাতের খাবারের বেলায় পরিজ রাঁধা যাবে। পরিজ তো বিনা রুটিতেও খাওয়া যায়।’

রুটি কেটে জ্যাম মাথিয়ে চললাম নদীর ধারে। প্রথমটা একটু জলে ঝাঁপাঝাঁপি করে চান করে নিলাম, তারপর গুলাম বালির উপরে। রোদ পোয়াতে পোয়াতে চিবুতে লাগলাম জ্যাম-মাখা রুটি। তারপর লাগলাম মাছ ধরতে। তবে মাছ ঠোকরাচ্ছিল কম। সারাদিনে ধরা গেল কেবল গোটা দশেক চুনোপুঁটি। ‘পুরো দিনটা নদীর ধারে কাটালাম। বাড়ি ফিরলাম সন্ধ্যায়, পেট চনচন করছে খিদেয়।’

বললাম, ‘মিশকা, তুই তো ওস্তাদ, কী রাঁধবি বল তো? তবে ঝটপট, খিদে পেয়েছে খুব।’

‘পরিজ রাঁধা যাক,’ বলল মিশকা, ‘পরিজ রাঁধেই সবচেয়ে সোজা।’

‘তা বেশ, পরিজই হোক।’

উনুন জ্বালানো গেল, প্যানে গমের খুদ ঢালল মিশকা। আমি বললাম :

‘একটু বেশি করে দে, খিদে পেয়েছে খুব।’

মিশকা প্যান ভর্তি করে সুজি চাপাল, তারপর জল ঢালল কানায় কানায়। বললাম :

‘জল একটু বেশি হল-না? ভয়ানক পাতলা হয়ে যাবে যে।’

‘আরে না, মা সবসময় তাই করে। তুই শুধু উনুনটা দেখিস, আমি রন্ধে যাব, ভাবনা নেই।’

আমি উনুন দেখি, কাঠ জোগাই আর মিশকা পরিজ রাঁধে, মানে ঠিক রাঁধে না, প্যানটার দিকে তাকিয়ে বসে থাকে, নিজে থেকেই রান্না হয়ে যাচ্ছে পরিজ।

একটু পরেই আঁধার হয়ে এল, আমরা আলো জ্বালাম। হঠাৎ দেখি কী, প্যানের ঢাকনাটা উঁচু হয়ে উঠেছে। আর তার ফাঁক দিয়ে সুজি বেরিয়ে আসছে।

বললাম, ‘মিশকা, কী ব্যাপার বল তো, সুজি পড়ে যাচ্ছে কেন?’

‘কোথায় পড়ে যাচ্ছে?’

‘কোথায় আবার, চুলোয়! বেরিয়ে আসছে প্যান থেকে।’

মিশকা একটা চামচ দিয়ে বেরিয়ে আসা সুজির পিণ্ড ফের ঢোকাতে লাগল প্যানে। কিন্তু যতই ঠাসে, দাবানো যায় না, প্যানের মধ্যে যেন ফেঁপে উঠছে, বেরিয়ে আসছে কেবলি।

মিশকা বলল, ‘ঠিক বুঝছি না তো এমন বেরিয়ে আসতে শুরু করেছে কেন। হয়তো তৈরি হয়ে গেছে। কী বলিস?’

আমি চামচে নিয়ে চেখে দেখলাম, সুজি একটুও নরম হয়নি। বললাম, ‘মিশকা, জলটা কোথায় উধাও হল? ভেতরটা একেবারে শুকনো।’

বলল, ‘কে জানে, জল ঢেলেছিলাম তো অনেক। প্যান ফুটো নেই তো?’

পরীক্ষা করে দেখা গেল প্যানটা। কোনো ফুটোই নেই।

‘তাহলে বোধহয় বাষ্প হয়ে উড়ে গেছে,’ বলল মিশকা, ‘আরো ঢালতে হবে।’

প্যান থেকে কিছুটা সুজি তুলে ফেলে জল ঢালল মিশকা। ফের সেদ্ধ হতে থাকল! সেদ্ধ হচ্ছে, হচ্ছে, হচ্ছে, হঠাৎ আবার ভেতর থেকে ঠেলে বেরিয়ে আসতে লাগল সুজি।

‘আ ম’লো যা!’ বলল মিশকা, ‘জ্বালালে দেখছি।’

ফের চামচ নিয়ে আরও কিছু সুজি বার করে নিল মিশকা, জল ঢালল পুরো এক মগ। বলল, ‘দেখলি তো, তুই ভাবছিলি পাতলা হয়ে যাবে। কত জল ঢালতে হচ্ছে দেখছিস?’

সেদ্ধ হতে লাগল। কিন্তু আচ্ছা ফ্যাসাদ তো! আবার ঠেলে উঠছে সুজি।

আমি বললাম :

‘তুই বোধহয় সুজি ঢেলেছিস বেশি। ফেঁপে উঠছে, প্যানে আঁটছে না।’

‘তাই মনে হচ্ছে,’ বলল মিশকা, ‘তোরই দোষ! বলে কিনা, বেশি করে দে, খিদে পেয়েছে!’

‘বারে, আমি কোথেকে জানব কত দিতে হয়? তুই তো নিজেই বললি যে রাঁধতে জানিস।’

‘রাঁধবই তো! শুধু জ্বালাস নে।’

‘বেশ, জ্বালাব না।’

দূরে চলে গেলাম আমি, আর রাঁধতে লাগল মিশকা, মানে ঠিক রাঁধে না, প্যান থেকে সুজির পিণ্ড বার করে করে এক-একটা প্লেটে রাখে আর জল ঢালে। রেস্টোরার মতো সারা টেবিল ভরে গেল প্লেটে।

আর পারলাম না, বললাম :

‘কী শুরু করেছিস তুই! এভাবে রান্না চললে তো রাত পুইয়ে ভোর হয়ে যাবে।’

‘আর তুই কী ভেবেছিস? ভালো ভালো রেস্টোরাঁয় পরের দিনের জন্য খাবার রাঁধতে শুরু করে সন্ধে থেকে, তা জানিস?’

বললাম, ‘বড় বললেন, রেস্টোরাঁয়! ওদের তো আর তাড়া নেই, কতরকম খাবার।’

‘আমাদেরই-বা তাড়া কিসের?’

‘আমাদের যে খেতে হবে, ঘুমোতে হবে। এদিকে রাত বারোটা বাজতে চলল।’

বলল, ‘ঘুমোবার ঢের সময় পাবি।’

এবং ফের আরেক মগ জল! তখন টনক নড়ল আমার। বললাম, ‘তুই যে কেবলি ঠাণ্ডা জল ঢালছিস। সেদ্ধ হবে কী করে?’

‘তার মানে বিনা জলেই সেদ্ধ হবে বলতে চাস?’

বললাম, ‘অর্ধেকটা সুজি বার করে নিয়ে বেশি করে জল ঢাল। তবে সেদ্ধ হবে।’

আমি ওর কাছ থেকে প্যানটা নিয়ে অর্ধেকটা খালি করে দিলাম। বললাম, ‘এইবার জল ঢাল একেবারে কানায় কানায়।’

মিশকা মগটা নিয়ে বালতিতে ভেঁবেল। বলল, ‘জল আর নেই। সব শেষ।’

আমি বললাম, ‘কী করি তাহলে? যা অন্ধকার রাত, জল আনতে যাব কী করে! কুয়োই চোখে পড়বে না।’

‘বাজে বকিস না। এক্ষুনি নিয়ে আসছি।’

দেশলাই নিয়ে বালতিতে দড়ি বেঁধে ও চলে গেল কুয়োর দিকে। ফিরল এক মিনিট পরেই।

জিগ্যেস করলাম, ‘কিন্তু জল কোথায়?’

‘জল... ওই ওখানে, কুয়োতে।’

‘কুয়োতে তা সবাই জানে। জলভরা বালতিটা কোথায়?’

‘বালতিটাও ওই কুয়োতে।’

‘কুয়োতে মানে?’

‘মানে কুয়োতে।’

‘পড়ে গেল?’

‘ফসকে গেল।’

বললাম, ‘ইস, তোকে নিয়ে যে কী করি! না খাইয়ে মারবি আমায়। এখন জল আনি কী করে?’

‘কেটলি দিয়ে চেষ্টা করব।’

আমি কেটলিটা নিয়ে বললাম :

‘দড়িটা দে ।’

‘দড়ি নেই ।’

‘নেই মানে, গেল কোথায়?’

‘ওইখানে ।’

‘ওইখানে মানে?’

‘মানে... ওই কুয়োতে ।’

‘তার মানে দড়িসুদ্ধ বালতিটা পড়ে গেছে?’

‘মানে... হ্যাঁ ।’

অন্য একটা দড়ি খুঁজতে শুরু করলাম । কোথাও নেই ।

মিশকা বলল, ‘ভাবনা নেই, এখনি গিয়ে পাশের বাড়ি থেকে চেয়ে আনব ।’

বললাম, ‘পাগল হয়েছিস! ঘড়িটা একবার দেখ, সবাই ঘুমুচ্ছে ।’

এই সময় হঠাৎ যেন ইচ্ছে করেই আমাদের দুজনের ভারি তেষ্ঠা পেয়ে গেল । মনে হল এক মগ জলের জন্যে একশো রুবলও দিতে পারি । মিশকা বলল :

‘সবসময়ই তাই হয় : জল না থাকলেই তেষ্ঠা পায় বেশি । সেইজন্যেই মরুভূমিতে অত তেষ্ঠা পায়, জল নেই তো ।’

বললাম, ‘পণ্ডিতি রেখে দড়ি আন ।’

‘আনব কোথেকে । সব খুঁজে দেখেছি । তার চেয়ে আয় ছিপের সুতো দিয়ে বাঁধি ।’

‘তার সহিবে তো?’

‘সহিবে ।’

‘যদি না পারে?’

‘যদি না পারে, তাহলে... ছিঁড়ে যাবে ।’

‘বড় বললেন ।’

ছিপের সুতো খুলে কেটলিতে বেঁধে চললাম জল আনতে । কুয়োতে কেটলিটা নামিয়ে জল ভরলাম আমি । তারের মতো টান টান হয়ে উঠল সুতো, এই বুঝি ছেঁড়ে ।

বললাম, ‘বুঝতে পারছি, ছিঁড়বে ।’

‘খুব আস্তে আস্তে যদি তুলতে পারিস, তাহলে ছিঁড়বে না,’ বুদ্ধি দিল মিশকা ।

আস্তে আস্তেই তুলতে লাগলাম । কিন্তু জলের উপর উঠতে না-উঠতেই, ঝপাং—
উধাও হল কেটলি ।

‘ছিঁড়ে গেল?’ জিগ্যেস করল মিশকা ।

‘ছিঁড়বেই তো । এবার জল তুলি কিসে?’

মিশকা বলল, ‘সামোভার দিয়ে ।’

‘তার চেয়ে বরং সামোভারটাই কুয়োয় ফেলে দে, হাস্‌মা বাঁচবে। দড়ি, দড়িই যে নেই।’

‘তাহলে প্যান দিয়ে।’

বললাম, ‘কী পেয়েছিস, এটা বাসনের দোকান নাকি?’

‘তাহলে গেলাস দিয়ে।’

‘এক-এক গ্লাস করে জল তুলতে রাত পুইয়ে যাবে।’

‘তাহলে কী করা যায়। পরিজটা তো রান্না করতে হবে। আর তেষ্টাও পেয়েছে বিদঘুটে।’

বললাম, ‘দাঁড়া, বরং মগটায় তোলা যাক। যতই হোক গেলাসের চেয়ে তো বড়।’

বাড়ি ফিরে ছিপের সুতো দিয়ে মগটাকে এমনভাবে আমরা বাঁধলাম যাতে কাত না হতে পারে। গেলাম কুয়ের কাছে, এক এক মগ জল তুলে খেলাম। মিশকা বলল :

‘সবসময়ই এই হয়। যখন তেষ্টা পায় মনে হয় গোটা সমুদ্রই বুঝি খেয়ে ফেলব, আর খেতে শুরু করলে দেখাবি এক মগ খেলেই হয়ে যাচ্ছে। আসলে লোকে জন্ম থেকেই ভারি লোভী...’

‘লোকে কী ওসব কথা এখন রাখ। বরং সুজির প্যানটা এখানে নিয়ে আয়, এখানেই জল ঢেলে নিয়ে যাব, বারবার আসা-যাওয়া করতে হবে না।’

মিশকা প্যানটা এনে রেখেছিল কুয়ের পাড়ে। আমি লক্ষ করিনি। কনুইয়ে ধাক্কা লেগে প্রায় কুয়োয় পড়ে যাচ্ছিল আর কি। বললাম :

‘একেবারে হাঁদা! প্যানটা আমার কনুইয়ের নিচে গুঁজে দিয়েছিস কেন? হাতে ধরে রাখ। আর কুয়ের কাছ থেকে সরে যা, নয়ত তোর পরিজও যাবে কুয়ের তলে।’

মিশকা প্যানটা নিয়ে সরে গেল। জল তুলতে লাগলাম আমি।

বাড়ি ফেরা গেল। পরিজ একেবারে ঠাণ্ডা, উনুন নেভা। ফের আমরা উনুন জ্বলে পরিজ রাঁধতে বসলাম। শেষ পর্যন্ত ফুটল জিনিসটা, ঘন হয়ে উঠল, ফোঁস ফোঁস করতে লাগল।

‘আহ্!’ বলল মিশকা, ‘খাশা রান্না হয়েছে, চমৎকার!’

আমি একটা চামচ নিয়ে চেখে দেখলাম :

‘থুহ্ থুহ্! এই তোর পরিজ! তেতো, নুন নেই, পোড়া-পোড়া গন্ধ।’

মিশকাও চেখে দেখে থুতু ফেলল। বলল :

‘মরব তা-ও স্বীকার, কিন্তু এই পরিজ খেতে পারব না।’

‘মরতে চাইলে বরং এই পরিজটাই খেয়ে দেখতে পারিস।’

‘কী করি এখন?’

‘জানি না।’

মিশকা বলল, ‘হাদারাম, চুনোপুঁটিগুলো তো রয়েছে!’

বললাম, ‘থাক তোর চুনোপুঁটি, ওই দেখ, আকাশ ফরসা হয়ে আসছে।’

‘রান্না করব না, ভেজে নেব। চটপট হয়ে যাবে। চাপাতে না-চাপাতেই তৈরি।

‘চটপট হলে লাগা,’ বললাম আমি, ‘আর পরিজের মতো হলে দরকার নেই।’

‘দেখে নে তুই, এক মিনিট।’

মিশকা মাছগুলো আঁশ ছাড়িয়ে চাপাল কড়াইয়ে। গরম হয়ে উঠল কড়াই, মাছগুলো সব সেন্টে গেল কড়াইয়ের সঙ্গে। মিশকা একটা ছুরি দিয়ে চাঁছতে লাগল।

বললাম, ‘বড় বুদ্ধি! বিনা তেলে মাছ ভাজে কেউ?’

মিশকা তেলের শিশিটা নিয়ে তেল ঢালল। তারপর চটপট হবে বলে সবটাই ঢুকিয়ে দিল চুল্লির জ্বলন্ত কাঠগুলোর উপর। তেল শোঁ শোঁ করে গরম হতে হতে হঠাৎ আগুন ধরে উঠল। মিশকা কোনোরকমে বার করে আনল কড়াইটা, তেল তখন জ্বলছে। ভেবেছিলাম জল ঢালব, কিন্তু সারা বাড়িতে এক ফোঁটা জল নেই। ফলে শেষ বিন্দুটি পর্যন্ত পুড়তেই থাকল তেল। ঘরময় ধোঁয়া, মাছ বলতে পড়ে রইল শুধু কিছু অঙ্গার।

মিশকা বলল, ‘তাহলে এবার কী ভাজব বল তো?’

বললাম, ‘না, আর তোকে কিছু ভাজতে দিচ্ছি না। রান্নার জিনিসপত্র নষ্ট তো করবিই, ঘরে পর্যন্ত আগুন ধরিয়ে দিবি। খুব হয়েছে!’

‘কিন্তু উপায় কী? খেতে তো হবে!’

কাঁচা সুজি চিবিয়ে দেখলাম, অসহ্য। পেঁয়াজ খেয়ে দেখলাম, বডেডা ঝাঁজ। বিনা রুটিতে মাখন গেলার চেষ্টা করলাম, গলা দিয়ে নামে না। এক বয়াম জ্যাম পাওয়া গেল। তাই চেটেপুটে খেয়ে শুতে গেলাম। অনেক রাত হয়ে গিয়েছিল।

সকালে উঠলাম একপেট খিদে নিয়ে, মিশকা সোজা গেল সুজির টিনের কাছে, পরিজ রাঁধবে। দেখেই তো আমার একেবারে কাঁপুনি ধরে গেল। বললাম :

‘খবরদার! এখুনি চল বাড়িউলি নাতাশা মাসির কাছে, বলব পরিজ রেঁধে দিতে।’


গেলাম দুজনে নাতাশা মাসির কাছে, সব ঘটনাটা বললাম, কথা দিলাম আমরা দুজনে তাঁর সবজিক্ষেতের সমস্ত আগাছা তুলে দেব, শুধু দয়া করে তিনি আমাদের পরিজ রেঁধে দিন। মাসির মায়া হল আমাদের ওপর— দুধ খাওয়ালেন আমাদের, বাঁধাকপির পুর দেওয়া পিঠে দিলেন, তারপর ডাকলেন

প্রাতরাশে। আমরা এমনই খেতে লাগলাম যে নাতাশা মাসির ছেলে ভব্কা পর্যন্ত অবাক হয়ে গেল।

খাওয়া-দাওয়ার পর নাতাশা মাসির কাছ থেকে একটা দড়ি চেয়ে নিলাম আমরা, গেলাম কুয়ো থেকে বালতি আর কেটলি তুলতে। ভাগ্যিস মিশকা বুদ্ধি করে দড়ির সঙ্গে একটা ঘোড়ার খুরের নালও বেঁধে নিয়েছিল। তা নইলে দড়িটায় কিছু ফল হত না। নালটা কিন্তু আঙটার মতো বালতি, কেটলি দুটোকেই টেনে তুলল, কিছুই খোয়া গেল না। তারপর আমি, মিশকা আর ভব্কা সবাই মিলে আগাছা তুলতে লাগলাম।

মিশকা বলল :

‘আগাছা, এ আর কী! কিস্যু না। পরিজ রাঁধার চেয়ে ঢের সোজা।’



যখন যেটা ভিক্টর গোলিয়ভকিন



ডেকের নিচে

মাস্টারমশাই বোর্ডের দিকে ফিরতেই আমিও টুক করে ডেকের নিচে। যখন দেখবেন আমি নেই, তখন নিশ্চয়ই ভয়ঙ্কর অবাক হয়ে যাবেন।

সত্যি, কী ভাববেন তখন? সবাইকে জিগ্যেস করবেন কোথায় আমি— ওহ, কী হাসির ব্যাপারই-না হবে! কিন্তু আধঘণ্টা কেটে গেল, ডেকের নিচে সেই বসে আছি তো আছিই। কখন ওঁর চোখে পড়বে যে আমি নেই? এদিকে ডেকের নিচে বসে থাকাও সহজ নয়। দ্যাখো-না চেষ্টা করে। পিঠ টন টন করছে। কাসলাম একবার, কিন্তু কেউ নজরই দিল না। না, আর পারি না। সেরিওজা-টা আবার কেবলই পা দিয়ে গুঁতিয়ে চলেছে। সত্যিই পারলাম না। ক্লাস শেষ হবার আগেই উঠে পড়লাম। বললাম :

‘মাপ করবেন পিওতর পেত্রভিচ...

মাস্টার মশাই বললেন :

‘কেন, কী ব্যাপার? বোর্ডে আসতে চাস?’

‘না, মাপ করবেন, মানে, আমি ডেক্সের নিচে বসেছিলাম...’

‘তা কেমন লাগল সেখানে? আরামে বসা যায় বুঝি? আজ দেখলাম তুই এতটুকু গোলমাল করিসনি ক্লাসে। বারবার এমনি চুপচাপ থাকলে মন্দ হবে না।’

উল-বুনিয়ে

নিশ্চয় তোমাদের অবাক লাগবে। কেননা আমি যে ব্যাটা-ছেলে... কিন্তু সেটা কিছু নয়। ব্যাপার হল আমি উল বুনতে পারি। দিদিমার কাছে শিখেছি। স্কেটিং-এর টুপিটা আমি নিজেই বুনেছি।

অথচ সবাই টিটকারি দিতে লাগল আমায় : ‘ছো, ছো, মেয়ে তুই! উল বোনে কেবল মেয়েরা! ছেলেরা বোনে না! দুয়ো! দুয়ো!...’

খুব কষ্ট হল। এমন টিটকারি দিলে কষ্ট আবার হয় না? এমনকি মিথ্যে কথাই বললাম। বললাম, বুনতে জানি না। প্রায় কেঁদে ফেলি আর কি। কিন্তু গুরিক যে আমায় বুনতে দেখেছে। আমাদের বাড়িতে এসেছিল, তখন দেখেছে। ও বলল, ‘মিথ্যে কথা, আমি দেখেছি।’

আমার নাম দিল ওরা উল-বুনিয়ে।

‘এই যে উল-বুনিয়ে... ওহে উল-বুনিয়ে... উল-বুনিয়ে এসে গেছে রে!’

ভেবে দ্যাখো কী ভীষণ ব্যাপার!

আমি কিন্তু উল-বোনা ছাড়লাম না। টিটকারি যখন দিচ্ছে তখন বুনেই যাই। দিদিমাও বললেন :

‘বুনে যা।’

নিজের জন্যে একটা সোয়েটার বুনলাম আমি, হলদে রঙ, ডোরাকাটা। ডোরাগুলো সবুজ রঙের ভারি সুন্দর। দিদিমা অবিশ্যি দেখিয়ে দিয়েছিলেন। তবে মোটের ওপর বুনেছি আমিই।

সোয়েটার পরে ক্লাসে এলাম।

সবাই দেখল সোয়েটারটা। টিটকারি দিল না কিন্তু। কেবল তাকিয়ে তাকিয়ে দেখে।

তারপর হঠাৎ গুরিক বলে উঠল :

‘হ্যাঁ, এটা সোয়েটার বটে!’

মিশকাও :

‘সোয়েটারের মতো সোয়েটার!’

আমি আর পারলাম না, বলে দিলাম :

‘নিজে বুনেছি!’

‘বটে?’ অবাক হয়ে গেল সবাই।

বললাম, ‘তা বুনেতে আমি জানি।’

সবাই তাকিয়ে তাকিয়ে দেখে সোয়েটারটা। বুঝতে পারছি ভালো লেগেছে।

কেউ, টিটকারি দিল না। টিটকারি দেবার কী আছে। বুনেতে জানা মোটেই খারাপ কিছু নয়। সবাই বুঝেছে সেটা।

সিন্দুকে কুমড়ো

আমার কুমড়োটা দেখেছ? দেখোনি? নিজেই ফলিয়েছি। আর কোথাও নয়, আমাদেরই ঝুলবারান্দায়, দিদিমার পুরনো সিন্দুকটায়।

মাটি বোঝাই করলাম সিন্দুকে। ডালট’ খুলে দিলাম। বীজ পুঁতলাম। বেড়ে উঠল গাছ, তারপর কুমড়ো। বাড়িতে যারা আসে তাদের দেখাই। অবাক হয়ে যায় সবাই। বলে ঠাট্টা নয়, সিন্দুকে কুমড়ো। প্রদর্শনীতে পাঠানো উচিত মস্কোয়। দেখুক কেমন কুমড়ো হয় আমাদের জেলায়!

ওটাকে নিয়ে ভারি গর্ব ছিল আমার। চোখ আর ফেরাতে পারতাম না। মাকে ডেকে বলতাম :

‘দ্যাখো মা, কেমন বেড়ে উঠেছে। কাল কত ছোট ছিল, দেখেছ?’

মনে হত যেন এক রাতের মধ্যেই বেড়ে উঠেছে। কখনো আবার সন্দেহ হত একটু যেন ছোট হয়ে গেছে। অবিশ্যি জানি, তা তো আর হতে পারে না।

কেবলি ভাবতাম প্রদর্শনীর কথা। নিয়ে যাব প্রদর্শনীতে, বলব আমিই ফলিয়েছি, সিন্দুকে। সবাই বলবে কী চমৎকার! সত্যিই সিন্দুকে ফলেছে? এমন কুমড়ো আমাদের এখানে কখনো আসেনি। দাও তোমার কুমড়ো। নিয়ে তাকের উপর রাখবে, একটা ফলক আঁটবে। ফলকে লেখা থাকবে, ‘সিন্দুকি কুমড়ো’ কেননা সিন্দুকে ফলেছে। তার পাশে আমার নাম, কেননা আমি ওটা ফলিয়েছি। হয়তো প্রাইজও পেয়ে যেতে পারি।

কেবলি কুমড়োর কথা ভাবতাম। কেবলই জল দিতাম তাতে। কেবলি মা-বাবাকে জিগ্যেস করতাম, আর কী কী করতে হবে। তবে বাবা কিন্তু কুমড়োর কথা সইতে পারতেন না। বলতেন :

‘জ্বালালে তোমাদের কুমড়োয় । একেবারে পাগল করে দেবে । সারাদিন কেবল ওই এক কথা । কাজ থেকে ফিরেছি, একটু জিরোব, পড়ব... তা না, এসে কুমড়ো নিয়ে পড়েছে... আমার একটু রেহাই দাও তো বাপু!’

নিজের ঘরে গিয়ে দরজা বন্ধ করে দিলেন বাবা ।

সবারই কাছে বলতাম কুমড়োটোর কথা । কুমড়োর কথা ভাবতে ভাবতে ঘুমিয়ে পড়তাম । জাগতামও কুমড়োর কথা ভেবেই । সিন্দুক আর কুমড়োর স্বপ্ন দেখতাম ।

ব্যাপারটা চুকিয়ে দিল পাড়ার ছেলে আল্কা ।

বলল, ‘কী এটা? কুমড়ো?’

বললাম, ‘নিশ্চয়ই । তুই কী ভেবেছিলি?’

‘ভেবেছিলাম বাদাম ।’

‘বাদাম মানে?’ চটে উঠলাম আমি ।

‘একে আবার কুমড়ো বলে নাকি?’ ও আমায় নিয়ে গেল স্কুলের ছেলেদের চষা সবজিক্ষেতটায় । গিয়ে দেখি, হ্যাঁ কুমড়ো বটে! একেবারে প্রকাণ্ড প্রকাণ্ড । গগ্গা গগ্গা ।

‘নিজেরাই আমরা ফলিয়েছি’, বলল আল্কা ।

নিজের ফলানো কুমড়োটোর জন্যে লজ্জা হচ্ছিল । তাহলেও বললাম :

‘কিন্তু আমার কুমড়ো সিন্দুকে ফলানো ।’

পাখি

ঘণ্টা পড়তেই বেরিয়ে এলাম স্কুলের আঙিনায় । চমৎকার দিন । ঝড় নেই । বৃষ্টি নেই । বরফ নেই, কেবল ঝলমলে রোদ ।

হঠাৎ দেখি বেড়াল গুঁত পাতছে । ভাবলাম, কোথায় গুঁত পাতছে বেড়ালটা দেখি তো । চুপি চুপি পেছু নিলাম বেড়ালটার । হঠাৎ লাফ দিল বেড়ালটা । দেখি কী, দাঁতে তার একটা পাখি— চড়ুইছানা । বেড়ালটার লেজ টেনে ধরলাম :

‘দে এফুনি, দে বলছি পাখিটা ।’

পাখিটা ফেলে দিয়ে পালাল বেড়াল ।

ক্লাসে নিয়ে এলাম পাখিটাকে ।

লেজের খানিকটা ছিঁড়ে গেছে ।

সবাই ঘিরে ধরল আমায়, চ্যাঁচাতে লাগল :

‘আরে দ্যাখ দ্যাখ পাখি! জ্যান্ত পাখি!’


মাস্টারমশাই বললেন :

‘বেড়ালে পাখি ধরে গলায় কামড়ে । তোর পাখিটার ভাগ্যি ভালো । কেবল লেজের ওপর দিয়ে গেছে ।’

সবাই পাখিটাকে একটু ধরে দেখতে চায় । কিন্তু কাউকে দিলাম না আমি । ওটা পাখিরা পছন্দ করে না ।


পাখিটাকে গিয়ে রাখলাম জানালার বাজুতে । ঘুরতেই দেখি, পাখি আর নেই । ‘ওরে ধর, ধর’ বলে চৌচিয়ে উঠল ছেলেরা । পাখি কিন্তু উড়েই গেল ।

তবে আমার কোনো দুঃখ হল না । আমিই যে ওকে বাঁচিয়েছি । সেইটেই তো বড় কথা ।



সাগরের প্রজাপতি

খালিদা হাসিলভা



দাদুর জন্যে পথ চেয়ে আছে উল্দুজ। দাদু কাজ করেন সামুদ্রিক পেট্রলখনিতে। আজ তাঁর ঘরে ফেরার কথা। কিন্তু তুফান উঠেছে। লোকে বলে এরকম দিনে সাগরে ঢেউ ওঠে তিনতলা বাড়ির সমান উঁচু, বাতাসের ঠাণ্ডা ঝাপট তরোয়ালের মতো শনশনে, মেঘে ছেয়ে আসমান এমন জমাট যে চোখে কিছু দেখা যায় না।

উল্দুজ দাদুর কাছে শুনেছে যে লোকে সাগরের বুকে মস্ত এক শহর তুলেছে। রাস্তাগুলো তার ভারি লম্বা লম্বা। দুধারে তার বড় বড় উঁচু বাড়ি। তারই একটা বাড়িতে থাকেন দাদু। এক হাঙা থাকেন সেখানে, তেল তোলার ডেরিকে যতক্ষণ কাজ চলে, তারপর ফিরে আসেন বাড়িতে। কদিন জিরিয়ে আবার চলে যান তাঁর সাগরের

শহরে। সত্যি বলতে কি, সাগরের বুকে আসল একটা শহর উঠেছে এটা উল্‌দুজ ঠিক বিশ্বাস করেনি। দাদু হয়তো স্রেফ গল্পের মতো বানিয়ে বানিয়ে বলেছে, ভাবত সে। জিগ্যেস করত :

‘দাদু, তোমাদের ও শহরে সিনেমা আছে?’

‘আছে রে,’ বলতেন দাদু।

‘দোকান?’

‘দোকানও আছে!’

‘লাইব্রেরি?’

‘তা-ও আছে।’

‘মোটরগাড়ি?’

‘আছে বইকি। মোটর, লরি অনেক আছে।’

‘চিড়িয়াখানাও আছে?’

‘দাদু হেসে মাথা দোলান :

‘যা নেই, তা নেই। চিড়িয়াখানা এখনো হয়নি। তবে পাখি আছে, অনেক পাখি। আর কী তুই জানতে চাস বল্।’

উল্‌দুজ ভাবতে লাগল কী জিগ্যেস করা যায়। বলল :

‘আর ফুল আছে তোমাদের শহরে?’

‘আছে বইকি। ফুল না থাকলে আবার শহর! যদি চাস, তোর জন্য একটা তোড়া এনে দেব।’

‘খুব ভালো হবে দাদু, এনে দিয়ো কিছু।’

এখন অধীর হয়ে দাদুর পথ চেয়ে আছে উল্‌দুজ। ঝড় ওদিকে যেন ইচ্ছে করেই বাড়ছে। দিদিমা আঙিনার এদিক-ওদিক দেখে ঘরে ফিরে মাথা ঝাঁকালেন :

‘উইঁ’, দাদু তোর আজ আর আসবে না।’

ঠাণ্ডা কেটে গেল। মৃদুমন্দ গরম পড়ল। মিঠে রোদে ভরে গেল চারিদিক।

হঠাৎ দাদু এলেন, নাতনির জন্যে নিয়ে এসেছেন লাল লাল গোলাপ।

‘এবার দেখলি তো, আমাদের শহরে ফুলও ফোটে?’

ফুলদানিতে গোলাপগুলো রাখল উল্‌দুজ। আর দিনকয়েক পরে কাজে চলে গেলেন দাদু। সমুদ্র এবার এমনই শান্ত আর স্বচ্ছ যে জলের তলে মাছের ঝাঁকও স্পষ্ট দেখা যাচ্ছে।

কাঠের পাটাতনের রাস্তা দিয়ে দাদু যাচ্ছিলেন তাঁর তেল তোলার ডেরিকে। দুপাশে বড় কাঠের টব, তাতে রঙ-বেরঙের ফুল। তার উপর পাক দিচ্ছে

ঝলমলে প্রজাপতি । সন্ধ্যায় ফেরার সময় দাদু একটি প্রজাপতি ধরে কাচের
বয়ামে পুরলেন ।


‘কী ওস্তাদ, প্রজাপতির দরকার পড়ল কিসে?’ জিগ্যেস করল সঙ্গীরা ।

‘নাতনিকে দেব । দেখুক আমাদের সাগরের শহরে কত সুন্দরীর মেলা ।’



‘শুনছি, ঘাস বাড়ছে...’

সেমিওন গুরতাকভ



‘আচ্ছা মেঘগুলো সব গেল কোথায়?’ বলল ল্যুবাশকা।

ঘাসের উপর শুয়ে শুয়ে সে নীল আগুনে পোড়া আকাশটাকে দেখছিল। পরিষ্কার ফাঁকা আকাশ। শুধু ধীরে ধীরে সরে যাচ্ছে একটা তপ্ত গোলক— সূর্য। আজ দুদিন ধরে এই চোখ-ধাঁধানো গোলকটায় মেঘের ছায়া পড়েনি।

গুমোট। গরম। তপ্ত হাওয়ায় তালু জ্বলে যায়। পুড়ছে, পুড়ছে, ফ্যাকাশে নীল আগুনে পুড়ছে উঁচু আকাশটা। পুড়ছে একদিন, দুদিন, সপ্তাহ, দুসপ্তাহ। শাদা মেঘগুলো যেন দানা বাঁধতে না-বাঁধতেই সে আগুনে বাষ্প হয়ে উড়ে যাচ্ছে।

‘অমন মনমরা কেন ওগুলো, অমন চুপচাপ?’ বলল ক্ষেতের গমশিষগুলোকে লক্ষ করে।

গমগাছগুলো দাঁড়িয়ে আছে একেবারে নিশ্চল। গম, ঘাস, গাছপালা— সবকিছুই।
এতটুকু খসখসানি নেই।

‘হবে-না মনমরা!’ পাশ দিয়ে যাচ্ছিল গুরা মাসি, আমার হয়ে সে জবাব দিল,
‘ঘাসগুলো যেন নিঃশ্বাস নিতেই পারছে না, শুকিয়ে মরবে।’

‘ঘাসে আবার নিঃশ্বাস নেয় নাকি?’

‘নেয় বইকি,’ বললাম আমি।

ল্যুবাশকা ঘাসের উপর কান পেতে শুনল :

‘উঁহু’, শুনতে পাচ্ছি না তো।’

আমি বোঝাবার চেষ্টা করলাম যে, এখানে বড় গোলমাল : মুরগি ডাকছে, ঘেউ
ঘেউ করছে কুকুর, কাঠ ফাড়ছে লোকে, এখানে কি শোনা যায়? শুনতে হলে যেতে
হবে দূর ঘাসে-ভরা মাঠে।

তবে ব্যাখ্যাটা ল্যুবাশকার মনে ধরল না। তক্ষুণি ছুটে গিয়ে বিনা গোলমালে
ঘাসের নিঃশ্বাস শোনার ইচ্ছে হল তার।

ভারি এক ফ্যাসাদ বাধাল গুরা মাসি।

খেতে আরো গরম, একটু ছায়া নেই গা বাঁচাবার।

আকাশ এখানে আরো বড়, আরো উঁচু। গুরু হয়েছে একবারে ওই টিলেগুলো থেকে,
কোথাও আড়াল পড়েনি। শুধু আকাশ আর মাঠ। তাছাড়া খেতের মধ্য দিয়ে ওই হাঁটা
পথটা। বাস্। উপরে আকাশ, আর নিচে খেত আর আমরা, চলেছি হাঁটতে হাঁটতে।

ট্র্যাক্টরের ঘড়ঘড় শোনা গেল। খেতের ওদিক থেকে ধুলোর মেঘ উঠল। হাঁটা
পথটাতেও পুরু হয়ে জমেছে ধুলো। কাছের গমগাছগুলো যেন ছাই-মাখা।

পাকস্ত গাছগুলো যেন মূর্ছা গেছে; একটা শিষও কাঁপছে না, একটা পাতাতেও
সরসরানি নেই। বোবা। কাল। আধা-ঘুমে কিসের যেন হাপিত্যেশ। খরা। গুমোট।

‘কী চাইছে ওরা?’ ল্যুবাশকা জিগ্যেস করল গমগুলোর কথা।

‘বৃষ্টি চাইছে। তোর তেষ্ঠা পেয়েছে তো?’

‘হ্যাঁ, পেয়েছে।’

‘দ্যাখ তবে, অথচ জল খেয়েছিস মাত্র ঘন্টাকানেক আগে। দুহগু বৃষ্টি হয়নি,
ওদেরও তেষ্ঠা পায় তো।’

‘কিন্তু ওদের তো প্রাণ নেই!’

‘আছে বইকি। ওই গমগাছগুলো, এই ঘাস, এই ফুলটা, ওই বার্চগাছটা, সবারই
প্রাণ আছে। নিঃশ্বাস নেয়, মাটি থেকে রস খায়, রোদ খায়।’

‘কিন্তু এখানেও নিঃশ্বাসের শব্দ শোনা যাচ্ছে না কেন?’ ফের জিগ্যেস
করল ল্যুবাশকা।

উত্তর দেবার ফুরসুত হল না। বনের ওপারে গর্জন করে উঠল যেন মস্ত এক কামান দেগেছে। খেতের উপর দিয়ে বহু দূর গড়িয়ে গেল বজ্রের গুরুগুরু। বনের উপরকার আকাশটা হয়ে উঠল ঘোলাটে, আর তার ফ্যাকাশে নীলের উপর দিয়ে হুড়মুড়িয়ে এল ঘন কালো মেঘ।

মেঘ ডাকল আরও অনেকবার। রূপোর খড়্গ দিয়ে যেন কেউ বাঁকা কোপ মেরে চলেছে। কিন্তু কাটতে পারছে না। ধীরে ধীরে কেবলই উঠে আসছে মেঘ। উঁচুতে, আরো উঁচুতে। ঢেকে ফেলল আধখানা আকাশ, ঢাকা পড়ল সূর্য। জ্বলজ্বলে রোদের জায়গায় হঠাৎ যেন গোধূলি নেমেছে। গুমোট, আগের চেয়েও যেন বেশি গুমোট।

চারিদিককার এই হঠাৎ বদলটা চূপ করে দেখছিলাম আমরা। অন্য সবকিছুই আমাদের মতোই চূপচাপ। যেন লুকিয়ে পড়েছে, নিখর হয়ে গেছে একটা মস্ত ঘটনার সামনে।

আবার বাজ ডাকল, রূপোর বাঁকা খড়্গে ফুলে ওঠা মেঘের উপর কোপ পড়ল আবার। এবার কিন্তু ফেটে গেল মেঘ। সেই ফাটল দিয়ে বৃষ্টি নামল ঘুমুরঙা ধারায়। একটা বার্চগাছের নিচে দাঁড়িয়েছিলাম আমরা, হঠাৎ তার ডালপালায় দমকা হাওয়ার দোল উঠল। বৃষ্টি ঝেঁপে এল এখানেও, ঘা দিল পাতায় পাতায়। আনন্দে থরথরিয়ে উঠল গাছটা, প্রতিটি পাতাই যেন তার জলের ফোঁটাটুকুর জন্যে অস্থির।

‘যেন হাসছে!’ বার্চগাছটার কথা বলল ল্যুবাশকা, ‘কিসের আনন্দে? বৃষ্টির জন্যে?’
‘দ্যাখ্, গমগাছগুলোও একেবারে তাজা হয়ে উঠেছে।’

বাতাসে দোল খাচ্ছে শিশু, খেতময় ঢেউ। বৃষ্টিও আসছিল ঘনঘন। এই সামনে খেতের উপর দেখা গেল ঘুমুরঙা বাঁকা ধারা, হঠাৎ তা ধেয়ে আসতে লাগল আমাদের দিকে। আসছে, আসছে, এসে গেল গাছের মাথায়। ভেজা পাতায় জল আর আটকাল না, অব্যবহারে জরে পড়ল আমাদের খোলা মাথায়, কাঁধে।

মাথায় আর ভেজা মুখখানায় হাত বুলাল ল্যুবাশকা।

‘আহ্!’

‘চমৎকার!’

আমি ওর হাত ধরে সোজাসুজি এগিয়ে গেলাম বৃষ্টির মধ্যে। ওম-ওম বৃষ্টি, জলে ধুয়ে যাচ্ছে রোদপোড়া মুখ, কী ভালোই-না লাগছে, চারপাশের সবকিছু হয়ে উঠছে তাজা, রসালো, জ্বলজ্বলে, যেন নতুন করে জন্ম হল। আর খালি পায়ে নরম ভেজা মাটির উপর দিয়ে, টাপুর-টাপুর জমা জলগুলোর উপর দিয়ে হাঁটতেও আনন্দ। জোরে জোরে ছপ ছপ করতে লাগলাম আমরা, ভিজ়ে যাবার ভয় তো আর নেই, কিছুরই ভয় নেই।

এক দুই, ছপ্, ছপ্, ছপ্, ছপ্!

হেসে উঠলাম আমরা, কে জানে কেন। অনেকদিন এমন খুশি লাগেনি।

‘আয় বৃষ্টি ঝেঁপে!’

আয় বৃষ্টি, আয়! আরো ঝেঁপে, আরো ঝেঁপে! ঢাল, কেপটামি করিস নে। মাটি আর তার গাছপালা সবার তেষ্ঠা মিটুক।

হঠাৎ বৃষ্টির ধারা কমে এল, ঝিমিয়ে এল। ঘেসো মাঠটায় যখন গিয়ে পৌঁছলাম, তখন একেবারেই তা থেমে গেছে। আবছা ঝিকমিক করছে মাঠটা, জলে ধোয়া ফুলগুলোর উপর, জ্বলজ্বলে সবুজ ঘাসগুলোর উপর হালকা ভাপ ভাসছে।

বসলাম গিয়ে মাঠটার একেবারে ধারে, ল্যুবাশকা তো আবার শুয়েই পড়ল, কান পাতল ভেজা ঘাসের উপর। সে তো করবেই। কারো যদি কিছু একটা জানবার ইচ্ছে হয়, সে তো তখন তাই নিয়েই দিনরাত ভাববে, সাতবার জিগ্যেস করবে। বোঝাই যাচ্ছে, কী করে ঘাস বাড়ে তা শোনার অসম্ভব ইচ্ছে হয়েছে ল্যুবাশকার।

জলের ভারে ডগমগ করে উঠেছে ঘাস-ফুলগুলো, নিজেদের পেয়ালা আর কলসি উপচানো বাড়তি জলটুকুও প্রাণে ধরে ছাড়তে চাইছে না। ফোঁটা ফোঁটা জল পড়ছে, ঘাস পড়ছে নুয়ে, হয়তো এক পলক রইল তার পাতার উপর, আস্তে করে কেঁপে উঠল ঘাস। প্রায় চোখেই পড়ে না ঘাসগুলোর এই তিরতিরানি। কে জানে তার কারণ কী, হয়তো জল পেয়ে তাজা হয়ে উঠেছে শিকড়গুলো, জলের ফোঁটাগুলো শুষ্ক নিচ্ছে, শুষ্ক, শুষ্ক, তেষ্ঠা আর মিটছে না।

‘শুনতে পাচ্ছি!’ বলল ল্যুবাশকা। বলল না, আনন্দে চোঁচিয়ে উঠল।

আবছা ঝিকমিকে মাঠটার দিকে চেয়ে তন্ময় হয়ে ছিলাম, চট করে ধরতে পারলাম না কী ও বলছে।

‘শুনছি ঘাস বাড়ছে!’

আমিও কান পাতলাম মাটিতে, সত্যিই ভারি আবছা নরম, প্রায় ধরা যায় না কী সব শব্দ। হয়তো ঘাসের উপর জলের ফোঁটার শব্দ, হয়তো ফুলগুলোর শেকড়ে জল টানার শোঁ শোঁ। নাকি— হ্যাঁ, হ্যাঁ, সত্যিই হয়তো ল্যুবাশকা আর আমি শুনেছি বৃষ্টির পরে তাজা ঘাস কীভাবে বাড়ে!...

বৃষ্টি থেমে ছিল কেবল কিছুক্ষণ। বনের ওপার থেকে আবার এগিয়ে এল ঘুমুরঙা বৃষ্টিধারা, মাঠের উপর দিয়ে এগিয়ে আসতে লাগল সোজা আমাদের দিকে।


উঠে দাঁড়ালাম আমরা, এগিয়ে গেলাম বৃষ্টির দিকে। ফের ভারি ইচ্ছে হচ্ছিল হাতের উপর, মুখের উপর বৃষ্টির স্নিগ্ধ ছোঁয়া নিই। আর বৃষ্টি যখন একেবারেই এসে পড়ল, তখন গেয়ে উঠলাম :

‘আয় বৃষ্টি ঝেঁপে!’

এখন আর মনে নেই আরো কী কী গেয়েছিলাম। এইটুকু শুধু মনে আছে যে খুশি
লেগেছিল। লাগবে না আবার! আমরা যে শুনেছি কীভাবে ঘাস বাড়ে। আমরা যে
দেখেছি কীভাবে চোখের সামনে চারিদিকটা জীবন্ত আর নতুন হয়ে ওঠে।



তুলকা আলেক্সান্দর বাত্রভ



তুলকা মেয়েটির চোখদুটি নীল, মাথায় মজার দুটি বেণি, একটা চাকার মতো, আরেকটা ছাগলের শিঙের মতো। জেলেদের জেটি বরাবর মনমরার মতো সে হাঁটছে। মাথার উপর হাসিখুশি হালকা মেঘ, উড়ে বেড়াচ্ছে হাসিখুশি গাঙচিল, হাসিখুশি রোন্দুর চারিদিকে, কিন্তু মেয়েটির মন ভার। চুপ করে তাকিয়ে দেখছে সমুদ্রের দিকে।

আর সে কী সমুদ্র!-এই নীল। এই আবার ছেয়ে-সবুজ। হঠাৎ একেবারে সোনালি। কিন্তু তুলকার চোখ অন্যদিকে... দূরের ওইখানটায়, যেখানে সবচেয়ে নীল, সেখানে সমুদ্রের গভীরে আছে গন্ধকি-হাইড্রোজেনের রাজ্য, জীবন্ত সবকিছুই মারা পড়ে তাতে, কাঁকড়া, মাছ, জেলি ফিশ, এমনকি সিকুয়োটক পর্যন্ত...।

এই বিহুছিরি গ্যাসটার কথা সে শুনেছে স্কুলের শিক্ষিকা আল্লা ফেদোরভনার কাছ থেকে। সেই থেকে তুলকার মনে শান্তি নেই।

‘কী রে তুলকা, মনমরা কেন?’

‘স্ট্র-হ্যাট পরা ঢ্যাঙা এক জেলে স্নেহের সুরে বলল চোখ মটকিয়ে।

দীর্ঘ নিঃশ্বাস ফেলল তুলকা। বলল :

‘ভিক্তর কাকু, ছোট-বড় কোনো মাছই আমাদের আর বাঁচবে না... একটা বিষাক্ত গ্যাস আছে... তাকে বলে গন্ধকি হাইড্রোজেন...’

‘হ্যাঁ, তা আছে বটে,’ সায় দিল সে, কিন্তু কোনোরকম দৃষ্টিস্তা দেখা গেল না। মুখখানা একেবারে নিশ্চিন্ত আর চোখদুটোয় একটু দুষ্ট দুষ্ট ব্রোঞ্চ-রঙা ঝলক।

রেগে ভেঙচি কাটল তুলকা, ‘আছে, আছে!’ ‘আছে... তা লোকে ভাবছে-টা কী?’

‘লোকের ভেবে হবে-টা কী। ভেবে শুধু কপাল ঘামবে, তুলকা।’

অন্য সময় হলে জেলেদের এই বেয়াড়া রসিকতায় তুলকা হেসে উঠত, এবার কিন্তু সে সরে গেল গোমড়া মুখে।

বুড়ো আলেক্সেইয়ের কাছে গেল সে। ময়দার দোকানের সামনে বসে সে কড়া তামাকের পাইপ টানছে। মুখখানা তার ভার-ভার, কাটা দাগে ভরা। একবার রাতে সমুদ্রের ঝোড়ো ডেউয়ে তাকে নৌকা থেকে আছড়ে ফেলে পাথরের উপর দিয়ে হেঁচড়ে নিয়ে গিয়েছিল। লোকটার ভয়ডর নেই, সমুদ্র আর সমুদ্রের জীবকে সে ভালোবাসে। নিশ্চয় তুলকার কথায় সে কান দেবে।

কিন্তু অবাক কাণ্ড, ভিক্তর কাকুর মতো আলেক্সেই দাদুরও এতটুকু দৃষ্টিস্তা দেখা গেল না।

আরো মুখ-ভার করল তুলকা। না, সমুদ্রের কথা কেউ ভাবতে চায় না, অথচ দিনরাত মাছ আনছে ওই সমুদ্র থেকেই... আর তাকে কিনা ঠাট্টা, বলে তুলকার মাথা খারাপ হয়েছে।

আর মাথার উপর পাক দিতে দিতে গাঙচিলগুলোও ঠাট্টা করল :

‘ক্যাক্ ক্যাক্!’

‘মাথা খারাপ হয়েছে...’ হেসে উঠল হাওয়া।

হাসল না কেবল সমুদ্র, আদর করে সে শুধু তার ঢেউ দিয়ে মেয়েটির রোদপোড়া পা-দুটি ধুইয়ে দিয়ে ফিসফিস করল :

‘তুই মেয়ে ধনিয়!’

তুলকার ঘুম হয় ভারি বিহুছিরি। কেবল স্বপ্ন দেখে গন্ধকি-হাইড্রোজেনের... স্বপ্নে সে আসে এক প্রকাণ্ড কালো বুড়োর মূর্তি ধরে, হাতগুলো যার অক্টোপাসের গুঁড়ের মতো। মোটা মাথা, উঠখো নাক, মোচওয়ালা। তাকে দেখে ভয়ে পালিয়ে যায় যত

প্রাণী। ফ্যাকাশে হয়ে যায় কমলারঙের সব সামুদ্রিক উদ্ভিদ। কালো হয়ে ওঠে জল। আতঙ্কে ছোটোছুটি করে মাছের ঝাঁক, আর তুলকা একটা খড়্গ মাছ হয়ে গিয়ে তার সঙ্গে মরণপণ লড়াই করে যায় ভোর পর্যন্ত...

মন খারাপ হয়ে ঘুম ভাঙে তুলকার। দুনিয়ার কোনো সাগরে, কোনো মহাসমুদ্রে এখানকার মতো এত বেশি গন্ধকি-হাইড্রোজেন নেই। তার সঙ্গে লড়া উচিত। যুদ্ধ ঘোষণা করা দরকার। কিন্তু সবাই আগের মতো তার কথায় হেসে ওঠে। এমনকি তুলকার বাবা, মাছ-ধরা জাহাজ 'নিনা'য় যিনি নেভিগেটর, তিনিও হেসে বললেন :

‘ভাবনা নেই রে মেয়ে, বিজ্ঞানীরা একদিন আমাদের এই সমুদ্রকে সারিয়ে দেবার ব্যবস্থা করবে ঠিকই।’

বাপের হাসি ভালো লাগল না তুলকার। রেগে পা দুমদাম করে সে বলল :

‘আল্লা ফেদোরভনা বলেছেন যে, আমাদের সমুদ্রের মরা এলাকাটা জ্যান্ত এলাকার কয়েকগুণ বড়।’

‘নয় বড়ই হল, শুধু রাগ ফলাবি না, ওটা আমার ভালো লাগে না,’ গলা চড়ালেন বাবা, ‘বোকামি ছাড় তুলকা।’

তুলকা*? তুলকা আবার কে? ওর আসল নাম তো ইউলকা। বাবাই তো ওই তুলকা নাম চালিয়ে দিয়েছেন। যাক্ গে। ও নিয়ে ও রাগ করবে না...

‘তোদের পাইওনিয়র সংগঠনের সঙ্গে কথা বলব, জরুরি কোনো কাজ দিক তোকে, তাহলে তোর মাথা থেকে ওই কালো বুড়োটা ভাগবে...’

‘মোটাই ভাগাব না, দুনিয়ার মুখ যেন ও না দেখে! বরং শুষোরছানাটার পিলের মতো ফেটে মরুক!...’

তুলকার দিদিমাও ঠিক এমনিভাবেই গাল দেয়। শুনে না হেসে পারলেন না বাবা। বললেন :

‘নে হয়েছে, ঝগড়া করব না। তুই বরং সমুদ্রের দিকে চেয়ে দ্যাখ, কেমন জীবন্ত!’

সমুদ্রের দিকে চাইল তুলকা। সত্যিই জীবন্ত, হাসিখুশি, তাজা। তুলকার মুখে রোদ পড়েছে। আকাশের আলো। গ্রীষ্মকালের ঢেউয়ের আলো।

‘নিনা’ জাহাজের নেভিগেটর মেয়ের কাঁধে হাত দিলেন :

‘আল্লা ফেদোরভনাকে বলিস যে মাছ এখনো সবার জন্যে কুলিয়ে যাচ্ছে।’

‘মোটাই সবার জন্যে নয়!’

তুলকার পছন্দ হল না বাবার কথা। ওঁর আর কী। অষ্টোপাসের গুঁড়ের মতো হাতওয়ালা বুড়োটা তো আর রোজ রাতে ওঁর কাছে আসে না। বেগিদুটোয় হাত

* ‘তুলকা’ মানে চুনোপুঁটি মাছ।

বুলোল তুলকা, যেটা চাকার মতো গোল আর যেটা ছাগলের শিঙের মতো খাড়া, দুটোতেই। বলল :

‘বড় হয়ে আমি নিজেই হব বৈজ্ঞানিক...’

তখন আর স্বপ্নে নয়, দিনের আলোতেই লড়াই বাধবে কেলে বুড়োটার সঙ্গে। তুলকাই জিতবে। সাগর তার কানায় কানায় ভরে উঠবে রুপোলি মাছে। হাজার হাজার বছর ধরে সকলেরই কুলিয়ে যাবে— কারো নালিশ থাকবে না। মঙ্গলগ্রহ থেকে ফিরে লোকে তার সমুদ্রের সোনালি মাছ খাবে পেট পুরে। অন্য গ্রহের লোকেদের খাওয়াবে। বলবে, আরো দাও...

আগামী দিনের লোকেদের কি জানা থাকবে তাদের জন্যে কত ভেবেছিল নীল-চোখ ছোট তুলকা?



মাষেতের টুপি
আন্দ্রেই দুগিনেৎস
নাতিনার উদ্দেশে নিবেদিত



মাষেতের বয়স আট বছর। শীতের চারণমাঠে সে এল এই প্রথম।

সবই তার কাছে নতুন। ইচ্ছে হয় তক্ষুনি সারা এলাকাটা ঘুরে আসবে। ছুটে বেড়াবে ভেড়ার পালের পাহারাদার কুকুরগুলোর সঙ্গে। চেয়ে দেখবে তার আদরের শাদা-লেজো ভেড়াটাকে। আর সবচেয়ে বড় কথা, তার বাপ-মায়ের এখনকার ঘরটির তলে গিয়ে ঢুকবে, কেননা ওটা তো সাধারণ ঘর নয়, চাকায় বসানো। কোনো ভিত নেই তার, শুধু চারটে চাকা। সবচেয়ে আগে অবিশ্যি দরকার আশপাশটা দেখা।

মা-বাপে কিন্তু মাষেতকে ছাড়ছিল না। কেবলি জিগ্যেস করছিল গাঁয়ের লোকের খবর কী, কেমন আছে দিদিমা, কাকু কী করছে...

এদিকে শীতের সঙ্গে তো ছোট্ট। দেখতে না-দেখতেই বাতি জ্বলে উঠল, গুরু হল রাতের খাওয়া। শুইয়ে দিল মাষেতকে বললে, এতটা পথ, হয়রান হয়েছিস, ঘুমো।

মা লণ্ঠন জ্বলে ভেড়াগুলোকে দেখতে গেল। বাবাও ঘুমোতে গেলেন। গোটা দিনরাত ডিউটি দিয়েছেন তিনি, তাই সঙ্গে সঙ্গেই গোটা ঘর জুড়ে বাঁশি বাজাতে লাগলেন। ঘুমের সময় অন্য লোকের মতো তাঁর নাক ডাকে না, নাক দিয়ে শিস বেরোয়।

সবই চুপচাপ হয়ে যাবার পর উঠল মাষেত, জানালার উপর রাখা লণ্ঠনের ফিতেটা একটু বাড়িয়ে দিল। জুতো পরল। গায়ে চাপাল মায়ের ফার কোট, এতই সেটা জাবড়া যে ঠাণ্ডা-গরম, বৃষ্টি কিছুতেই ভাবনা নেই। বাপের মস্ত লোমের টুপিটা মাথায় দিয়ে চুপি চুপি বেরিয়ে এল কনকনে কালো অন্ধকারে।

তিয়ানশান পর্বতের* ফেব্রুয়ারির রাত অন্ধকার, হিমেল। বুনা বাতাস গজরাচ্ছে যেন ভুখা নেকড়ে, তাড়িয়ে আনছে কখনো তুষার-কণা, কখনো বৃষ্টি, কখনো-বা খোঁচামারা বরফ-ঝড়। রাখালদের সেই একলা ঘরের আশেপাশে ঝোপঝাড়ও নেই, বাগানও নেই। শুধু পাহাড়গুলোর মাঝখানে বারোমেসে বরফে ঢাকা এক সমভূমি। বিকেলে মাষেত যখন এসেছিল, তখন চারিদিকে অনেক দূর পর্যন্ত দেখা যাচ্ছিল, শোনা যাচ্ছিল। এখন ঝড়ের ফুঁসন্ত গর্জনে ভেড়ার ডাক পর্যন্ত শোনা যাচ্ছে না, সবাই তারা ঝড়ের ঝাপটা থেকে লুকিয়েছে ঘরের অন্য পাশে। কিছু যে দেখবে তা-ও অসম্ভব। থেকে থেকে শুধু শৌ শৌ অন্ধকারে দেখা দিচ্ছে একটা ঘোলাটে হলুদ ছোপ। ওটা মা'র লণ্ঠনের আলো, সারারাত ভেড়ার পালের কাছে ঘুরবে মা।

মায়ের জন্যে মায়া হল মাষেতের। নিশ্চয় ভারি ঠাণ্ডা লাগছে মায়ের, ভয় লাগছে। মায়ের দিকে এগিয়ে গেল মাষেত।

ঝড়ের ডাকে মা নিশ্চয় শুনতে পায়নি, মাষেত এগিয়ে এসেছিল একেবারে কাছে। ভেবেছিল কথা কইবে, হঠাৎ দেখে মা এমনভাবে থেমে গেল যেন কী একটা অলক্ষণ দেখেছে। মাথা হেঁট করে বাতাসে তার বাঁ কানটা পেতে কী যেন শুনতে লাগল।

মাষেতও থমকে গেল। চেয়ে দেখতে লাগল অন্ধকারে। ভাবল, মা নিশ্চয় ভেড়াদের কোনো একটা বিপদ টের পেয়েছে।

‘মা, কী হয়েছে?’ জিগ্যেস করল সে ভয়ে ভয়ে। কিন্তু ভেজা ভেজা ঘন বাতাসের ঝাপটায় তার কথাগুলো ডুবে গেল।

‘মা!’ প্রাণপণে চিৎকার করে মাষেত ছুটে গেল মায়ের কাছে।

‘আহ্ তুই, মাষেত! আমি এদিকে ভয়ে মরি। ভেবেছিলাম নেকড়ে ওঁৎ পাতছে।

* এশিয়ার পর্বতমালা, লম্বায় ২,৫০০ কিলোমিটার (সোভিয়েত ইউনিয়নের সীমার মধ্যে ১,২০০ কিলোমিটার)।

কিছুই দেখছি না, শুনছি না, আর পিঠ দিয়ে টের পাচ্ছি কে যেন রয়েছে, কাছিয়ে আসছে।’

‘তুমি মা সবসময় বলো যে পিঠ দিয়ে টের পাচ্ছ। সে আবার কী?’

‘শুধু আমার বেলায় নয় রে, সব রাখালের বেলাতেই তাই।’ ছেলেকে ওয়াটারপ্রুফে ঢেকে বলল উরুমকান, ‘সারারাত হয়তো টহল দিলাম, কিছুই নেই। হঠাৎ মনে হয় হুঁশিয়ার, কে যেন পেছনে গুঁড়ি মেরে যাচ্ছে পালের দিকে।’

শুনে মাষেতের গা শিরশির করে উঠল।

‘বুঝতে না-বুঝতেই ছোট্টাছুটি লাগায় কুকুরে, ডাকতে শুরু করে।’

‘আচ্ছা মা, আজ তোমার পিঠে কিছু টের পাচ্ছ না?’

‘ঠাণ্ডায় আজ এমন জমে গেছি যে, নেকড়ে আঁচড়ালেও পিঠে কিছু টের পাব না।’

‘ভেড়ার বাচ্চাগুলোও সব জমে যাবে।’ সংসারী লোকের মতো নিঃশ্বাস ফেলল মাষেত, ‘শোনো মা, লণ্ঠনটা আমায় দাও, আমি টহল দেব, তুমি গিয়ে একটু আগুন পুইয়ে এসো।’

‘কী যে বলিস, তুই বরং গিয়ে ঘুমো, গায়ের জোর জমিয়ে রাখ গে...’

অনিচ্ছায় ঘরে ফিরল মাষেত। দরজার কাছে সে থামল। কান পেতে কী শুনল। ঝড়ের আওয়াজ এখন খানিকটা কম। কখনো এখানে, কখনো ওখানে ভেড়াদের ঘুমন্ত ডাক। বাড়ির ছাদে শুয়েছিল কইবাগার, ভুখা ব্যাজারের মতো হাই তুলল সে। নিশ্চয় খিদে পেয়েছে খুব। সন্ধে থেকেই খিদে পেয়েছিল। কিন্তু রাখালের রাতে কুকুরদের খেতে দেয় না, যাতে জেগে থাকে। মাষেত কিন্তু পারল না। এই কড়া নিয়মটা ভেঙে একটুকরো মাংস এনে ছুড়ে দিল ছাদের উপর। উপোসী কুকুরটা তা সঙ্গে সঙ্গেই খপ করে লুফে নিল দাঁত দিয়ে।

তারপর শুতে গেল মাষেত। তার ধারণা হয়েছিল কইবাগার এরপর আরো মন দিয়ে ভেড়ার পালের কাছে ওই ঘোলাটে হলদে আলোর ছোপটায় নজর রাখবে।

শান্ত হয়ে আসা পালটার চারপাশে সারারাত টহল দেয় গিনি। কইবাগার হুঁশিয়ার হয়ে দেখে, আর হয়তো ভাবে, ঘুমুচ্ছে না কেন। যাই ঘটুক প্রথম শুনবে তো সে-ই, কইবাগার, নিদেনপক্ষে আকতাইলাক, আঙিনার উল্টোদিকে যে শুয়ে আছে ভেড়ার গোবরের স্তূপে। ও জিনিসটা সর্বদাই গরম। কর্তা হলে নিশ্চয় ঘরের ভেতর কোথাও গুটিসুটি মেরে তামাক টেনে ঘুমুবে। আর গিনি ওদিকে জেগে...

তুষারপাতে বুজে আসা চোখের ফাঁক দিয়ে কইবাগার সজাগ নজর রেখেছে ওই পাক-খাওয়া হলদে আলোর ছোপটায়।

হঠাৎ হাওয়ার উল্টো মুখটায় এসে গিনি থেমে গেল, কী যেন ভাবল। বসল, তারপর পা গুটিয়ে বসেই রইল।

আলোটা আর নড়ছে না দেখে মাথা তুলল কইবাগার। হুঁশিয়ার হয়ে কী যেন শুঁকল, এবার সাবধান হতে হয়।

অথচ চারপাশে কেবল ঘুমন্ত ভেড়ার গন্ধ আর ঝড়ের গোমড়া গোঙানি।

হঠাৎ ঝোপটার ওদিক থেকে একটা কড়া বিদ্যুটে বোটকা গন্ধ ভেসে এল। কইবাগারের পিঠে খাড়া হয়ে উঠল লোম। টান টান হয়ে লাফিয়ে নামল সে, চোখে পড়ল আকতাইলাককে, গোবরের টিপিটায় যে শুয়েছিল, সে-ও তাকিয়ে আছে আর্চা ঝোপটার দিকে।

তারপর দুজনেই যেন আগে থেকে সাঁট করে হঠাৎ সজোরে ডেকে উঠল, ছুটতে শুরু করল ঘুমন্ত পালটার চারপাশে।

দাঁত বার করে ক্ষেপে ডাকতে ডাকতে ছুটছিল তারা দুজন দুমুখে। মুখোমুখি হলে নিজেরাই কামড়াকামড়ি করতে চাইছিল, কিন্তু এত জোরে ছুটছিল যে তা সম্ভব হচ্ছিল না। অথচ থামাও চলে না। ছুটতে হবে, পালে বাইরের কাউকে ঢুকতে দেওয়া চলবে না।

‘আঁ?’ ভেগে উঠে চোঁচিয়ে উঠল উরুমকান।

ভেড়ার পালটা একেবারে গায়ে গায়ে এঁটে দাঁড়িয়েছে, তাদের ঘিরে ছুটছে খেপা কুকুরদুটো, দেখেই উরুমকান বুঝল কাছেই কোথাও নেকড়ে এসেছে।

ঘরে গিয়ে স্বামীকে জাগাবে, অন্তত বন্দুকটা নিয়ে আসবে। কিন্তু কে জানে কটা নেকড়ে, কোথায় গুড়ি মেরে আছে। হয়তো খুবই কাছে কোথাও ফাঁক খুঁজছে। বন্দুক আনতে না-আনতেই হয়তো ভেড়া মেরে পালাবে।

উরুমকান ফাঁস লাগানো লম্বা ডাণ্ডটা টেনে নিয়ে লাফিয়ে উঠল ঘোড়ায়, সারারাত খোঁটার কাছে এটাও পাহারা দিচ্ছিল, ছুটল পালটার চারপাশে। দুবার চক্কর দিতেই তার নজরে পড়ল কেঁদো একটা নেকড়ে অনিচ্ছায় সরে যাচ্ছে।

‘কইবাগার!’ কুকুরকে ডাকল উরুমকান, তারপর চাবুক হাঁকিয়ে প্রচণ্ড চিৎকার করে সে ছুটল নেকড়ের পেছনে।

জানোয়ারটা ফিরে তাকাল, ঝকঝক করে উঠল তার সবুজ চোখ, তারপরেই ছুট লাগাল।

‘ওই! ওই! শয়তান!’ কুকুর লেলাতে লেলাতে উরুমকানও ছুটল তার পেছনে।

আর্চা ঝোপগুলোর কাছে এসে ঘোড়া থামাল উরুমকান। কেবল এখনি তার নজরে পড়ল যে তার সঙ্গে এসেছে কেবল কইবাগার, আর সে-ও কেন জানি দূর থেকে আসা আকতাইলাকের ডাক শুনে দাঁত কেলিয়ে পিছু হটতে চাইছে— ফিরে যাবার হুকুম চাইছে। উরুমকান মনে মনে বুঝল যে এখানের চেয়ে পালের কাছেই কুকুরের

প্রয়োজন বেশি, আওয়াজ করে সে কইবাগারকে ফেরত পাঠাল। বুদ্ধিমান কুকুরটাও মুহূর্তে মিলিয়ে গেল রাত শেষের ঘন অন্ধকারে।

উরুমকান বুঝল যে নেকড়েটার পাল্লা ধরা সহজে হবে না, আর ওদিকে পালে হয়তো সে না থাকলে বিপদ হতে পারে। কসম নিল, আর কখনো সে বন্দুক-ছাড়া হবে না।

বন্দুক, কুকুর আর লণ্ঠন— এই হল রাখালের সেরা সহায়, মুহূর্তের জন্যেও রাতে এদের হাতছাড়া করতে নেই।

হঠাৎ দূরে বন্দুকের আওয়াজ শোনা গেল, তারপর দ্বিতীয়বার। তারপর আকতাইলাকের করুণ গোঙানি আর কইবাগারের মরিয়া ঘেউ ঘেউ। ঝট করে ঘোড়া ঘুরিয়ে পালের দিকে ছুটল উরুমকান। ঘরটা থেকে আধ কিলোমিটার দূরে কার সঙ্গে প্রচণ্ড কামড়াকামড়ি করছে কুকুরগুলো, আর আতঙ্কে চ্যাচাচ্ছেন তক্তুরবাই।

কিন্তু উরুমকান যখন এসে পৌঁছল, ততক্ষণে সব শান্ত হয়ে গেছে। খোঁদলের মধ্যে পড়ে আছে একটা নেকড়ে, তার পাশেই চওড়া বুক পরাক্রান্ত কইবাগার বসে বসে তার থাবার জখম চাটছে। আর তক্তুরবাই কোলে করে নিয়ে আসছেন একটা ভেড়া।

‘মেরে ফেলেছে?’ চৈঁচিয়ে উঠল উরুমকান, ‘শাদা-লেজো?’

‘না মারতে পারিনি। তা তুমি কেন ছুটে গেলে পাল ফেলে?’

‘নেকড়ের পিছু নিয়েছিলাম। ভেবেছিলাম ফাঁস ছুড়ব...’

‘নেকড়েরা কি আর তোমার চেয়ে বোকা! ওরা এসেছিল দুটো দুদিক থেকে। জানোই তো নেকড়েরা একা আসে কৃচিৎ কদাচিৎ।’

‘যাক বাবা, বেঁচে তো আছে!’ খুশি হয়ে উঠল উরুমকান, ভেড়াটাকে ঘোড়ায় চাপিয়ে বলল, ‘তুমি নেকড়েটা সরিয়ে নাও, ছাল ছাড়াও। কিন্তু বাচ্চাটা? শাদা-লেজোর বাচ্চাটা কোথায়?’

‘পালে যদি না থাকে, তাহলে নেকড়ে নিয়েছে। তাহলে শুধু দুটো নয়, অনেক কটাই এসেছিল।’

ঘোড়া ফেরাল উরুমকান, মনে হল যে এই বুঝি অজানা জানোয়ারটাকে ধাওয়া করবে। কিন্তু সখেদে মাথা নেড়ে চলে গেল পালের দিকে। কষ্ট হচ্ছে বাচ্চাটার জন্যে। শাদা-লেজো উরুমকানের সবচেয়ে পেয়ারের ভেড়া। তার জন্যেই উরুমকান রাখালি করছে।

গত বছরের আগের বছর একবার খুব দুর্যোগ চলছিল। একপাল ভেড়া গিয়ে লুকিয়ে ছিল একটা শিলাপাহাড়ের নিচে। হঠাৎ সেখানে বরফের ধস নামে। মারা পড়ে বহু ভেড়া। অনেক বাচ্চাই মা হারায়। বাচ্চাগুলোকে যে-যেভাবে পারে বাঁচাবার জন্যে দিয়ে দেওয়া হয় যৌথ খামারিদের। উরুমকানের তখন কোলে ছেলে, কাজ করত না। কুড়িটি

বাচ্চা সে নেয়। গরুর দুধ খাইয়ে বড় করে। ভেড়াটাকে ভারি পছন্দ হয় মাষেতের। সারা গা কুচকুচে কালো, লেজটা শুধু শাদা। তাই তার নাম হয় শাদা-লেজো।

শরতে ভেড়াটা যখন বড় হল, চরে চরে চৰ্বি জমাল অনেক, তখন উরুমকান ঠিক করল এবার জবাই করে মাংস করা যাক। তখন এসেছিল কলখজের সভাপতি।

‘আরে!’ শাদা-লেজোকে দেখে অবাক হয়ে যায় সে, ‘দেখেই বোঝা যাচ্ছে যে, ভালো হাতে পড়েছে। অন্য সবার এক বছুরে ভেড়াও এর চেয়ে ছোট... শোনো উরুমকান, কেমন হয় যদি রাখালির কাজে যাও? স্বামীর সঙ্গে খাটবে। ওর দোসরটা ভারি বুড়ো হয়ে গেছে, ঘোড়ায় চাপতেও পারে না।’

বলে-কয়ে রাজি করাল। উরুমকান মাষেতকে দিদিমা’র কাছে রেখে চলে যায় ভেড়া-খামারে, শাদা-লেজোকে কাটে না, কলখজের পালে নিয়ে আসে। বাচ্চা হোক।

আর এই তার পরিণতি! এর জন্যেই কি টহল দিল উরুমকান। পেয়ারের ভেড়াটার প্রথম ছানাটিই গেল নেকড়ে’র পেটে। এখন দ্বিতীয় ছানার জন্যে বসে থাক...

শাদা-লেজোকে পালে রেখে উরুমকান ঘোড়াটাকে বাঁধল বাড়ির কাছে, তারপর দেখতে গেল মাষেত কেমন ঘুমুচ্ছে। জানালা দিয়ে তাকিয়ে দেখেই সে চমকে উঠল। তাড়াতাড়ি ছুটল ঘরের মধ্যে।

লণ্ঠনের মিটমিটে আলোয় বসে মাষেত ছোট্ট এক ভেড়ার ছানাকে দুধ খাওয়াচ্ছে। কাঁপছে ছানাটা।

‘শাদা-লেজোর ছানা!’ চৌকাঠে পা দিতেই চিনতে পারল উরুমকান। ‘কোথায় পেলি? আর বাপ বলল নেকড়ে নিয়েছে!’

অনেকক্ষণ চুপ করে রইল মাষেত! ওর মুখভরা দুধ, সেই দুধ খাওয়াচ্ছে ছানাকে। তারপর মুখের সবটা দুধ খাওয়ানোর পর মাষেত ভারিক্কি চালে বলল :

‘ভয় পেয়েছিল নেকড়ে!’ তারপর ধীরেসুস্থে বলছিলেন ঘটনাটা।

কুকুরের চিৎকারে তার ঘুম ভেঙে যায়। বাবা বিছানা থেকে লাফিয়ে নেমেই বন্ধুক নিয়ে ছুট দেয়। মাষেতও লণ্ঠন নিয়ে যায় তার পেছ পেছ, ভেবেছিল তাড়াহুড়োয় বাবা বোধহয় লণ্ঠনের কথা ভুলে গেছে। সঙ্গে সঙ্গেই বাপ অন্ধকারে কোথায় মিলিয়ে যায়। ভয় তাড়াবার জন্যে মাষেত লণ্ঠনের ফিতে বাড়িয়ে দেয় পুরোপুরি। লণ্ঠনটা উঁচুতে তুলে ঘরের দিকে সঁটিয়ে আসা পালটাকে চক্কর দিতে গেল সে। যে গোবরটিপিয়ায় আকতাইলাক থাকে, ততদূর পর্যন্ত গিয়ে হঠাৎ দেখে এক ভেড়ার ছানাপাল ছাড়া হয়ে এদিক-ওদিক ছোট্টাছুটি করছে।

‘নিশ্চয় মাকে খুইয়েছে,’ এই ভেবে মাষেত দৌড়ে বোকা ছানাটাকে ধরে ওভারকোটের তলে জড়িয়ে নেয়। লণ্ঠনটা তার পেছনে। সামনে ঘুটঘুটে অন্ধকার। মা-ও নেই, বাবা-ও নেই। কুকুরগুলো যেখানে অমন খেপে ডাকছে, হয়তো তারই কাছাকাছি আছে কোথাও।

হঠাৎ মাঝেত যেন দুটো সবজে চোখ দেখতে পেল। সবুজ চোখ! জ্বলছে! তারপর বলক দিল দাঁত... লম্বা... শাদা শাদা... এগিয়ে আসছে সে দাঁত, কড়মড় করছে এমনভাবে যে পিঠি হিম হয়ে আসে।

ছানাটা যাতে না চ্যাঁচায় তার জন্যে তাকে আরো জোরে চেপে ধরল মাঝেত। ডাকলেই নেকড়ে শুনতে পাবে। হঠাৎ লণ্ঠনটার কথা মনে পড়ল। পেছনে না চেয়েই এক হাত দিয়ে হাতড়ে হাতড়ে সেটা ধরে। তারপর সেটা সামনে রাখে এক বর্মের মতো করে। অমনি দাঁত, সবজেটে চোখ সব কোথায় মিলিয়ে যায়। সামনে, একেবারে কাছেই শুধু দুলছিল কী একটা ঘাসের শিষ।

কে জানে সত্যিই নেকড়ে কিনা। আসলে সবচেয়ে বড় কথা মাঝেত ঘাবড়ে যায়নি, লণ্ঠনটার কথা ভাবতে পেরেছিল...

ছেলের গায়ে আদর করে হাত বুলিয়ে মা বলল :

‘ছানাটা বড় হোক, তার লোম দিয়ে তোর চমৎকার টুপি বানিয়ে দেব।’

‘সভাপতি যেমন পরে, তেমনি?’ খুশি হয়ে উঠল মাঝেত।

তার ধারণা, কলখজের সভাপতির সাজগোজ দুনিয়ার সবার চেয়ে সেরা।

* * *

দিনকয়েক গেল। মাঝেতের বাঁচানো বাচ্চাটা বড় হয়ে উঠেছে, গা-ভরা তার ঝাঁকড়া লোম, পালের মধ্যে সবচেয়ে দুরন্ত। একদিন সন্ধ্যায় বাবা মাঝেতকে ডেকে বললেন যে ওটাকে জবাই করতে চায়।

‘জবাই করবে? বাচ্চা ছানাকে জবাই?’ মাঝেত ভয়ানক হাত নেড়ে কঁদে ফেলল। ‘দেব না জবাই করতে। নেকড়ে থেকে ওকে বাঁচালাম কি জবাই করার জন্যে? কী বলো? আমাকে তাই পেয়েছে?’

‘না রে, না,’ শানানো ছুরিটা লুকিয়ে রেখে বললেন বাবা, ‘কিন্তু টুপি বানাব কী দিয়ে?’

‘কেন, জ্যান্ত ছানার লোম ছাড়া হয় না বুঝি?’

‘তাহলে তুই নিজেই বল কী দিয়ে?’

‘কিছু দিয়েই দরকার নেই, আমার টুপিটা এখনো চলবে।’ এই বলে মাঝেত তার পুরনো টুপিটায় জোরে টান দিতেই তার চোখ ঢেকে গেল, আরেকটু টানলে নাকও ঢাকা পড়ত।

নীরবে চলে গেলেন বাবা।

সন্ধ্যায় এল কলখজের সভাপতি। ঘটনাটা সবই বাবা তাকে বললেন।

মাঝেতের কাছে এল সভাপতি— ছেলেটা তখন শোবার যোগাড় করছিল। কাঁধে তার ভারি জোরালো হাতখানা রেখে বেশ গুরুগম্ভীর গলাতেই বলল :

‘তা বটে, আঙুল দিয়ে তুই ঘি গলতে দিবি না। এমন একটা সহকারী পেলে তো বাঁচি।’

এরপর অনেকক্ষণ ঘুম আসেনি মাষেতের, কেবলি ভেবেছে সভাপতি নিন্দে করে গেল, নাকি প্রশংসা। কেবল সকালে যখন বাবা গেলেন ভেড়া দেখতে, আর মা ফিরল জিরোতে তখন মাষেত জানল যে ঘি গলতে না দেওয়ার মানে কলখজের ধনদৌলত নষ্ট করতে না দেওয়া।

‘আচ্ছা মা, জুসুভ আমায় সহকারী করে নেবে?’

‘নেবে, তবে তাড়াতাড়ি বড় হয়ে ওঠ!’ বিছানায় গা এলিয়ে বলল মা।

‘আর সভাপতির মতো আমারও দাড়ি গজাবে?’

‘গজাবে। বেশি করে রোদুরে ঘুরে বেড়া, তাহলে ভালো গজাবে।’

ঘুমন্ত মায়ের কোল ঘেঁষে ঠিক ভেড়ার ছানার মতোই আদর কাড়লে মাষেত।

* * *

মার্চের প্রথম রাত। বরফ গলে গেছে, ফলে রাত হয় মিশমিশে কালো। পাহাড় থেকে বয় হিমেল বাতাস। সেই সঙ্গে ঝিরঝিরে, বালির মতো খরখরে বৃষ্টি। ঠাণ্ডায় এমন ঘেঁষাঘেঁষি করে আছে ভেড়াগুলো যে পা ফেলার জায়গা নেই। যেসব ভেড়ার বাচ্চা দেয়ার কথা, তাদের পক্ষে এটা খুবই খারাপ। ঘেঁষাঘেঁষিতে থেঁতলে যাবে নতুন ছানা। আর উরুমকান আর তক্তুরবাই যেন জেনেই রেখেছে যে এই অলক্ষুণে রাতটাতেই অনেকগুলো ছানা জন্মাবে।

এমন রাতকে রাখালেরা বলে বহু জন্মানোর রাত। সন্ধে থেকেই পালা করে তারা ডিউটি দিচ্ছে। একজন আগুন পোয়ায়, অন্যজন পালের চারপাশে ঘোরে। একটু ক্লান্ত হয়, শীত করে, তখন যায় আগুন পোয়াতে। বদলে আসে অন্যজন। আজ একজনে চলবে না।

রাখালদের কাজই এই। শীত-গ্রীষ্ম দিন-রাত কখনো তাদের বিশ্রাম নেই। সীমান্ত রক্ষীর মতো সর্বদাই তারা সজাগ। কিন্তু বসন্তকালে বাচ্চা দেয়ার সময়টাই সবচেয়ে কষ্টকর। রাখাল তখন চোখ মেলে, সজাগ কান পেতে ঘুমোয়।

মাষেতও এ রাতটায় ঘুমোয়নি। মা-বাপকে না জানিয়ে সে আশা করে আছে নবজাতকের ডাক শুনবে সেই প্রথম। ইচ্ছে হচ্ছিল সবার আগে গিয়ে গরম কোঁকড়া-লোমো ভেড়ার ছানাটিকে সে কোলে নেবে।

বাপ বলেছিল রাতটা হবে ঠাণ্ডা, তাই সন্ধে থেকেই মাষেত চালের উপর খড় পাততে শুরু করে, কুকুরটা গরমে থাকবে। কিন্তু এর জন্যেও বকুনি খেল বাপের কাছে; বলল, গরমে কুকুর ঘুমিয়ে পড়বে, ভেড়া পাহারা দেবে না। কিন্তু মাষেত শুধু যে তার বিশ্বাসী বন্ধুটির জন্যে গরম বিছানা পাতল তাই নয়, পেট পুরে খাওয়াও। এর জন্যে কইবাগার আরো ভালো করে তার কাজ করবে। মাষেত তা নিজের চোখে দেখেছে। চালে চাপতেই কুকুরটা সানন্দে দাঁত দেখাল, আদর করে ঝাপটা মারল লেজের।

‘শুয়ে থাক কইবাগার, শুয়ে থাক,’ মাষেত তার ঘন, ঝাঁকড়া ভেজা লোমে হাত বুলিয়ে বলল। ‘শুধু একটু সরে শো, খড়গুলো ভেজা। হ্যাঁ, এইখানে।’

আর মাষেতও কুকুরের গায়ে গরম খড়ের মধ্যে শুয়ে পড়ল।

বাড়িটা থেকে কিছু দূরে অন্ধকারে মিটমিট করেছে লণ্ঠনের ফ্যাকাশে হলদে আলো। চুপ করে আছে ভেড়াগুলো, নিঝুম হয়ে আছে ঠাণ্ডা অন্ধকার রাতটায়।

পালটা ঘিরে টহল দিচ্ছে মা, জানে না যে আজ সে একা নয়। কল্পনাই করতে পারবে না কতগুলো চোখ আজ পালের দিকে নজর রেখেছে।

জমে যেতে শুরু করেছে মাষেত। কলারের ফাঁক দিয়ে চুইয়ে আসে বৃষ্টি। ঠাণ্ডা ফোঁটাগুলো গিয়ে ঠেকছে গায়ের চামড়ায়, বরফের মতো গড়িয়ে যাচ্ছে পিঠ বেয়ে। মাষেত কেঁপে কেঁপে ওঠে আর ভাবে, নিশ্চয় পেছনে নেকড়ে ওঁত পাতলে মা’র পিঠটাও এমনি ঠাণ্ডা ঠাণ্ডা লাগে।

কিন্তু আস্তে আস্তে বৃষ্টি থেমে এল। বাতাসে শুকিয়ে গেল কুকুরটার ভেজা লোম। ভেজা রইল শুধু মাষেতের পুরনো ওভারকোটটা। কইবাগারের বুকের তাপে হাত গরম করে নিল মাষেত। তাহলেও এমন জমে গেল যে ভেড়াগুলোর কাছে একপাল নেকড়ে দেখলেও সে চ্যাঁচাতে পারত না, নড়তেও পারত না।

বাতাস পড়ে আসায় খড়ের স্তূপটার খড়খড়ানি ক্রমেই থেমে আসছে। তারপর একেবারে থেমে গেল। রইল শুধু ঘুমন্ত বাবার মতো একটু শিসের শব্দ। এই প্রায় না শোনা শিসটা তার কাছে কখনো মনে হচ্ছে ঘুমন্ত কুকুরের খঁকুনি, কখনো-বা দূরের কোনো ভুখা নেকড়ের ডাক।

কালচে নীল আকাশে ফুটল ফিরোজা রঙের তারা। দ্রুত সেটা কাছিয়ে আসতে লাগল।

‘স্পুথনিক!’ চট করে ধরে ফেলল মাষেত, উল্লাসে চাপড় মারল কইবাগারের ঘাড়, ‘গাঁয়ের ছেলেরা সব ঘুমুচ্ছে, দেখতে পেল না। তুই আর আমিই প্রথম স্পুথনিক দেখলাম!’

উড়ে চলে গেল স্পুথনিক, অনেকক্ষণ চারিপাশটা যেন আলো হয়ে রইল। হয়তো সেটা আকাশে, হয়তো মাষেতের মনে। আনন্দের ফলে যে রাতও হয়ে ওঠে দিনের মতো ফরসা।

নানা কথায় মন ভেসে যাচ্ছে মাষেতের। হঠাৎ নিচু থেকে নরম, আহ্লাদী, কাঁপা কাঁপা একটা শব্দ ভেসে এল।

নিঃশ্বাস বন্ধ করল মাষেত।

‘ভ্যা-া-া!’ এবার আরো স্পষ্ট করে শোনা গেল সদ্য জন্মানো ভেড়ার বাচ্চার মিহি গলা। ওহ, লাফিয়ে উঠল মাষেত, চোঁচিয়ে উঠল!

চোখে আর ঘুম নেই, গায়ে ঠাণ্ডা নেই। প্রায় ডিগবাজি খেয়ে সে নড়বড়ে সরু মইটা বেয়ে নামল। একেবারে কাছেই, সদ্যোজাত ছানাটা যে কোথায় ডাকছে তা ধরতে এতটুকু অসুবিধা হল না।

‘মা, হয়েছে! হয়েছে!’ ঘুমন্ত ভেড়াগুলোর মধ্য দিয়ে ছুটতে ছুটতে চ্যাঁচাল মাষেত। মা যখন এসে পৌঁছল, ততক্ষণে মাষেত ভেজাভেজা কৌঁকড়া-চুলো বাচ্চাটাকে বুকের মধ্যে জড়িয়ে নিয়েছে। লষ্ঠনের আলায় ছানাটাকে লক্ষ করল মাষেত।

‘মা, এটারও কিন্তু শাদা লেজ!’ খুশি হয়ে উঠল মাষেত, ‘হয়তো শাদা-লেজের জ্ঞাতি।’

প্রসূতি ভেড়াটার কাছে এসে মা বলল মাষেতকে :

‘বাচ্চাটাকে গরমে নিয়ে যা, আর বাপকে ডাক। ভেড়াটাকে ঘরে নিয়ে যেতে হবে। মনে হচ্ছে আরো বাচ্চা হবে।’

আনন্দে চিৎকার করতে করতে মাষেত ছুটল ঘরে, ঘুম থেকে উঠে বাবাও ছুটলেন পালের দিকে। মাষেত লষ্ঠনের ফিতে বাড়িয়ে দিয়ে কাঁপা কাঁপা লম্বা ঠ্যাঙের ওপর দাঁড় করিয়ে দিল ছানাটাকে। জোরে ডেকে উঠল বাচ্চাটা, বিজয়গর্বে শাদা লেজটুকু একটু নাড়াল।

‘এবার তাহলে তিনটে শাদা-লেজো!’ মাষেতের খুশি আর ধরে না।

সকালের দিকে আরেকটা বাচ্চা দিল ভেড়াটা, শাদা-খুব, চাঁদ-কপালি, এরও লেজটা শাদা।

‘চারটে, চারটে শাদা-লেজো!’ আনন্দে লাফিয়ে বেড়াল মাষেত আর সারাদিন যত্রতত্র লিখে বেড়াল ‘৪’ সংখ্যাটা।

সেদিন অনেক ভেড়ারই বাচ্চা হল। জমজ জন্মেছিল এত যে আনন্দে মা পাহাড়প্রমাণ ‘বোরসাক’ ভাজল। কেকের মতোই এ পিঠে ভারি সুস্বাদু।

বাবা একেবারে পেট পুরে খেলেন, খুশির সুরে মাষেতকে বললেন :

‘তা এই-যে ছানাটাকে তুই ধরলি, এটা থেকেই নয় তোর টুপি করে দেব। দুটো বাচ্চাকে খাওয়ানো তোর মায়ের পক্ষে কঠিন হবে, দুধে কুলোবে না।’

মাষেত চুপ করে রইল, ভাব করল যেন কথাটা কানে যায়নি।

দিনদুই পরে এল ডাকপিয়ন মেয়েটি, দিদিমার চিঠি আর খবরের কাগজ এনেছিল সে। কাগজে মাষেতের মা আর বাবার ছবি। তাদের নাম দিয়েছে আলোকসুন্দর। পিয়ন মেয়েটিই তাই বলল। মাষেত অনুমান করল, আলোকসুন্দর বলেছে কারণ রাতে তারা আলো নিয়ে ঘোরে, নেকড়ে আসতে দেয় না।

মাষেত যখন খবরের কাগজে ছবিটা দেখছিল, বাপ তখন চিঠি লিখছিলেন কলখজ সভাপতিকে। লিখছিলেন তিনি ধীরে ধীরে, যেন পাহাড় বেয়ে উঠছে কাছিম,

অক্ষরগুলো হচ্ছিল বড় বড়, মোটা মোটা, যেন মুরগির ভেজা পায়ের দাগ। চিঠি লিখে সেটা পিয়ন মেয়েটির হাতে দিয়ে চলে গেলেন। পিয়ন মেয়েটির মন খুব ভালো, দুনিয়ার সবচাইতে সুন্দরী মেয়ে। চিঠিটা সে পড়ে শোনালা মাঝেতকে। ওদের দুজনেরই ভারি আনন্দ হল যে বাচ্চা দেবার মরশুমের প্রথম দিন মাঝেত কত সাহায্য করেছিল সেকথা জানাতেও বাবা ভোলেননি... ভারি ভালো এই পিয়ন মেয়েটি; নামটিও যে অমন নরম, সে-ও খামোকা নয়; আইগুল— শাদা ফুলটি।

* * *

শেষ পর্যন্ত শীত ফুরোল, বন্ধ হল হিমেল পাহাড়ি বাতাস। তুষারঢাকা পাহাড় থেকে নামা স্রোতগুলোর সঙ্গে ভেসে ভেসে আসে কত ফুল। নীল, লাল, হলদে, সবরকম। সবচেয়ে হাসিখুশি রোদভরা একটা দিনে আবার এল সভাপতি...

সবচেয়ে তুষার ঢাকা পাহাড়গুলোতেই ভেড়া চরান বাবা। এখান থেকে গোটা পালটাকে মনে হচ্ছিল যেন বসন্তের কচি ঘাসের উপর ছড়ানো একমুঠো নুড়ি।

ঘরদোর গোছগাছের কাজে লেগেছে মা, পয়লা মে'র পরবের জন্যে তৈরি হচ্ছে, মাঝেত সাহায্য করছে তাকে।

ঘরের পেছনে ঘোড়া রেখে এসে সভাপতি অভিনন্দন জানাল মাকে, করমর্দন করল মাঝেতের সঙ্গে। জিজ্ঞাসাবাদ করল কেমন কাজ চলছে, পাল কত বাড়ল...

জুনুসভ একদৃষ্টে চেয়েছিল মাঝেতের দিকে, লম্বা কালো দাড়িটায় হাত বুলোচ্ছিল। মোটেই বুড়ো নয় ও। লোকে বলে, দাড়ি রেখেছে কেবল ভারি ক্লি দেখাবার জন্যে। যখন ওকে সভাপতি করে, তখন ওর বয়স ছিল মাত্র কুড়ি। ভয় পেয়েছিল, এত অল্প বয়সীকে কেউ মানবে না। তাই দাড়ি রাখতে শুরু করে।

মাঝেতের সামনে দাঁড়িয়ে সভাপতি দাড়ি নেড়ে খোঁচা খোঁচা বিরাট ভুরুদুটো কুঁচকে গম্ভীর গলায় বলল :

‘তাহলে কমরেড মাঝেত তজ্জরবায়োভ, গুজব রটেছে যে তুই নাকি আবার পুরস্কার নিতে আপত্তি করেছিস, টুপি'র জন্যে ভেড়া কাটতে দিচ্ছিস না?’

প্রথমে মাঝেত ভেবেছিল বুঝি বকতে এসেছে। তারপর ব্যাপারটা বুঝে ঠিক বাপকে যা বলেছিল তাই বলল :

‘জ্যাস্ত বাচ্চা কেটে যে টুপি করা চলে না!’

‘সাবাস! চমৎকার মানুষ হবি! চমৎকার!’ আগের মতোই গম্ভীর গলায় বলল সভাপতি, ‘আয়, দুজনে মিলে মস্কোয় একটা চিঠি পাঠাই, টুপি করার জন্যে জীবন্ত ছানা কাটা যেন একেবারে নিষিদ্ধ করে দেয়।’

‘বেশ, লিখব!’ জ্বলজ্বল করে উঠল মাঝেত।

‘তারপর, এই নে ধর। এবার আমরা তোকে এমন একটা পুরস্কার দেব ঠিক করেছি যে আপত্তি করা অসম্ভব।’

জামার তল থেকে শেয়ালের লোমের একটা টুপি বার করে সভাপতি মাষেতকে দিল। চুড়োটা ফিরোজা রঙের।

দুই হাত বাড়িয়ে ছেলেটা টুপিটা এমনভাবে নিল যেন একটা ভারি ঠুনকো, হাওয়াই ফুলদানি ধরছে। তারপর বড় বড় চোখ মেলে তাকে ঘুরিয়ে-ফিরিয়ে দেখতে লাগল।

সত্যিই টুপিটা সোনালি বেড় দেওয়া একটা নীল ফুলদানির মতো। ফিরোজা রঙের নীল মখমলটা যেন সত্যিই সূর্যোদয়ের একটুকরো আকাশ। ফুঁয়ো ফুঁয়ো ফারটা বলক দিচ্ছে যেন জীবন্ত শেয়াল।

‘নে, এবার পরে দ্যাখ,’ এবার হেসে বলল সভাপতি, ‘এটা তুই খেটে রোজগার করেছিস!’

আর মা সে-সময় কেন জানি চোখের জল মুছতে লাগল। ভারি অদ্ভুত মা-টা। জানে না কখন কান্নার সময়, কখন আনন্দের।

মাষেত টুপির ভেতর টিউলিপ ফুলের মতো লাল রেশমি আস্তরটার দিকেও চাইল। মাথা থেকে খুলল বাপের পুরনো টুপিটা। হাঁটু দিয়ে চেপে ধরল ওটাকে। এখনো কাজ দেবে। তারপর সন্তর্পণে নতুন, ফুরফুরে টুপিটা পরল সগর্বে।

‘এবার আমার ঘোড়াটায় চড়ে ঘুড়ে বেড়া,’ বলল সভাপতি। ‘গিয়ে বাপকে দেখিয়ে আয়।’

এতটা বদান্যতা মাষেত সত্যিই আশা করেনি।


কিছুক্ষণ পরেই যেন বাতাসের তোড়ে একটা রোদে বলমল ফুরফুরে সোনালি ফুল উড়ে গেল সবুজ প্রান্তর বরাবর।

‘এমন টুপি পেলি কোথায়?’ মাষেত আসতেই অবাক হয়ে জিগ্যেস করলেন বাপ।

টুপিটা একটু বাঁকিয়ে সগর্বে বলল মাষেত : ‘নিজেই রোজগার করেছি!’

সত্যি, গাঁয়ের সমস্ত ছেলেদেরও মাষেত বুক ফুলিয়ে বলবে :

‘নিজের রোজগার!’



সার্কাসের মেয়ে

ভিক্টর দ্রাগুনস্কি



একবার আমরা গোটা ক্লাস গেলাম সার্কাসে। ভারি আনন্দ হল আমার, কেননা শিগগিরই আমার আট বছর পেরোবে, অথচ সার্কাসে গেছি কেবল একবার, তা-ও অনেকদিন আগে। আর সবচেয়ে বড় কথা, আলিয়োস্কার সবে ছয় বছর বয়স, কিন্তু সার্কাস দেখেছে তিন-তিনবার। কষ্ট হয় না? তারপর তো গোটা ক্লাসই আমরা এলাম সার্কাসে। ভাবলাম, ভাগ্যি এখন আমি বড় হয়েছি, যেমন করে দেখা দরকার সব দেখব। তখন আমি ছিলাম ছোট, সার্কাস কী তা ভালো বুঝিনি। সেবার যখন খেলা দেখাতে এসে একজন আরেকজনের মাথায় উঠে দাঁড়ায় তখন আমি হো হো করে হেসে উঠেছিলাম, ভেবেছিলাম এটা ওরা ইচ্ছে করে করছে, রগড়ের জন্যে, কেননা বাড়িতে তো আমি কখনো দেখিনি যে অমন বড় সড় সব লোকে এ-ওর ঘাড়ে ডিগবাজি খাচ্ছে। রাস্তাতেও দেখিনি। তাই একেবারে হো হো করে হেসে

উঠেছিলাম। মোটেই বুঝিনি যে খেলোয়াড়রা তাদের কসরত দেখাচ্ছে। তাছাড়া সেবার আমি সবচেয়ে বেশি করে দেখছিলাম অর্কেস্ট্রাটা, কীভাবে বাজাচ্ছে, কে ড্রামের কাছে, কে শিঙায়, কনডাক্টর ছড়ি দোলাচ্ছে, কিন্তু কেউ তার দিকে চেয়ে দেখছে না, নিজের মনেই বাজিয়ে চলেছে। সেটা ভারি ভালো লেগেছিল আমার, কিন্তু আমি যখন বাজিয়েদের দেখছিলাম, তখন ওদিকে খেলা দেখাচ্ছিল আর্টিস্টরা। কিন্তু আমি খেয়ালই করিনি, কত ভালো ভালো খেলা ফসকে গেল। তবে তখন তো আমি একেবারেই হাঁদা ছিলাম।

তা গোটা ক্লাসই আমরা এলাম সার্কাসে। ভারি ভালো লাগল যে সার্কাসটায় কেমন একটা অদ্ভুত গন্ধ, দেয়ালে জুলজুলে সব ছবি, চারিদিক আলায় আলো, মাঝখানে একটা চমৎকার গালিচা, সিলিঙটা ভয়ানক উঁচু, সেখানে নানা ধরনের ঝকমকে সব দোলনা। এই সময় বাজনা বেজে উঠল, সবাই তাড়াতাড়ি গিয়ে সিটে বসল, তারপর আইসক্রিম কিনে খেতে লাগল। হঠাৎ লাল পর্দার ওপাশ থেকে বেরিয়ে এল নানারকম সব লোক, চমৎকার তাদের সাজ, হলদে হলদে ডোরাকাটা লাল লাল সুট। পর্দার দুপাশে দাঁড়িয়ে গেল তারা, আর মাঝখান দিয়ে হেঁটে এল কালো সুট পরা তাদের ম্যানেজার। জোরে কী যেন সে বলল, তত বোঝা গেল না, সঙ্গে সঙ্গে বাজনা শুরু হয়ে গেল ঝাঁপতালে, আর খেলা দেখাতে ছুটে এল জাগলার। সে যা ব্যাপার! দশটা কি একশটা করে গোলা ছুড়ে দিয়ে সে লোফালুফি করল। তারপর একটা ডোরাকাটা বল নিয়ে খেলা শুরু হল... মাথা দিয়ে, চাঁদি দিয়ে, কপাল দিয়ে, পিঠ দিয়ে, গোড়ালি দিয়ে সে সেটাকে ঠেলা দেয় আর বলটা তার গোটা শরীর বেয়ে গড়াগড়ি করে, পড়ে না। ভারি সুন্দর খেলাটা। হঠাৎ জাগলার বলটা ছুড়ে দিল আমাদের দিকে, সঙ্গে সঙ্গে শুরু হয়ে গেল সত্যিকারের রগড়; কেননা বলটা লুফেছিলাম আমি, তারপর ছুড়ে দিলাম সেটা ভালেরকাকে, ভালেরকা মিশকাকে, মিশকা হঠাৎ বলা নেই, কওয়া নেই ছুড়ল কনডাক্টরকে লক্ষ্য করে, তবে কনডাক্টরের গায়ে লাগল না, লাগল ড্রামটায়। দুম! ড্রাম যে বাজাচ্ছিল, রেগে গিয়ে সে বলটা ছুড়ল ফের জাগলারের দিকে, কিন্তু পৌঁছল না, পড়ল গিয়ে সুন্দর খোঁপা করা এক মাসির মাথায়। ফলে খোঁপার দফা রফা। হেসে আমরা তখন মরি আর কি।

জাগলার পর্দার ওপারে চলে যাবার পরও আমরা অনেকক্ষণ শান্ত হতে পারিনি। সেই সময় গড়িয়ে নিয়ে আসা হল এক মস্ত নীল গোলা, আর যে লোকটা সব ঘোষণা করে সে মাঝখানে এগিয়ে এসে কী সব বলল, কিছুই বোঝা গেল না। ফের একটা ফুটির বাজনা শুরু হল অর্কেস্ট্রায়, তবে আগের মতো অত ঝাঁপতালে নয়।

হঠাৎ ছুটে এল একটা বাচ্চা মেয়ে। অত ছোট্ট আর সুন্দর মেয়ে আমি কখনো দেখিনি। একেবারে টলটলে নীল চোখ, লম্বা রোঁয়া। পরনে রূপোলি ফ্রক, হাওয়াই

রেনকোট, হাত দুখানা বেশ লম্বা, ডানার মতো দুলিয়ে মস্ত গোলাটার উপর লাফিয়ে উঠল। কিছুক্ষণ দাঁড়িয়ে রইল তার উপর, হঠাৎ ছুটতে লাগল, যেন গোলাটা থেকে লাফিয়ে নামতে চায়, আর গোলাটা ওদিকে ঘোরে, মনে হল গোলাটার উপর মেয়েটা যেন ছুটছে, আসলে কিন্তু গোলাটাই গড়াতে লাগল রঙ্গভূমি ঘিরে। এমন মেয়ে আমি কখনো দেখিনি। সবাই যেন কেমন মামুলি, এ কিন্তু কেমন যেন অন্যরকম। ছোট্ট ছোট্ট পা দুখানা দিয়ে গোলার উপর ছুটছে, যেন গোলা নয়, সমান মাঠ, আর নীল গোলাটা তাকে নিয়ে চলেছে সামনে, পেছনে, বাঁ-দিকে—যেদিকে খুশি চলে যাচ্ছে মেয়েটা আর ওভাবে যখন ছোট্টে, তখন খিলখিল করে হেসে ওঠে। মনে হয় যেন ভেসে যাচ্ছে, আর আমার মনে হল যেন মেয়েটা নিশ্চয় দুইমভা*, কেননা ভারি ও ছোট্ট, মিষ্টি, অন্যরকমের। এই সময় থামল মেয়েটি, কে যেন ওকে নানা রকমের ঘুঙুর দিল, হাতে-পায়ে সেগুলো পরে মেয়েটা ফের আস্তে আস্তে ঘুরতে লাগল গোলাটার উপর, যেন নাচছে। অর্কেস্ট্রাও তখন বাজনা ধরেছে আস্তে, বেশ শোনা যাচ্ছিল মেয়েটির লম্বা লম্বা হাতে সোনার ঘুঙুরগুলো কেমন মিহি আওয়াজ তুলেছে। সবটাই যেন একটা রূপকথার মতো। তখন আবার আলোটাও কমিয়ে দিয়েছিল, আর চারিদিকে মেয়েটা যেন ভেসে বেড়াল, জ্বলজ্বল করে উঠল, ঝুমঝুম করে চলল; ভারি আশ্চর্য লাগল, সারাজীবনে আমি এমনটি দেখিনি।

তারপর যখন আলো জ্বলে উঠল, সবাই হাততালি দিল, চ্যাঁচাতে লাগল ‘ব্রেভো!’, ‘ব্রেভো!’ আমিও চ্যাঁচালাম ‘ব্রেভো!’ আর মেয়েটি তার গোলাটা থেকে লাফিয়ে নেমে সামনে এগিয়ে এল আমাদের কাছাকাছি, তারপর হঠাৎ ছুটতে ছুটতে শূন্যে ডিগবাজি খেল, একবার, দুবার; ক্রমাগত ডিগবাজি খেয়ে গেল। মনে হল, এই রে, এই বুঝি রেলিঙে ধাক্কা লাগবে, তাই হঠাৎ ভারি ভয় হল আমার, লাফিয়ে উঠে দাঁড়ালাম, ইচ্ছে হল ছুটে যাই, গিয়ে ওকে ধরি যাতে ধাক্কা না খায়। হঠাৎ মেয়েটা একেবারে থেমে গেল যেন মাটিতে পৌঁতা, তারপর তার লম্বা লম্বা হাত দুটো ছড়িয়ে দিল, অর্কেস্ট্রা থেমে গেল, ওইভাবে দাঁড়িয়ে দাঁড়িয়ে হাসতে লাগল সে। সবাই প্রাণপণে হাততালি দিল, কেউ কেউ আবার পা দিয়েও শব্দ করতে লাগল। ঠিক এই সময়টায় মেয়েটা তাকাল আমার দিকে, আমি বেশ দেখতে পেলাম যে ও দেখতে পেয়েছে আমি ওকে দেখছি, আর আমিও দেখতে পাচ্ছি ও আমাকে দেখছে, আমার দিকে হাত নেড়ে হাসল। কেবল আমার দিকেই হাত নেড়ে হেসেছিল মেয়েটা। ফের ইচ্ছে হল ছুটে যাই, হাত বাড়িয়ে দিলাম ওর দিকে। হঠাৎ আমাদের সবার দিকে হাওয়াই চুমু ছুড়ে দিয়ে ছুটে চলে গেল লাল পর্দার ওপাশে, খেলা দেখিয়ে সমস্ত খেলোয়াড়ই যেখানে চলে যায়। তারপর মঞ্চের এল একটা ক্লাউন, হাতে মোরগ, শুরু করল হাঁচতে আর

* ডেনিস সাহিত্যিক হ্যান্স অ্যান্ডারসনের একটি চরিত্র।

হোঁচট খেতে, কিন্তু তাতে একদম মন লাগল না। সারা সময়টা আমি কেবল গোলার উপর মেয়েটির কথা ভাবলাম, কী আশ্চর্য মেয়ে, কেমনভাবে হাত নাড়ল আমার দিকে, হাসল, আর কোনো কিছু দেখবার ইচ্ছে হচ্ছিল না আমার। উল্টো বরং জোর করে চোখ বন্ধ করে রাখলাম যাতে ওই লাল-নেকো বোকা ক্লাউনটাকে দেখতে না হয়, কেননা মেয়েটার ছবিটা ও নষ্ট করে দিচ্ছিল, তখনো কেবলি আমার চোখে ভাসছিল নীল গোলার উপর মেয়েটা।

তারপর ইন্টারভ্যাল হল, সবাই ছুটল ব্যুফেতে সিরাপ খেতে, আমি কিন্তু আস্তে আস্তে নিচে নেমে এলাম, গিয়ে দাঁড়ালাম সেই পর্দাটার কাছে, যেখান থেকে সব খেলোয়াড়রা আসে। ইচ্ছে হচ্ছিল আরেকবার মেয়েটাকে দেখি, তাই পর্দাটার কাছে দাঁড়িয়ে চেয়ে রইলাম, হয়তো কখনো বেরিয়ে আসবে। কিন্তু বেরিয়ে এল না।

ইন্টারভ্যালের পর সিংহের খেলা, মোটেই ভালো লাগল না, কেননা যে খেলা দেখাচ্ছিল, সে কেবলি সিংহগুলোর লেজ ধরে টানছিল, যেন সিংহ নয়, নিজীব বেড়াল। সিংহগুলোকে এ-টুল থেকে অন্য টুলে বসাচ্ছিল সে, নয়ত মেঝের উপর সারি সারি শুইয়ে তাদের উপর দিয়ে এমনভাবে হেঁটে গেল যেন ওগুলো সিংহ নয়, গালিচা, আর সিংহগুলোরও মুখের ভাব এমন বেজার, যেন বলতে চায় একটু শান্তিতে শুয়ে থাকতেও দিচ্ছে না। মোটেই মজার কিছু নয়, কেননা সিংহের উচিত ধু-ধু ঘেসো মাঠে বাইসন শিকার করা, ভয়ঙ্কর তার গর্জনে চারদিক গমগম করা, লোকজন কাঁপতে থাকবে, আর এ যা দেখাচ্ছে এ যেন সিংহ নয়, কী যে তা আমি নিজেও বুঝছি না।

যখন শেষ হয়ে গেল, বাড়ি যাচ্ছি তখনও কেবলি মেয়েটার কথা ভাবলাম।

সন্ধ্যায় বাবা জিগ্যেস করলেন :

‘তা, কেমন লাগল সার্কাস?’

আমি বললাম :

‘বাবা জানো, সার্কাসে একটা ছোট্ট মেয়ে আছে। নীল গোলার উপর সে নাচে। এমন চমৎকার, সবচেয়ে সেরা। আমার দিকে চেয়ে হাত নেড়ে হেসেছিল। শুধু আমাকে, সত্যি বলছি। জানো বাবা, পরের রবিবারে সার্কাসে চলো, আমি ওকে দেখাব।’

বাবা বললেন :

‘নিশ্চয় যাব। আমি সার্কাসের ভক্ত।’

আর মা আমাদের দুজনের দিকে এমনভাবে তাকালেন যেন এই প্রথম দেখছেন।

... শুরু হল লম্বাটে এক সপ্তাহ, আমি খাই দাই, পড়াশুনা করি, ঘুম থেকে উঠি, শুতে যাই, খেলি, এমনকি একবার মারামারিও করলাম, তাহলেও কেবলি ভাবতাম, কবে রবিবার আসবে, বাবার সঙ্গে সার্কাসে যাব, বাবা হয়তো মেয়েটাকে নেমস্তন্ন

করবে আমাদের বাড়িতে, আমি ওকে আমার খেলনা পিস্তলটা দিয়ে দেব, রাশি রাশি পাল-তোলা জাহাজ আঁকব।

কিন্তু রবিবারে বাবা যেতে পারলেন না। বন্ধুবান্ধবেরা এসেছিল তাঁর কাছে, কী সব নকশা-টকশা ঘাঁটাঘাঁটি করে তারা চেষ্টা, সিগারেট টানল, চা খেল, বসে রইল অনেকক্ষণ, তারপর মায়ের মাথা ধরল।

বাবা বলল :

‘পরের রবিবার, আমার ইজ্জতের কসম।’

আমিও পরের রবিবারের জন্য এমনি মুখিয়ে ছিলাম যে টেরই পেলাম না কী করে আরো এক সপ্তাহ কেটে গেল। বাবাও কথা রাখলেন, আমাকে নিয়ে সার্কাসে গেলেন, টিকিট কিনলেন দ্বিতীয় সারিতে। এত কাছে বসতে পেরেছি দেখে ভারি আনন্দ হল আমার। খেলা শুরু হল, আমিও পথ চেয়ে বসে রইলাম কখন গোলার উপরকার মেয়েটি আসে। কিন্তু যে লোকটা প্রোগ্রাম ঘোষণা করে, কেবলি সে অন্য খেলোয়াড়দের কথা বলে গেল, তারা এল-গেল, নানারকম কসরত দেখাল, কিন্তু মেয়েটির দেখা নেই। অধৈর্যে আমি স্রেফ কাঁপতে লাগলাম, ভারি ইচ্ছে হচ্ছিল যে বাবা দেখুক তার রূপোলি সাজ আর হাওয়াই রেনকোটে কী আশ্চর্য দেখায় তাকে, নীল গোলাটার উপর সে ছোট্ট কেমন খাসা। আর প্রত্যেকবার যখনই ঘোষক আসে আমি ফিসফিসিয়ে বাবাকে বলি :

‘এইবার ও আসবে।’

কিন্তু লোকটা যেন ইচ্ছে করেই অন্য কারো নাম করছিল আর লোকটার ওপর আমার বিদ্বেষই ধরে গেল আর কেবলি বাবাকে বলছিলাম :

‘ধূর! ধূর! ওঁছার ওঁছা। তেমনটি নয়।’

আর আমার দিকে না তাকিয়েই বাবা বলছিলেন :

‘গোলমাল করিস নে। এটা দারুণ খেলা।’

ভাবলাম, এই খেলাটা যদি বাবার এত ভালো লাগে, তাহলে বোঝাই যাচ্ছে সার্কাসের ব্যাপার বাবা তেমন বোঝেন না। গোলার উপর মেয়েটিকে যখন দেখবেন তখন দেখব কী বলেন। নিশ্চয় সিট ছেড়ে লাফিয়ে উঠবেন দুই মিটার...

কিন্তু এই সময় ঘোষণার লোকটা এসে তার বোবা-কাল গলায় চ্যাঁচাল :

‘ইন্টারভ্যাল...’

নিজের কানকেই আমার বিশ্বাস হচ্ছিল না! ইন্টারভ্যাল? কেন? পরের অংশটায় তো কেবল সিংহের খেলা! কোথায় গেল আমার সেই মেয়েটি? কোথায় সে? খেলা দেখাল না কেন? অসুখ হয়নি তো? হয়তো পড়ে গিয়েছিল একবার, মাথায় চোট লেগেছে?

বললাম :

‘বাবা, চলো গিয়ে জেনে আসি গোলার উপরকার মেয়েটা কোথায়।’

বাবা বললেন :

‘ঠিক, ঠিক কোথায় তোর সেই মেয়ে? দেখছি না তো। চল গিয়ে একটা প্রোগ্রাম কিনে দেখি!...’

বাবার মেজাজ তখন ভারি ভালো। চারিপাশে তাকিয়ে-টাকিয়ে হেসে বললেন :

‘আহ, ভারি ভালো লাগে আমার সার্কাস! এমনকি এই গন্ধটায়ই মাথা ভাঁট্টা করে...’

আমরা বারান্দায় গেলাম। লোকের ঠেসাঠেসি সেখানে, চকোলেট, বিস্কুট সব বিক্রি হচ্ছে, দেয়ালের ফটোগ্রাফগুলোয় নানা বাঘের মুখ। আমরা খানিকটা ঘোরাঘুরি করে শেষ পর্যন্ত প্রোগ্রাম-বেচিয়ার দেখা পেলাম। বাবা মেয়েটির কাছ থেকে একটি প্রোগ্রাম কিনলেন। আমি আর পারলাম না, জিগেস করলাম :

‘বলুন-না, গোলার উপর মেয়েটি খেলা দেখাবে কখন?’

ও বলল :

‘কোন মেয়ে?’

বাবা বললেন :

‘প্রোগ্রামে লেখা আছে গোলার উপর খেলা দেখায় ভরোনৎসভা। কোথায় সে?’

আমি চুপ করে দাঁড়িয়ে রইলাম।

প্রোগ্রাম-বেচিয়ে মেয়েটি বলল :

‘ও, তানেককার কথা বলছেন? চলে গেছে সে, চলে গেছে। এত দেরি করলেন কেন?’

আমি চুপ করে দাঁড়িয়ে রইলাম।

বাবা বললেন :

‘দু’ সপ্তাহ ধরে আমরা আসব আসব করছি। তানিয়া ভরোনৎসভার খেলা দেখব ভেবেছিলাম, সে-ই নেই।’

মেয়েটি বলল :

‘হ্যাঁ, চলে গেছে ও... মা-বাপের সঙ্গে... ওর মা-বাপেরা হল সেই ‘ব্রোঞ্জের লোক’, নাম শুনেছেন নিশ্চয়? ভারি আফশোসের কথা... মাত্র গতকাল চলে গেছে।’

আমি বললাম :

‘দেখলে তো বাবা...’

বাবা বললেন :

‘আমি তো আর জানতাম না যে ও চলে যাবে। কী আফশোস... ইস!... তা কী আর করা যাবে, উপায় নেই...’

প্রোথ্রাম-বেচিয়েকে আমি শুধালাম :

‘একেবারে চলেই গেছে?’

ও বলল :

‘চলেই গেছে।’

আমি বললাম :

‘কোথায়, জানেন?’

ও বলল :

‘ভ্লাদিভস্তকে।’

ওরে বাবা! অনেক দূর। ভ্লাদিভস্তক। আমি জানি জায়গাটা মানচিত্রের একেবারে শেষ কোণে, মস্কো থেকে ডান দিকে।

আমি বললাম :

‘অনেক দূর।’

হঠাৎ ও ব্যস্ত-সমস্ত হয়ে উঠল :

‘যান যান, নিজেদের জায়গায় যান, আলো নিভিয়ে দিচ্ছি।’

বাবাও বললেন :

‘চল, চল দেনিকা, এবার সিংহের খেলা। কেশর-ফোলা— ডাক ছাড়বে কী ভয়ঙ্কর! চল, ছুটি!’

আমি বললাম :

‘বাড়ি চলো বাবা।’

উনি বললেন :

‘তা যখন তুই...’

প্রোথ্রাম-বেচিয়ে মেয়েটা হেসে উঠল। আমরা কিন্তু সোজা ওভারকোট রাখার জায়গায় গিয়ে, ওভারকোট পরে বেরিয়ে এলাম সার্কাস থেকে। বুলভার দিয়ে হাঁটছিলাম আমরা, হাঁটলাম অনেকক্ষণ, তারপর আমি বললাম :

‘ভ্লাদিভস্তক হল ম্যাপের একেবারে শেষ কোণে। ট্রেনে করে গেলে একেবারে পুরো এক মাস লেগে যাবে।...’

বাবা চুপ করে রইলেন, বোঝা গেল আমার কথা শুনছেন না। আরো খানিকটা হাঁটলাম আমরা। হঠাৎ এরোপ্লেনের কথা মনে পড়ে গেল আমার। বললাম :

‘কিন্তু “তু-১০৪” এরোপ্লেন তিন ঘণ্টায় পৌঁছে যাবে!’

বাবা কিন্তু এবারেও জবাব দিলেন না। চুপ করে হাঁটছিলেন বাবা, জোরে হাত ঝুঁকছিলেন আমার। যখন গর্কি স্ট্রিটে পড়লাম উনি বললেন :

‘চল আইসক্রিম কাফেতে যাই। দুপ্রেট করে আইসক্রিম গেলা যাবে, কী বলিস?’

আমি বললাম :

‘ইচ্ছে করছে না বাবা ।’

উনি বললেন :

‘ওখানে এক ধরনের জল বিক্রি করে, নাম তার ‘কাথেতিনস্কায়া’ । এর চেয়ে ভালো জল আমি দুনিয়ার কোথাও খাইনি ।’

আমি বললাম :

‘ইচ্ছে হচ্ছে না বাবা ।’

উনি আর আমার বোঝাবার চেষ্টা করলেন না । আমার হাতটা জোরে চেপে ধরে পা বাড়ালেন । হাতে বেশ লাগছিল । তাড়াতাড়ি হাঁটতে লাগলেন বাবা, আমি প্রায় তাল রাখতে পারছিলাম না । কেন এমন তাড়াতাড়ি হাঁটছেন? কেন কথা বলছেন না আমার সঙ্গে? ইচ্ছে হল ওঁর দিকে একবার চেয়ে দেখি । মাথা বাড়িয়ে দেখলাম, মুখটা ওঁর ভারি গম্ভীর আর থমথমে ।



ছেলেটার জন্য রঙ

ভ্লাদিমির জেলেজনিকভ



ছেলেটা বিমানে বসে একদৃষ্টে চেয়ে দেখছিল জানলা দিয়ে ।

সূর্যের রোদে চোখ ধাঁধিয়ে যায়, ছেলেটা কিন্তু তবু দেখছে ।

মা বললেন :

‘শোন বাছা, পর্দাটা টেনে দে, নয়ত পাশের চেয়ারটায় বস । এখানটা রোদুরে বড় তেতে উঠেছে, তোর পক্ষে খারাপ ।’

ক্ষুব্ধ চোখে ছেলেটি চাইল মায়ের দিকে । রোদে বসে থাকা যে ওর পক্ষে খারাপ সেটা ও চায় না যে-কারণে কানে যাক । বলল, ‘এখানেই বেশ আছি, রোদে একটুও অসুবিধা হচ্ছে না ।’

‘বেশ,’ বললেন মা, ‘বসে থাক, আমি অন্য জায়গায় বসছি ।’

অন্য দিকটায় গিয়ে বসলেন তিনি । ছেলেটা জানলা দিয়ে দেখেই চলল ।

কেবিন থেকে বেরিয়ে এল পাইলট। সেই কম্যান্ডার। বসল ছেলেটার পাশে।

চেয়ে দেখল ছেলেটা। এবার তার পাশে বসেছে আসল একটা লোক। ইচ্ছে হল তার সঙ্গে একটু কথা কয়। পাইলট তা টের পেল। তার ক্লান্ত রুক্ষ মুখটা একটু নরম হয়ে উঠল, অভ্যাসবশেই সে জিগ্যেস করল :

‘ভালো লাগছে?’

‘খুব ভালো,’ বলল ছেলেটা।

‘তুই-ও পাইলট হবার স্বপ্ন দেখছিস তো?’

একটু বিব্রত হল ছেলেটা। আদৌ পাইলট হবার কথা সে ভাবে না, কেননা ওর ফুসফুস খারাপ, জানত যে তার জন্যে ওর পাইলট হওয়া সম্ভব হবে না। মিথ্যেও সে বলতে পারে না, আবার সত্যি কথা বলতেও মন চাইছে না।

‘আমি আঁকতে ভালোবাসি’, জবাব দিল ছেলেটা। ‘ওই দেখুন, মেঘগুলো এক পাল শাদা হাতির মতো। সামনেরটার ঠুঁড়ের পাশে দাঁত। ওটা পালের গোদা। আর ওইটে হল তিমি। চমৎকার লেজটা!’

ছেলেটা চেয়ে দেখল পাইলট হাসছে। দেখে সে চুপ করে গেল। ভারি তার লজ্জা হল যে বয়স্ক এক লোক, তাতে আবার পাইলট, তাকে কিনা সে কী সব মেঘে-গড়া হাতি, তিমির কথা শোনাচ্ছে।

আবার জানলায় চোখ রাখল সে।

পাইলট তার কাঁধে নাড়া দিল।

‘সাবাস তোর কল্পনা। সত্যিই মেঘগুলো একেবারে হাতির মতো! চমৎকার ধরেছিস।’

‘মষ্কোয় মা আমায় রঙ কিনে দেবে, সত্যিকারের শিল্পীরা যেসব রঙ দিয়ে আঁকে, আমিও আঁকব,’ বলল ছেলেটা, ‘সত্যি বলছি। দেখুন দেখুন মাটিটা— দাবার ঘরের মতো।’

মাটির দিকে তাকিয়ে দেখল পাইলট। কতবার সে উড়েছে, অথচ এসব কিছুই দেখেনি। একটু যেন ক্ষোভই হল তার: এই ধরনের কত হাতির পাশ দিয়ে সে কতবার উড়ে গেছে, অথচ কিছুই লক্ষ করেনি। রোগা ছেলেটার দিকে সে চাইল প্রশংসার দৃষ্টিতে।

আকাশ তার কাছে বরাবরই কেবল একটা কাজের জায়গা। ওড়া চলবে কি চলবে না, কেবল এই দিক থেকেই সে আকাশকে দেখে : নিচু মেঘলাটে— নামার পক্ষে খারাপ; উঁচুতে মেঘ— ওড়ার পক্ষে তোফা; বজ্রগর্ভ মেঘ— বিপদ। তাছাড়া, শত্রুর বিমান বিধ্বংসী কামানের গোলা থেকে ওঠা মেঘও সে দেখেছে কম নয়— বজ্রমেঘের চেয়েও সেটা বিপজ্জনক।

আর মাটিটা তার কাছে কেবল অবতরণের জায়গা, পরের বার ওড়ার আগে পর্যন্ত যেখানে বিশ্রাম নেওয়া যাবে খানিকটা।

এরপর পাইলটের ডাক পড়ল কেবিনে, চলে গেল সে।

আর কয়েক মিনিট পরেই ছেলেটা দেখল যে সামনের দিক থেকে ছুটে আসছে একটা বিদ্যুৎ ঝলকানো সিসে-রঙা মেঘ।

মা ফের এসে বসলেন ছেলের পাশে। হখন তাঁদের কাছ দিয়ে দ্বিতীয় পাইলট যাচ্ছিল, মা জিগ্যেস করলেন :

‘ভয়ের কিছু নেই? বজ্রভরা মেঘ তো?’

পাইলট বলল, ‘মস্কো থেকে জানিয়েছে যে বজ্রমেঘটাকে আমরা এড়িয়ে যেতে পারি উত্তর দিক দিয়ে।’

এর মধ্যে বিমানের ভেতরটা হঠাৎ অন্ধকার হয়ে এল। যাত্রীরা একদৃষ্টে চেয়ে দেখছিল মেঘের দিকে, এগিয়ে আসছে তা বিমানের দিকে। অস্থির হয়ে সবাই কথা কইতে লাগল নিজেদের মধ্যে।

বিমান বাঁক নিয়ে সরে গেল মেঘটা থেকে। কেবলি ডান দিকে বেঁকতে হচ্ছিল ওটাকে, কেননা মেঘ ঝেঁপে আসছিল দুদিক থেকে। হঠাৎ অলক্ষ্যে বিমানটা আটকা পড়ে গেল বজ্রের বেষ্টিত। অল্প একটু জায়গার মধ্যে পাক খেতে লাগল বিমানটা আর ক্রমেই চেপে আসতে লাগল মেঘ।

ছেলেটার নজরে পড়ল যে সামনের সিট থেকে দুজন লোক উঠে চলে গেল লেজের দিকটায়। সবাই কেন জানি উদ্ভিগ্ন দৃষ্টিতে তাকিয়ে দেখতে লাগল ওদের। তারপর আরও দুজন উঠে একইভাবে চলে গেল পেছনে।

কেবিন থেকে বেরিয়ে এল কম্যান্ডার পাইলট। ফাঁকা সিটগুলোর দিকে তাকিয়ে সে জোরে বলে উঠল :

‘অনুরোধ করছি, যাত্রীরা এক্ষুনি এসে নিজের জায়গায় বসুন। ব্যালাপ্স রাখা বিমানের পক্ষে কঠিন হচ্ছে।’ লোকগুলোর ভীর্ণতায় বিচ্ছিরি লাগছিল তার, বিপদের প্রথম সঙ্কেতেই এরা ছুটে যায় লেজের দিকে, ভাবে যেন তাতে বেঁচে যাবে।

‘আপনার হুকুম ঠিক বুঝতে পারছি না,’ যারা উঠে গিয়েছিল তাদের একজন বলল, ‘যেখানেই বসি-না কেন, কী এসে যায়?’

‘ওসব কথা রেখে নিজের জায়গায় বসুন,’ জবাব দিল পাইলট।

মুখখানা ওর হয়ে উঠেছে ফ্রুদ্ধ আর রুদ্ধ। নিজের নিজের জায়গায় লোকগুলো না ফেরা পর্যন্ত সে নড়ল না। এই সময়টায় মুহূর্তের জন্যে তার চোখাচোখি হয়েছিল ছেলেটার সঙ্গে। হঠাৎ এবং এমন একটা বিপজ্জনক মুহূর্তের পক্ষে বড় বেশি গুরুত্বহীনতায় বৈমানিকের মনে হল, ‘আচ্ছা, এই বজ্রমেঘটা দেখতে কিসের মতো?’

উপরে উঠতে লাগল বিমান। প্রচণ্ড গুঞ্জন করতে লাগল ইঞ্জিন, বাতাসের ঝাপটায় থরথর করে কাঁপতে লাগল জয়েন্টগুলো, প্রায়ই এয়ারহোলে পড়ছিল বিমানটা, তাহলেও জেদ করে উপরে উঠতে লাগল : মেঘের উপরে উঠে পরিষ্কার উঁচু আকাশে থেকে বজ্রপাতটা শেষ না হওয়া পর্যন্ত অপেক্ষা করবে। পুরনো মডেলের এই বিমানের উঁচুতে ওঠা সহজ ছিল না, কিন্তু পাইলট শেষ পর্যন্ত ওঠাল।

চুপ করে ছিল সমস্ত যাত্রী, অনেকেই জানালার পর্দা টেনে দিল যাতে ভয়ঙ্কর কালো মেঘটাকে দেখতে না হয়। একলা শুধু ছেলেটাই চেয়ে রইল জানালা দিয়ে। এই উদ্দাম মোহনীয় রূপটা তার ভালো লাগছিল। এই যে ভয়ঙ্কর কৃষ্ণতার উপর দিয়ে তারা উড়ে চলেছে, বজ্রগর্ভ আকাশের সে কৃষ্ণতা ভেদ করে আর কিছুই দেখা যাচ্ছিল না।

নিচে, বিমানের তলে কেবলি সব ঝলসানি আর গর্জন, তার রেশ এসে পৌছেছে বিমানের ভেতরে। ওই মেঘগুলোর তলে কোথায় যেন মস্কো। হঠাৎ বিমানটা নাক নিচু করে তীরবেগে নিচে নামতে লাগল। তেল ফুরিয়ে গিয়েছিল, পাইলট তাই ঠিক করল বেগে নিচে নামবে, কেননা বজ্রমেঘের ভেতর দিয়ে উড়ে যাওয়া সম্ভব কেবল চূড়ান্ত গতিবেগে।

পরের মুহূর্তেই কী যেন বিদীর্ণ হতে শুরু করল, চোখ ঝলসে ঘা দিতে লাগল একেবারে জানলায়, মড়মড় করতে লাগল বিমানটা।

এটা চলল মিনিট পাঁচেক, হয়তো আরো কম, তারপর হঠাৎ একেবারে কাছেই দেখা গেল মাটি, কংক্রিট রান-ওয়ের উপর ছুটতে লাগল বিমান।

প্রচণ্ড বৃষ্টি হচ্ছিল। যাত্রীরা গাড়ির অপেক্ষা না করেই ছুটল এয়ারপোর্টের দালানটার দিকে। সবচেয়ে শেষে ছুটল পাইলট। লোকগুলোর সঙ্গ ছাড়তে চাইছিল না সে, এইমাত্র এদের সঙ্গেই একটা মহাবিপদ কাটিয়ে এসেছে সে, তাই তক্ষুণি বিদায় নিতে ইচ্ছে হচ্ছিল না।

‘আপনারা এখন কোথায় যাবেন?’ ছেলেটার মাকে জিগ্যেস করল সে।

‘আমাদের দরকার সিস্ফেরোপোলে যাবার প্লেন। ঘণ্টা দুয়েক পরে ছাড়ার কথা। জানি না ছাড়বে কিনা।’

‘ছাড়বে বইকি,’ জবাব দিল পাইলট, ‘ঘণ্টা দুয়েকের মধ্যেই এই বজ্রমেঘটা কেটে যাবে। তাছাড়া ‘তু’ বিমানগুলোর পক্ষে নিচু মেঘ ভয়ের কিছু নয়।’

‘দুই ঘণ্টা?’ জিগ্যেস করল ছেলেটা, ‘তাহলে হয়তো রঙ কেনার সময় হবে?’

‘কীরকম আবহাওয়া দেখেছিস?’ মা বললেন, ‘বৃষ্টি পড়ছে, ঠাণ্ডা লাগতে পারে তোর। রঙ কিনব ফেরার পথে।’

কিছুই বলল না ছেলেটা।

‘তাহলে কুশল হোক!’ ছেলেটাকে বলল পাইলট, ‘পরিচয় হয়ে খুব আনন্দ হল।’
মায়েতে ছেলেতে যখন ‘তু-১০৪’ বিমানে বসার জন্য লাইন দিয়েছে, ছেলেটা যখন রঙের কথা ভুলেই গেছে, অধীর হয়ে উঠেছে সিঁড়িতে ওঠার জন্যে, তখন হঠাৎ সামনে এসে দাঁড়াল পাইলট। পোশাকটা তার তখনো ভেজা, বদলাবার সময় পায়নি।

এক মুহূর্ত চুপ করে রইল সে। ছেলেটা বুঝতে পারল না হঠাৎ কোথা থেকে এল পাইলট, কিন্তু টের পেল কিছু একটা ব্যাপার আছে।

‘এই নে তোর রঙ। পুরো সেট। লাল, নীল, গোলাপি— সবই আছে।’ একটা লম্বা কাঠের বাস্ক এগিয়ে দিল পাইলট, ‘নে, নে, ছবি আঁকিস!’


ভয়ে ভয়ে বাস্কটা নিল ছেলেটা, চেয়ে দেখল মায়ের দিকে। যারা লাইনে দাঁড়িয়েছিল তারাও চেয়ে দেখল।

‘কেন অত কষ্ট করতে গেলেন,’ বলে টাকা বার করলেন মা, ‘অমন হয়রানির পর...’

‘কথা যখন দিয়েছেন, তখন দিতে হবে...’ বলে চুপ করে গেল বৈমানিক।

মুখটা তার ক্রমে ক্রমে হয়ে উঠল একেবারে বিমর্ষ আর রুক্ষ। আনাড়ির মতো টাকাটা নিয়ে পকেটে গুঁজল।

তারপর কেমন কুঁজো হয়ে ঢ্যাঙা দেহে ফিরে গেল এয়ারপোর্টে। চলে গেল পাইলট আর রঙের বাস্কটা বুকে চেপে প্লেনে উঠল ছেলেটা, এবার একশ দশ মিনিটে সে পাড়ি দেবে হাজার কিলোমিটার পথ, জানবে উঁচু কী জিনিস, আধুনিক গতি কী ব্যাপার। আর উপর থেকে তাকিয়ে দেখবে মাটি, দেখবে তাকে কিছু একটা নতুন দৃষ্টিতে।



বৃষ্টি আর নক্ষত্র ভাদিন্দ্ৰ ক্রাপিভিন



বৃষ্টি চলছিল অনেকক্ষণ ।

কালো পিচের উপর আলোর হলদে ছোপগুলো যেন কড়াইয়ের উপর ডিমের কুসুম ।

গাছপালা, ঘরবাড়ি, রেলিঙ, খবরের কাগজের কিওস্ক আর ছোট্ট স্কোয়ারটার গেটের সামনে প্ল্যাস্টার অব প্যারিসের হর্ন-বাজিয়ে মূর্তিগুলো এমন আবহাওয়ায় অভ্যস্ত হয়ে গেছে । আগেই ভিজে একেবারে জবজবে হয়ে গেছে তারা, এখন আর কিছুতেই এসে-যায় না । তাই সবাই নিজের নিজের কাজ করে চলল : শাখা দুলিয়ে চলল গাছেরা, মস্কো থেকে আসা সার্কাসের ভেজা পোস্তার নিয়ে দাঁড়িয়ে থাকল রেলিঙ, বাড়িগুলো তাদের সদর দরজা খোলে আর বন্ধ করে, নানা রঙের আলোয় ঝলমল করে চলল জানালাগুলো, আর হর্ন-বাজিয়েরা শিঙায় মুখ দিয়ে তৈরি হয়েই থাকল, দরকার পড়লে ভৌঁদেবে ।

শুধু পত্রিকার কিওকগুলো কিছুই করল না। আগেই সব বন্ধ হয়ে গিয়েছিল, এখন শুধু ক্ষুণ্ণভাবে আবছা ঝলক দিচ্ছে তাদের কাচগুলো।

ট্রামগাড়িগুলো কিন্তু খুশিই হল বৃষ্টিতে। ভেজা ভেজা ওয়াগনের লাল গাগুলো এমন ঝকঝক করছিল যেন সদ্য তৈরি হয়ে এসেছে কারখানা থেকে। শহরে তারা ছুটছিল যেন বেশি সবেগে, সোল্লাস ঘণ্টি দিচ্ছিল আর তাদের প্রতিটি জোড়ের কাছেই ছিটোচ্ছিল সবজে সবজে ভেজা ফুলকি। ঠিক ফুলকি নয়, সবুজ আগুনের ফালি; ছিটিয়ে পড়ছিল তা ট্রামের ভেজা ছাদে, চিড়বিড় করছিল চকচকে পিচের উপর।

হর্ন-বাজিয়ে প্রহরীওয়ালা ছোট স্কোয়ারটিতে এল তিন ওয়াগনের এক ট্রামগাড়ি। অল্প যাত্রী, শেষ ওয়াগনের কন্ডাক্টর মেয়েটি বুকে থুতনি ঠেকিয়ে ঝিমোচ্ছিল। ভারি পাকা কন্ডাক্টর সে, ঝিমোলেও মুখখানার চেহারা কড়া। দূর থেকে মনে হয় যেন নিতান্ত বুকের উপর বুলন্ত নীল টিকিটের বাঙিল আর ঝকঝকে বোল্ট-ওয়ালা ব্যাগটার দিকে চেয়ে আছে।

গাড়িতে একটা ছেলে ঢুকতেই সজাগ হয়ে উঠল সে।

‘টিকিট নিয়ে যা, জলদি...’

ছেলেটা তার কুর্তার পকেটে হাত ঢুকাল। তারপর প্যান্টের পকেট খোঁজাখুঁজি করল। কিন্তু তিনটে কোপেক না পেয়ে চুপচাপ নেমে পড়ার জন্যে ঘুরে দাঁড়াল।

‘দাঁড়া, বলছি।’

এখন একেবারেই ঘুম কেটে গেছে কন্ডাক্টরের। ছেলেটার দিকে চেয়ে সে বেশ বুঝল যে ছেলেটা নিশ্চয়ই বৃষ্টিতে অনেক হেঁটেছে। সপসপ করছে মাথার চুল, ঘাড়ে সঁটে গেছে পাট হয়ে। বিন্দু বিন্দু জল গড়িয়ে আসছে তা থেকে, জলে ফেঁপে ওঠা কুর্তটার কলার বেয়ে নেমে যাচ্ছে। জুতোজোড়াও ছপছপ করছে নিশ্চয়।

‘দাঁড়া বলছি,’ চৈঁচিয়ে ডাকল কন্ডাক্টর, ‘বড় যে রাগ দেখছি... এমন রাতে যাবি কোথায়?’

‘সার্কাস পর্যন্ত,’ বলে ফিরল ছেলেটি। কিছুতেই তার আর এসে-যায় না। গাড়ি সার্কাস পর্যন্ত যায় কিনা তা-ও সে জানে না সঠিক।

কন্ডাক্টর মেয়েটি টিকিট ছিঁড়ে দিল একটা।

‘নে, টিকিট চেকার আসতে পারে...’

ভেজা আঙুলে টিকিট নিল ছেলেটা। ধন্যবাদটুকুও দিল না। বোধহয় মনে ছিল না। হয়তো-বা ইচ্ছে করেই। দাঁড়িয়ে দাঁড়িয়ে চোখ কুঁচকে সে তাকিয়ে রইল জানালার ওপারে বৃষ্টির দিকে। বৃষ্টিতে তার ভয় নেই, ট্রামে উঠেছে কেবল বাড়ি থেকে বহু দূরে চলে যাবার জন্যে।

কিন্তু কোথায়? যেখানেই হোক। অভিমান হয়েছে তার।

নড়ে উঠে চলতে লাগল গাড়িটা।

ফের মনে হতে লাগল যেন কভাস্টার মেয়েটি তার নীল টিকিটের বাম্বিল-ভরা ব্যাগটার দিকে চেয়ে আছে।

কাঁপা কাঁপা আলোয় জ্বলছে ট্রামের বাতিগুলো। বৃষ্টির সময় সর্বদাই একটু ক্ষীণ লাগে বাতিগুলোকে। জানালার ভেজা শার্সিতে দোকানগুলোর বিজ্ঞাপনের লাল সবুজ হরফের ঝাপসা ছোপ। বেশ সুন্দর দেখাচ্ছিল। কিন্তু রঙচঙে ছোপের দিকে ছেলেটার মন ছিল না। আগের মতোই চোখ কুঁচকে ঠোঁটের পাশদুটো চেপে সে তাকিয়ে রইল। ভাবছিল অন্য কিছু।

তারপর খিদে পেল তার। টের পেল যে ভারি ক্লান্ত হয়ে গেছে। মনের মধ্যে অভিমান থাকলে লোকে চট করেই হাঁপিয়ে যায়। ভিজ জবজবে কুর্তটার চেয়ে শতগুণ জোরে সে ক্ষোভ তার কাঁধ চেপে ধরেছে। কুর্তা তো ইচ্ছে করলেই খুলে মুচড়ে জল বার করে নেওয়া যায়। কিন্তু ক্ষোভ?

ছেলেটা ঠিক করল কোথাও যাবে। যতক্ষণ ট্রাম চলছে, ততক্ষণ শ্রেফ বসে থাকবে। যেখানে হোক যাবে।

ওয়াগনে খালি সিট অনেক, কিন্তু বয়স্ক লোকদের পাশে বসার ইচ্ছে হল না তার। রাগতভাবে তারা ঠোট বাঁকাবে, ভুরু কুঁচকে ভেজা জবজবে ছেলেটার কাছ থেকে সরে বসবে।

জানালার কাছে একটা বেঞ্চ বসে ছিল একটি মেয়ে।

রগের কাছে ওর সোনালি চুলের ঢেউটা চোখে পড়ল তার, ছোট ছোট বেণিদুটো, তার ডগাগুলো আবঁধা, কাঁধে ফেলা হুডটা, যার উপর কালো কালো বৃষ্টির ফোঁটা।

ছেলেটা এগিয়ে গেল বেঞ্চিটার কাছে, তারপর ভুরু কুঁচকেই তাকাল মেয়েটির দিকে। মেয়েটাও যেন তার অনাহুত ভেজা পড়শিটিকে দেখবার জন্যেই মুখ ফেরাল জানালা থেকে। ছেলেটা প্রায় বলে উঠতে যাচ্ছিল, আরে তুই যে!

মেয়েটা তার চেনা।

অবিশ্যি তেমন চেনা নয়। ছেলেটি ওকে চেনে, কিন্তু মেয়েটি তাকে নিশ্চয় জানে না।

শরৎ, শীত আর বসন্তে প্রায় প্রত্যেকদিনই ওকে দেখেছে।

ও পড়ে একুশ নম্বর ইশকুলে, আর মেয়েটি মনে হয় বত্রিশ নম্বরে। আর নিশ্চয় ওই ষষ্ঠ শ্রেণিতেই। অন্তত ক্লাস ওদের শেষ হত প্রায় একই সময়। ছেলেটি বাড়ি ফিরত সাদোভায়া রাস্তা দিয়ে, মেয়েটি চেখভ রাস্তা ধরে। পয়লা মে রাস্তায় দেখা হত মুখোমুখি।

প্রথমটা ছেলেটা তেমন মন দেয়নি। সাধারণ মেয়ে। তাকে মনে রাখার কারণ এই যে, প্রায়ই দেখা হত। তাছাড়া হয়তো এইজন্যে যে, ওর মাথায় থাকত একটা কালো

ফার টুপি, ঠিক কুঁকড়ে যাওয়া বেড়ালের মতো দেখতে। তাছাড়া, মেয়েটা যখন তাড়াতাড়ি করে হাঁটত তখন তার ঢোলা টুপিটা নেমে আসত কপালের উপর, ভারি মজা লাগত দেখে। আর হাঁটত মেয়েটা প্রায় সর্বদাই তাড়াতাড়ি করে। একটু সামনে ঝুঁকে অর্ধৈর্থে সঙ্গিনীর দিকে তাকাতে তাকাতে এগুত। কোথায় যাবার জন্যে অত তাড়া? টুপির তল থেকে ছোট ছোট সোনালি কুণ্ডলীতে ঝুলন্ত চুলগুলো লম্বা লম্বা কালো ফারের সঙ্গে জড়িয়ে যেত। মোটের ওপর, একেবারেই সাধারণ একটা মেয়ে। নেহাত স্কুল থেকে ফেরার পথে ওকে দেখার অভ্যেস হয়ে গিয়েছিল ছেলেটার— যেমন অভ্যেস হয়ে গেছে মোড়ের মাথায় কাচের চৌকিতে বসা ট্রাফিকের মিলিশিয়া, কি কৃষিবিদ্যা স্কুলের মাথায় বড় ঘড়িটা দেখতে। তবে, হয়তো ঠিক তা নয়... অন্তত ঘড়িটা যখন খুলে নেওয়া হল তখন তার কোনোই অস্বস্তি লাগেনি, অথচ পয়লা মে রাস্তায় যখন পুরো এক সপ্তাহ মেয়েটার দেখা পেল না, তখন কেমন একটা দুশ্চিন্তা হয়েছিল তার। পরে ফের যখন দেখা হল, কেমন যেন ভালো লাগল। আর তখন কেমন রাগও হয়ে যায় ওর, লাল হয়ে ওঠে, পাশে পাশে যাচ্ছিল সেরেগা দেরিয়াবিন, আড়চোখে চেয়ে দেখে তার দিকে। প্রতিজ্ঞা করে আর কখনো মেয়েটার দিকে তাকাবে না। পথের একটা মেয়ের দিকে চোখ তুলতে বড় তার বয়ে গেছে!

তবে মানুষের মন ভারি বিদঘুটে। এই একটা প্রতিজ্ঞা করল, পরমুহূর্তেই ঠিক উল্টোটা করতে ইচ্ছে হয়।

তারপর একবার মার্চ মাসের শেষের দিকে, সত্যিকারের বসন্ত যখন শুরু হয়ে গেছে, তখন একদিন দক্ষিণ-পশ্চিম কোণ থেকে জোর হাওয়া উঠে ছাইরঙের মেঘে আকাশ ঢেকে গেল, চ্যাটচেটে বরফ পড়তে শুরু করলে। পড়তেই থাকল, পড়তেই থাকল, ঝাঁকিয়ে রাখল পপলার গাছগুলোকে, ঢেকে ফেলল জল-জমা কালো কালো জায়গা, লটকে গেল বিজলি তারগুলোয়। আপনা থেকেই যেন এসে পড়তে লাগল হাতের তালুতে, হাতের তালুও তা পাকিয়ে তুলতে লাগল তুষারগোলায়।

‘হুঁশিয়ার!’ স্কুল থেকে বেরিয়ে বলল সেরেগা, ‘সোজা শত্রুর দিকে!’

কালো টুপি পরা শত্রুটি আসছিল সামনে থেকে। বরাবরের মতোই তাড়াতাড়ি হেঁটে আসছে, কী চক্রান্ত পাকিয়ে উঠেছে জানে না।

বরফ নেবার জন্য নিচু হল সেরেগা। ছেলেটাও নিচু হল। গুলি পাকিয়ে সোজা ওর ঝাঁকড়া-লোমো টুপিটায়! তখন টের পাবে... সেরেগা তার বাঁ চোখটা কুঁচকে বরফের গোলা পাকানো হাতটা পিঠের দিকে নুকোল। হাতের টিপ ওর নিখুঁত, চোখও নিখুঁত। কিন্তু কী যেন হল। মুহূর্তে খাড়া হয়ে উঠল ছেলেটা আর যেন দৈবাৎ আড়াল করে বসল মেয়েটিকে। বরফের গুলিটা লাগল তারই মুখে।

বরফ-মাখা মুখে সেরেগার দিকে ফিরে দাঁতে দাঁত চেপে সে বলল :

‘দেখে ছুড়তে হয়..’

বিমর্ষ, বিব্রত সেরেগা কিছুই বলল না। কে জানত এমন হবে।

খ্রীষ্ট এল। মেয়েটার সঙ্গে ছেলেটার আর দেখা হত না পথে। তারপর ভুলে গেল।

এখন কিন্তু তাকে দেখেই চিনল সে, যদিও ঝাঁকড়া-লোমো বেড়ালের মতো দেখতে সেই টুপিটা তার মাথায় ছিল না।

পাশেই বসল ছেলেটা। সাবধানে বসতে গিয়েও মেয়েটার হাঁটুর উপর রাখা ছাতাখানা পায়ে লেগে গেল। ভুরু কুঁচকে ঘুরে বসতেই তার ভেজা আস্তিনে ঘসে গেল মেয়েটার রেনকোটটা।

‘ভয় নেই, ওটা জলে ভেজে না,’ বলল মেয়েটি, কেননা ছেলেটা ত্রস্ত হয়ে কনুই টেনে সরে বসছিল একেবারে শেষ প্রান্তে।

‘ভয় কেউ পাচ্ছে না,’ বিড়বিড় করে বলে সে ট্রামের মেঝেটার দিকে তাকিয়ে রইল। মেঝেটা জালিকাঠে বাঁধানো, ভেজা ভেজা টিকিট লেগে আছে তাতে।

‘ছাতা না থাকলে মুশকিল,’ আস্তে করে বলল মেয়েটি।

গলার স্বরে তার কোনো মেয়েলি অনুকম্পা ছিল না। ছিল শুধু একটু সহানুভূতি। ছেলেটা কী ভেবে জবাব দিল :

‘তা মুশকিল বৈকি!’

‘কিন্তু বৃষ্টি ঝাঁপাচ্ছে যে।’

ওটা না বললেও চলে। বোঝাই যাচ্ছে যে, মেয়েটার আলাপ করার ইচ্ছে হচ্ছে। তাছাড়া বৃষ্টি আবার ঝাঁপাচ্ছে কোথায়? গুঁড়িগুঁড়ি পড়ছে। ছেলেটা বলে দিল :

‘ওহ, “ঝাঁপাচ্ছে”!... বাজে বকিস না।’

‘আমি বাজে বকছি?’ রাগ হল মেয়েটার, ‘তা বাজেই বকছি। আকাশে মেঘ নেই, রাস্তাঘাট খটখটে। তুইও একেবারে শুকনো।’

‘তোর আর ভাবনা কী!’ রেগে ঠাট্টা করল ছেলেটা, ‘গায়ে রেনকোট, তার ওপর আবার ছাতা, গায়ে ফোঁটাটি লাগবে না।’

‘হ্যাঁ, আমার ভাবনা নেই,’ সঙ্গে সঙ্গেই সায় দিয়ে কেন জানি দীর্ঘনিঃশ্বাস ফেলল মেয়েটা। তারপর বলল, ‘ছাতাটা আমার নয়, মায়ের। ওই যে সামনে বসে আছে... তা তুই কেন ছাতা নিয়ে বেরোসনি?’

‘ছাতা আমার নেই,’ স্পষ্ট করে বলল ছেলেটা, ‘থাকলে ঘরেই বসে থাকতাম, সেই তো হয়েছে ব্যাপার।’

মেয়েটাকে অবাক হতে দেখে তার তৃপ্তিই হল।

‘বিনা ছাতায় বৃষ্টিতে ঘুরিস, আর ছাতা থাকলে... ঘরে বসে থাকিস?’

‘হ্যাঁ,’ বলল ছেলেটা। ঠোঁট চেপে ভুরু কৌঁচকাল, ‘কেন, বুঝতে অসুবিধা হচ্ছে?’

‘তুই এমনিতেই কী যেন...’ একটু আহতভাবে বলল মেয়েটা।

‘কী?’ গোমড়া মুখেই জিগ্যেস করল সে, তারপর যোগ দিল, ‘তা আমার দোষ কী? যখন ঘটে গেল...’

‘কী ঘটল?’

কথাটা মেয়েটা বলেছিল খুব নির্বিকারভাবে। যেন নেহাত ভদ্রতার খাতিরে। কিন্তু ছেলেটা লক্ষ করল যে সে আগ্রহী হয়ে উঠেছে।

ভুরু কৌচকানো বন্ধ করল সে।

যতই হোক মেয়েটা তো খানিকটা চেনাই, তার সঙ্গে আলাপও করেছে চেনা লোকের মতো। বরফের গোলার হাত থেকে তাকে সে একদিন স্বেচ্ছা বাঁচিয়েও দিয়েছে। তেমন নরম গোলা নয়। মেয়েটা অবিশ্যি তা জানে না, কিন্তু একদিক থেকে সেটা বরং ভালোই, ভাবল ছেলেটা। নিজের ব্যর্থতার ঘটনাটা তাকে বলার ইচ্ছে হল ছেলেটার। সবচেয়ে শক্তিশালী গর্বিত লোকেরাও তো মাঝে মাঝে নিজের দুঃখের কথা কাউকে শোনাতে চায়। বুকের ভার কমে তাতে।

‘কী জানিস...’ দীর্ঘনিশ্বাস ফেলে ছেলেটা তার নেতিয়ে পড়া জুতোজোড়া নাড়াল। ‘কী জানিস,’ এবার মন স্থির করেই বলল, ‘আমি একটা আবিষ্কার করেছি।’

ও বলতে চেয়েছিল ‘বানিয়েছি,’ কিন্তু ঠিক মুখ দিয়ে বেরোল না। ‘আবিষ্কার’ কথাটাই এসে গেল জিভের ডগায়। কে জানে হয়তো এইটেই বেশি ঠিক...

ওর কাছে এটা সত্যিই আবিষ্কার। ব্যাপারটা ঘটে তিন দিন আগে। তখন বৃষ্টি শুরু হয়নি, ঝলমল করছে রোদ্দুর। একটা গুদামঘরের চালের উপর ছাতা-মাথায় দাঁড়িয়ে ছিল সে।

‘লাফা!’ নিচ থেকে ছেলেরা চ্যাঁচাল।

ছেলেটা কিন্তু লাফাল না।

‘ভড়কে গেছে,’ টিপ্পনি কাটল সবচেয়ে ছোট ও মোটা ছেলেটা, অবজায় ঠোট বাঁকাল।

তবুও চুপ করে রইল ছেলেটা।

মাটি থেকে গুদামটা দেখতে খুবই সাধারণ, পুরনো, উঁচুও বেশি নয়। চালার নিচু প্রান্তটা পর্যন্ত মাত্র তিন মিটার। ছেলেটাও সাধারণ ছেলে। তেমন লম্বাটে নয়, সরু সরু হাত, রঙ-জুলা চুল, ছাঁট দেবার সময় হয়ে এসেছে। আগস্ট মাসের সব ছেলেমেয়েদের মতোই রোদ-পোড়া রঙ। গায়ে একটা নীল ফতুয়া, বেল্ট থেকে তা বেরিয়ে এসেছে। মোটেই বীরের মতো নয়। তবে এতদিন পর্যন্ত কোনো কাপুরুষতাও তো সে দেখায়নি। অথচ এখন দাঁড়িয়েই আছে, লাফ দিচ্ছে না।

‘উঠে গিয়ে একটা থাপ্পড় কষতে হয়!’ প্রস্তাব দিল রোগা শণ-চুলো একটা মেয়ে— সেই ধরনের মেয়ে, সমস্ত বিপজ্জনক ব্যাপারে যে ছেলেদের সঙ্গে থাকে, ‘তোকে বলছি, নে লাফা! নয়ত পেটে ভর দিয়ে নেমে যা, অন্যদের আটকে রাখিস না।’

জবাব দিল না ছেলেটা।

আকাশে মেঘ ভেসে যাচ্ছে, বড় বড়, গোল গোল, যেন হলদে এয়ারোস্ট্যাট। আর মাটি থেকে যে গুদামটাকে মনে হয় নিতান্ত সাধারণ, সেটা যেন ভেসে যাচ্ছে মেঘগুলোর দিকে, যেন আকাশে ওঠা একটা জাহাজ।

আর আঙিনাটাকে মনে হয় মহাকাশ থেকে দেখা পৃথিবীর পিঠ। গোল গোল শাদা ড্যান্ডেলিয়ন ফোটা ধুলোটে ঘাসের চাপড়াগুলো যেন সবুজ দ্বীপপুঞ্জ আর গুদামঘরটার কাছে যে পিপেটায় বৃষ্টির জল জমে আছে, সেটা যেন একটা গোল হ্রদ, গভীর নীলে জমজম করছে।

দুনিয়ার সবকিছুকেই ছেলেটা এক-একটা নাম দিতে ভালোবাসত। চট করে নামগুলো মনে এসে যেত তার। পিপের চকচকে জলটার সে নাম দিল নীল-রঙা হ্রদ, আর ঘাসের চাপড়াগুলোকে অজানা বনের দ্বীপপুঞ্জ...

‘কই, ঝাঁপা!’ প্রাণপণে চিৎকার করল শণ-চুলো মেয়েটা।

শেষ পর্যন্ত সজাগ হল ছেলেটা, হ্যাঁ, এবার ঝাঁপ দিতে হয়।

এবং ছাতাটা তুলল।

কালো ছাতাটা ঠিক যেন এক সার্কাসের গম্বুজ। শুধু শতগুণ ছোট। গম্বুজের তলে সর্বদাই আলো জ্বলে, এখানে কিন্তু সবই কালো। জ্বলছে শুধু একক একটি ফুটো, সুচ ফুটানো ছাঁদার মতো। তাতে আকাশের আণুবীক্ষণিক একটা বিন্দু এমনভাবে জ্বলছে যেন অন্ধকার আকাশে নীলচে তারা।

‘নীল লুদ্ধক তারা,’ ফিসফিস করে বলল ছেলেটা, বুকের মধ্যে তার এমন একটা অনুভূতি নাড়া দিয়ে উঠল যা প্রায় আনন্দের মতো।

ছাতাটা সে একেবারে নিচে নামিয়ে আনল, মাথার চুলগুলো ঠেকল ছাতার কাপড়ে। এবার ছেলেটা দেখতে পাচ্ছে কেবল পৃথিবী আর আকাশের বদলে শুধু একটা রোদে গরম কালো কাপড়। কেন জানি আটার গন্ধ বেরুচ্ছে তা থেকে। শুধু সেই নাক্ষত্রিক ফুটোয় আগের মতোই জ্বলজ্বল করছে একবিন্দু নীল। তারপর সেটা ঘুরল সূর্যের দিকে। চোখধাঁধানো আঙনে জ্বলে উঠল তারাটা, ছড়িয়ে পড়ল সূক্ষ্ম কিরণ আর সাত-রঙা চক্রে।

‘তারার বিস্ফোরণ,’ ফিসফিস করল ছেলেটা।

‘ওরে মস্ত জপছে রে, বলছে “ভগবান বাঁচাও”!’ নিচে থেকে সজোরে ট্যাঁচাল সেই রোগা মেয়েটা, রাগে মুখ ঘুরিয়ে নিলে।

‘হুঁ, বলে আবার নক্ষত্র মানচিত্র নাকি ওর মুখস্থ! ফলটা কী?’ বলল ওদের সবার চেয়ে বড় আর বিচক্ষণ ছেলেটা, ‘তিন মিটারও লাফাতে পারে না। অমন মহাকাশচারী আমরা ঢের দেখেছি।’

‘কী?’ উপর থেকে জিগ্যেস করল ছেলেটা। এতক্ষণে সে টের পেল যে ওরা ভাবছে সে ভয় পেয়েছে!

ধীরেসুস্থে ছাতাটা বন্ধ করল সে। ওটা এখন জমিয়ে রাখা দরকার।

‘আমি এমনিতেই লাফাতে পারি!’

প্যারাসুট-রুপী ছাতাটা ছাড়াই সে ঝাঁপ দিল। কাঠের স্তূপটা ডিঙিয়ে হাতে-পায়ে ভর দিয়ে সে নামল ঘাসগুলোর উপর একেবারে অজানা বনের দ্বীপপুঞ্জে...

‘বড় দেখালেন...’ বলল শণ-চুলো রোগা মেয়েটা। কিছু বলবার না থাকলে এই কথাটা বলাই মেয়েদের অভ্যাস।

সবচেয়ে ছোট ও মোটা ছেলেটা তার মোটা মোটা ঠোঁট কামড়াল।

‘ভেবেছিস আর কেউ পারে না?’ বলে নড়বড়ে কাঠের স্তূপটা বেয়ে সে চালায় উঠতে লাগল।

ছেলেটা জবাব দিল না। ছাতা খুলে আবার ফুটোটা পাতল রোদে। কাপড়ের আকাশে ফুটল তারা। ছেলেটা চোখ টিপে আস্তে করে হাসল।

এইভাবে ঘটল আবিষ্কারটা।

...মেয়েটাকে অবশ্য এতকথা সে বলতে পারেনি। অনেক সময় যেত, ঠিক বুঝত না। সে শুধু বলল :

‘আমি একটা প্ল্যানেটারিয়াম বানাতে চাইছিলাম। ছোট প্ল্যানেটারিয়াম, বয়ে নিয়ে যাওয়া চলবে। দরকার শুধু ছাতাতে সমস্ত নক্ষত্রগুলোকে জায়গামতো বসানো। বুঝেছিস তো? ছাতা খুললেই দেখা যাবে সব নক্ষত্র। সুঁই দিয়ে সব জায়গামতো ফুটো করে দিলেই হল— দিনেও দেখা যাবে কোথায় কোন নক্ষত্রটা। দরকার কেবল আগে থেকে মাপজোখ করে ঠিক করে নেওয়া ছাতাটা কীভাবে রাখতে হবে।’

‘সব নক্ষত্র তুই চিনিস? জানিস কোনটা কোথায়?’ অবাক হয়ে জিগ্যেস করল মেয়েটি। ‘হ্যাঁ, রাতে আমি মিলিয়ে দেখেছি...’

ঘাস, নদীর কুয়াসা আর ঠাণ্ডা হয়ে আসা ফুটপাথের গন্ধে রাতটা ভরা।

অলিন্দ থেকে নেমে এল ছেলেটা। আলো-নেভা জানালাগুলো মিটমিট করছে তিনটে তলা জুড়ে। দিনের गरমে দেয়ালগুলো এখনো गरম। বাড়িটা যেন কোনো गरম দেশ থেকে আসা এক মস্ত জাহাজ, নিজেদের চেনা জেটিতে ভিড়েছে। আর আঙিনার অনেকটা দূরে পুরনো গুদামটা যেন এক অন্ধকার পাহাড়।

ছেলেটা আঙিনা পেরিয়ে গুদামটার উপর উঠল।

এখন সবকিছুই অন্যরকম। ঘাসের চামড়ার দ্বীপগুলো অন্ধকারে হারিয়ে গেছে। পিপেটায় জমা বৃষ্টির জলটাকে মোটেই হ্রদ বলে মনে হয় না। এখন সেটা একেবারে কালো, তাতে নিশ্চল দুটো তারার প্রতিফলন। মনে হয় যেন পৃথিবীটা এপাশ-ওপাশ ফুটো হয়ে গেছে, আর সেই সুড়ঙ্গ দিয়ে দেখা যাচ্ছে ওপাশের দক্ষিণ গোলার্ধের আকাশে তারা।

ছেলেটার ফতুয়ার তলে টিক টিক করছে একটা অ্যালার্ম ঘড়ি। ভয়ে দুরু দুরু করছে বুকের তলায় লুকনো কোনো পাখির হৃৎপিণ্ডের মতো। ঘড়িটা বুঝতে পারছে না কেন ওকে আয়েসি টেবিলটা থেকে তুলে এনে ঢোকানো হল পেট আর গেঞ্জির ফাঁকে, তারপর নিয়ে আসা হল কে জানে কোথায়। কামরার ছোট্ট ঘড়িটা আন্দাজই করতে পারেনি যে তাকে বৈজ্ঞানিক ক্রনোমিটারের কাজ করতে হবে।

ঘড়িটা বার করে ছেলেটা কাছেই একটা তক্তার উপর রাখল। ছাড়া পেতেই শান্ত হয়ে গেল ঘড়িটা, কাজের লোকের মতো ঠিক ঘরোয়া সুরেই টিক টিক করতে লাগল।

স্যাঁৎসেঁতে হয়ে উঠল কেমন। জোরালো না হলেও বেশ ঠাণ্ডা একটা ঝাপটা দিল মুহূর্তের জন্যে। ছেলেটা হাত দিয়ে কাঁধ-বুক চাপল। ঘড়িতে দেখা গেল বারোটা বাজতে তখনো দশ মিনিট বাকি।

আকাশের দিকে চাইল ছেলেটা।

সে আকাশ এতই অসীম যে নিঃশ্বাস নিতেও ভয় হয়।

কালো আকাশে সিন্ধু আভায় তারা জ্বলছে। উত্তর গোলার্ধের নক্ষত্র মানচিত্র ছেলেটার ভালোই জানা ছিল। এমনকি বই না দেখেই সে এটা ঠিক দিতে পারে। তবে, তার মনে আছে কেবল প্রধান প্রধান জ্বলজ্বলে তারাগুলোর কথা। যাদের নিয়ে গড়ে উঠেছে নক্ষত্রমণ্ডলীগুলোর আঁকাবাঁকা আকার। কিন্তু এখন যেন ছেলেটাকে সাহায্য করবে ভেবে আকাশ তার নক্ষত্রের সমস্ত ভাণ্ডার উজাড় করে দিয়েছে।

যতই সে দেখতে লাগল ততই যেন সীমাহীন কালোর মধ্যে কেবলি ফুটে উঠতে লাগল তারা। সবচেয়ে কাছের জ্বলজ্বলে তারাগুলোর পরেই যাদের দেখা গেল, তারা অতটা জ্বলন্ত নয়, তবে সংখ্যায় অনেক। তাদের পর মিটমিট করছে বহুদূরের তারাগুলো। কিন্তু তা-ই সব নয়। ভালো করে নজর করে ছেলেটা দেখল যে আকাশ তারার মিহি ধুলোয় একেবারে ভরা। সে ধুলো ঘন হয়ে এসেছে ছায়াপথের আবছা পৌঁচগুলোর কাছে।

ঘাবড়ে গেল ছেলেটা। এতসব তারার কথা সে জানত না। মানচিত্রে ওরা নেই।

এ আকাশ আঁকা অসম্ভব...

তবে তারপর সে জোর করে নিজেকে শান্ত করল। সে ভাবল, তার দরকার শুধু প্রধান প্রধান তারাগুলো। যেগুলো দিয়ে গড়ে উঠেছে সপ্তর্ষিমণ্ডল, শিশুমার। অন্তত প্রথম দিকটায়... এইসব তারাগুলোর জন্যেই তো রাতের আকাশটা তার কাছে চেনা মনে হচ্ছে। ওরা যেন সেই বড় বড় দ্বীপ যা দিয়ে দ্বীপপুঞ্জকে চেনে নাবিকেরা...

এই সে ভাবল বটে, তবে কেবলি নতুন নতুন জ্যোতিষ্ক খুঁজে চলল সে। তাদের প্রত্যেকটাতেই মিটমিট করছে রহস্য।

মস্তুর বাতাস বইল, ভেজা-ভেজা, কনকনে। মনে হল যেন মহাজাগতিক শৈত্য ভারি ভারি ফোঁটায় পড়ে পৃথিবীর গরম বাতাসে একটা সিক্ত তাজা আমেজ গড়ে দিচ্ছে। কেঁপে উঠল ছেলেটা। কিন্তু আকাশের তুহিন নিঃশ্বাস যে তার কাছে সমুদ্রপাড়ির পালের হাওয়া। এই সময় একটা তীক্ষ্ণ ঝনঝন শব্দে নীরবতা ছিঁড়ে গেল। অ্যালার্মের বোতামটা টিপে বন্ধ করে দিল ছেলেটা। মধ্যরাত্রি এসে গেছে।

প্রথমে ধ্রুবতারাটা খুঁজল সে, তারপর চোখ-আন্দাজে একটা সরু রেখা টেনে গেল উত্তরে, একেবারে অন্ধকার দিগন্ত পর্যন্ত। তারপর দক্ষিণে, পূর্বে, পশ্চিমে।

জ্যোতির্বিদ্যায় ছেলেটা অবিশ্যি খুব পাকা ছিল বলা যায় না, তবে কিছু কিছু তো জানত। হিসাবটাও তার সহজ। আকাশ ঘোরে ধ্রুবতারাকে কেন্দ্র করে, ২৪ ঘণ্টায় তার এক পাক পূর্ণ হয়। পৃথিবী থেকে তাই মনে হয়, তার মানে এক ঘণ্টায় তারাগুলো পেরোবে বৃত্তের ২৪ ভাগের এক ভাগ। তাই দিন-রাতের যে-কোনো সময় কোন তারাটা কোথায় থাকবে তা বলে দেওয়া যায়। তার জন্যে শুধু আগে জানা দরকার ঠিক রাত বারোটায় তারা কোনটা কোথায় ছিল। ছেলেটা এখন তা জেনেছে।

নক্ষত্রমণ্ডলীরা এখন তার কাছে বন্দি...

‘সব মিলিয়ে দেখলাম, হিসাব করলাম,’ বলল ছেলেটা।

‘তারপর?’ জিগ্যেস করল মেয়েটি।

‘তারপর?... সব শেষ। ছাতা তো আমার নেই।’

ছাতা ছিল। সেই ছাতাটা, যা নিয়ে ছাদ থেকে সে লাফাতে গিয়েছিল। আলমারির পেছনে ওটা গড়াত, কেননা বাদলার সময় ছেলেটার মা-বাপে রেনকেটি ব্যবহার করত। ছেলেটাও তাই ছাতাটাকে নিজের সম্পত্তি করে নিয়েছিল।

কিন্তু সব ভুল হয়ে গেল। আর সবই ওই গুঁটিকো ভেরোনিকা পাতলোভনার জন্যে। রোজ সন্ধ্যায় সে ঘরে বসে কাটায়, আর আজ, এমন আবহাওয়ায় কিনা ঝোক ধরল স্বামীর বন্ধুদের কাছে যাবে। সেখানে নাকি ওর কী-সব কাজ আছে। সেসব বন্ধুদের কাছে নাকি কী-সব কাগজপত্র রেখে গেছেন তার স্বামী, সেগুলো নাকি নিয়ে আসতে হবে। জরুরি সব দলিল। শেষ না-করা থিসিসটার সঙ্গে ওগুলোর নাকি একটা সম্পর্ক আছে...

‘কাল গেলে হয় না, ভেরোনিকা পাভলোভনা?’ সাবধানে জিগ্যেস করেছিলেন বাবা।

‘না, না, একেবারে না!’ বলল ভেরোনিকা পাভলোভনা।

মেয়েটার ছোট্ট থুতনি, ধূসর ঠোঁট, দুঃখ দুঃখ চোখ, তাতে নীল কাজল। তার ওপর আবার বেদেদের মতো কানে অর্ধচন্দ্র সোনালি মাকড়ি। কেন যে অমন বিদুষী কানে মধ্যযুগের এক জিনিস বয়ে বেড়ায়, সেটা ছেলেটা কিছুতেই বুঝতে পারে না।

বাপকে সে কথা সে জিগ্যেস করেছিল।

‘তাতে তোর কী! বড়দের নিয়ে হাসাহাসি করা ছাড়!’ ধমক দিয়েছিলেন বাবা।

ভেরোনিকা পাভলোভনা ছেলেটার কাকী। কাকা মারা গেছেন তিন বছর আগে, কিন্তু প্রতিবছর ভেরোনিকা পাভলোভনা তাদের বাড়িতে এসে দুসপ্তাহ করে কাটিয়ে যেতেন। দিনের বেলায় ঘরগুলোয় একা একা থাকতেন, আর সন্ধ্যায় স্বামীর বাখানি গাইতেন কী একটা খুঁড়ে তোলা পাণ্ডুলিপি নিয়ে, গবেষণাটা যিনি শেষ করে যেতে পারেননি। মরে গেলেন। তাহলেও তিনি ছিলেন পি.এইচ.ডি। তা নিয়ে ভেরোনিকা পাভলোভনার ভাবি গর্ব।

কেন জানি মা-বাপে তাঁর সামনে কেমন মুখ কাঁচুমাচু করতেন। হয়তো এইজন্যে যে তাঁরা পি.এইচ.ডি. নন, ভূর্জপত্র লেখা নভগরোদি প্রাচীন পাট্টা নিয়ে গবেষণার কিছু বুঝতেন না।

ভাবতেও হাসি পায়!

ভেরোনিকা পাভলোভনাকে ধরা হত ঘনিষ্ঠা আত্মীয়া বলে, কিন্তু সবাই ওঁকে সম্মান করে সম্বোধন করত। শুধু ছেলেটা তাকে সম্মান করেও ডাকত না। কাকীও বলত না।

‘ওঁর সঙ্গে তুই কথা বলিস না কেন?’ জিগ্যেস করেছিলেন বাবা।

‘কী নিয়ে বলব?’

‘বড্ড বখে গেছিস দেখছি,’ হুমকি দিলেন বাবা। ‘তোকে আমি দেখছি..’

‘ওই মাগো!’ আস্তে করে বলল ছেলেটা।

ওই ওর অভ্যেস! নিজের এ অভ্যাসটা ওর নিজেরই ভালো লাগত না। ছেলেরাও ওকে মাঝে মাঝে খেপাত : ওই মাগো! একেবারে মেয়ে। কিন্তু অভ্যেসটা ও কিছুতেই ছাড়তে পারে না। ‘ওই মাগো’ কথাটা সে বলত নানাভাবে : কখনো ঠাট্টা করে, কখনো অবাক হয়ে, কখনো নির্বিকার হাই তুলে, কখনো আরও কতরকমে। কখনো জোরে, কখনো ফিসফিসিয়ে। এবার ও বলেছিল খুবই আস্তে। বাবা শুনতে পাননি।

তাহলেও ভেরোনিকা পাভলোভনার সঙ্গে সে কথা বলেনি। ভেরোনিকা পাভলোভনাও তার দিকে কর্ণপাত করেনি।

কিন্তু আজকে তার মনে ধরে গেল ছাটাটি।

এদিকে জানালার কাছে বসে ছেলেটা সুই ফোটাচ্ছিল ছাতায়। কাপড়টা ছিল খাপী, প্রতিটি বিঁধের পর দেখা দিচ্ছিল গোল গোল নিটোল ফুটো। কোনোটা বড়, কোনোটা ছোট। তারাগুলোও তো আর সমান মাপের হয় না...

কিন্তু তারা নিয়ে কি আর সবাই মাথা ঘামায়?

‘এটা বর্বরতা,’ শুকনো গলায় বলল ভেরোনিকা পাভলোভনা, ‘সাবেকি জিনিস নিয়ে এমন করে কেউ!’

ছাতাটা সাবেকি নয়, স্রেফ পুরনো। তাছাড়া বর্বরতাটা কী জিনিস তা-ও বোঝা গেল না। কিন্তু মা-বাপে ছেলেটার দিকে এমনভাবে তাকালেন যেন পুরো এক সিঁদুক দামি জিনিস সে নষ্ট করেছে।

‘দেখেছেন!... এক, দুই, তিন... আটটা ফুটো করেছে ও,’ নিখুঁত হিসাব করল সে। সপ্তর্ষিমণ্ডল হয়ে গেল তার কাছে শুধু ফুটো!

‘সাতটা ফুটো,’ বলল ছেলেটা, ‘একটা আগেই ছিল।’

‘তুই থাম তো,’ ধমকে উঠলেন বাবা; তাড়াতাড়ি করে ভেরোনিকা পাভলোভনাকে বললেন, ‘আমার কাছে আটা-ফিতে আছে, ভেতর থেকে তালি মেরে দেব।’

ভেরোনিকা পাভলোভনা আহতের মতো ঠোঁট বাঁকালেন : পি.এইচ.ডি.’র বৌকে কিনা পট্টি দেওয়া ছাতা!

‘আমাদের বাড়ি হলে ছেলেমেয়েদের এমন কাণ্ডে নিশ্চয় শাস্তি দিতাম।’

তবে ছেলেমেয়ে ওঁদের ছিল না।

‘সে তো বটেই,’ সায় দিলেন বাবা।

মিটমিটে মাকড়সিদুটো দুলিয়ে ভেরোনিকা পাভলোভনা ঘর ছেড়ে গেলেন।

‘লোকের সামনে কেবল আমাদের মাথা হেঁট করাতেই শিচ্ছে!’ বললেন মা, বোঝা গেল না মায়ের অমন হতাশ হবার কী আছে।

‘লোকের সামনে আবার কোথায়?’ বলল ছেলেটা।

চোখের পাতায় ছেলেটার বড় বড় রোঁয়া। যখন খোলা মনে, ফুর্তিতে সে চাইত, রোঁয়াগুলো উঠে যেত উপরে। কিন্তু যখন চোখ কৌঁচকাত, তখন একেবারে কাঁটা কাঁটা দেখাত।

বাপ তার আকারে ছোটখাটো, রেগে গিয়ে এবং সেই কারণে কেমন যেন খোঁচা খোঁচা মুখে আনাড়ির মতো ঘুষি মারলেন টেবিলে :

‘মুখ সামলে! দেখাব তোকে! কী আশ্পর্ধা!’

‘আপ্তে,’ মিনতি করলেন মা।

‘ছাতাটার ওপর তোমাদের যদি মায়া থাকত, তা-ও নয় হত।’ কান্না ঠেলে আসছিল, টের পাচ্ছিল ছেলেটা, ‘ছাতাটা তো তোমরা ফেলে রেখেছিলে। এসব বলছ শুধু ওঁর ভয়ে...’

‘শুয়ের কোথাকার!’ সরু গলায় চিৎকার করে উঠলেন বাবা, ‘বেরিয়ে যা এফুনি!’

না, জবাবে ছেলেটা চ্যাঁচালও না, দুয়ারও দড়াম করে বন্ধ করল না। আস্তে আস্তে বেরিয়ে এল সিঁড়িতে, রেলিঙের উপর উপুড় হয়ে শুয়ে নিচের দিকে তাকিয়ে দেখতে লাগল। অভিমানে গলা বন্ধ হয়ে আসছিল, কর কর করছিল চোখ। তখন আস্তে আস্তে নিচে নেমে বৃষ্টির মধ্যে বেরিয়ে যায় ছেলেটা।

ঠাণ্ডা লেগে যদি সে মরেও যায়, তাতেও তার কোনো আপত্তি নেই। মানে, ঠিক মরা নয়, ধরা যাক যদি নিউমোনিয়া হয়। তখন সবাই বুঝবে... কিন্তু বৃষ্টিটা দেখা গেল নিষ্ঠুর নয়, ছেলেটাকে সে মারতে চায় না। নিজের তপ্ত ধারায় তাকে আলিঙ্গন করে তার অভিমান ধুয়ে দিতে চাইল। অভিমান কিন্তু ধুয়ে গেল না, একটা জ্বালা-জ্বালা ঘোলাটে জের রয়ে গেল তার। কিন্তু বৃষ্টির কাছে ছেলেটি কৃতজ্ঞ। ছাতার তলে যারা মাথা গুঁজেছে তাদের বিরুদ্ধে এখন তারা দুজনেই। ছাতাধারী অবশ্য কম, অধিকাংশের গায়েই রেনকোট। ছেলেটা কিন্তু কেবল ছাতার কথাই ভাবছিল, কেবল ছাতাই দেখছিল।

জলে-ধোয়া চকচকে রাস্তা দিয়ে অনেকক্ষণ হাঁটল ছেলেটা, একবারও কোনো ফটকে কি কিওস্কের চালের নিচে আশ্রয় নিল না। তারপর বাড়ি থেকে যতদূরে সম্ভব চলে যাবার জন্যে ট্রামে উঠে বসল। সেইখানেই দেখা হল মেয়েটির সঙ্গে।

‘ছাতা আমার নেই,’ বলল ছেলেটি, ‘তাহলে ভাবনা ছিল না। উত্তর গোলাধ্বের মানচিত্রের মতো করে তারাগুলো ঠিকমতো ছাতায় বসালেই হয়ে যেত। তারপর ঠিক দিকে ধরলেই বোঝা যাবে কোন তারাটা কোথায়।’

একটু চাঙ্গা হয়ে উঠল সে। একটু কমে এসেছে অভিমান, আনন্দের তন্ত্রী বাজতে শুরু করেছে মনের মধ্যে। ছাতা তো কেড়ে নেওয়া যায়, কিন্তু আবিষ্কার তো আর কেড়ে নেবার ব্যাপার নয়।

‘কী করে করা যায় তোকে বলি শোন,’ বলল ছেলেটা, ‘প্রধান কথা প্রবতারাটা কোথায় মনে রাখতে হবে। সেটা সহজ। জানতে হবে উত্তর দিক কোনটা। তারপর...’

‘আরে দাঁড়া, দাঁড়া,’ বাধা দিল মেয়েটা, ‘আমার ঘটে যে কিছু নেই। তুই প্রথমে ঐকে দেখা, তারপর বুঝিয়ে দিস।’

‘ঐকে দেখা মানে?’

‘এই ছাতাটায়,’ সহজভাবে বলল মেয়েটা, ‘এই নে।’ এক টুকরো খড়ি বার করে দিল সে, ফুটপাথে এককা-দোক্কা খেলার ঘর কাটার জন্যে খড়ি থাকে প্রতিটি মেয়ের কাছেই। ‘সুঁই ফুটাতে হবেই, এমন কী কথা আছে। খড়ি দিয়েও তারা দেখানো যায়। তাই না? আমার এমন ছাতা খুব কাজে লাগবে!’

সত্যি তো, কথাটা সে ভাবেনি কেন? খড়িতে বরং আরো ভালো। ফুটোগুলো তো রাতে দেখা যাবে না। আর খড়ির ফুটকি সবচেয়ে মিটমিটে ঝলকেও চোখে পড়বে। তার মানে, মেঘলা রাতেও তারাগুলো কে কোথায় আছে সে বুঝতে পারবে।

ছাতাটা খুলল মেয়েটি :

‘সত্যিই তোর সব নক্ষত্রমণ্ডলী মনে আছে?’

ছেলেটা একটু গর্বের ভঙ্গিতে চুপ করে রইল।

‘নে আঁক,’ বলল মেয়েটা।

কিন্তু আঁকা আর হয়ে উঠল না। খড়িটা নেবারও ফুরসত হল না ছেলেটার। মেয়েটার মা এসে দাঁড়াল তাদের কাছে, লম্বা, নিষ্করণ, গায়ে বাদামি রঙের রেনকোট, উঁচু টুপি, যেন এক অভিশংসক।

‘তাতিয়ানা! ঠিক জানতাম। এক মিনিটও তোকে একা রাখতে নেই। চল, এখানে নামতে হবে। খাবারের দোকানটায় যেতে হবে একবার।’

ছেলেটার দিকে দৃকপাতও করল না। মেয়েটা কিন্তু চাইল। আর যাবার সময় ইচ্ছে করেই চোঁচিয়ে বলল :

‘ফের দেখা হবে।’

‘ফের দেখা হবে,’ ঝট করে জবাব দিয়ে মুখ ঘুরিয়ে নিল ছেলেটা। টের পেল তার মুখ লাল হয়ে উঠছে। অথচ কী অন্যায়াটা সে করেছে? আকাশে যদি না-ও দেখা যায়, তাহলেও কোন নক্ষত্রটা কোথায় আছে সেইটে সে শুধু মেয়েটাকে দেখাতে চাইছিল...

জানালায় কাছে ঘেঁষে গেল ছেলেটা। কী একটা যেন খোঁচা লাগল গায়ে। ভুরু কুঁচকে হাত ঢোকাল পকেটে, হাতে ঠেকল একটুকরো খড়ি।

সার্কাসের কাছে শেষ স্টপটায় নেমে পড়ল ছেলেটা। সার্কাসের মস্ত গম্বুজটা যেন প্রকাণ্ড একটা রূপোলি ছাতা। তার কার্নিশের নিচে কাচের ফিতের মতো ঝকঝক করছে জানালাগুলো। তার ভেতর থেকে কী সব রঙিন ঝলক দেখা যাচ্ছে। ওখানে, রূপোলি ছাতাটার ভেতরে চলেছে রঙচঙা ফুটির ফুলঝুরি আর ঘণ্টি। বাজনার হররা ভেসে এল বাইরে, কিন্তু সঙ্গে সঙ্গেই থেমে গেল, যেন ভারি ভারি ফোঁটায় গাঁথে গেল মাটিতে। সঁয়াতসঁতে কাঠের ঝাঁঝাল গন্ধ চারিদিকে। ফটকের কাছে খেলোয়াড়নী বুদ্ধিমোভার প্লাইউডের প্রকাণ্ড প্রকাণ্ড সিংহগুলো লাল লাল মুখ হাঁ করে আছে। সঁয়াতসঁতে হয়ে গেছে সিংহগুলো, দেখে মোটেই ভয় লাগে না, রাস্তায় বেড়ালের মতো কেমন যেন মনমরা। ছেলেটার কষ্টই হল ওদের জন্যে।

এভাবে দাঁড়িয়ে দাঁড়িয়ে অন্য লোকের ফুর্তিতে কান পেতে থাকায় আনন্দ নেই। ছেলেটা স্ট্যান্ডে এসে একটা ওয়াগনে উঠল। গাড়িটা স্টেশন থেকে যাচ্ছিল লোহা কারখানার দিকে।

কন্সট্রাক্টর মেয়েটির বয়স কম, মনটা ভালো। একবার হাই তুলল, কিছুই বলল না। যাচ্ছে যাক। জায়গা অনেক আছে।

ওয়াগনটা প্রায় ফাঁকা। শুধু জানালায় ঠেস দিয়ে চোখের উপর টুপিটা টেনে নাক ডাকাচ্ছিল একটা লোক। তাছাড়া সামনের বেঞ্চিতে বসে ছিল একজন ক্যাপ্টেন।

চমৎকার ক্যাপ্টেন। বসেছিল টানটান হয়ে, পায়ের উপর পা তুলে। ওয়াগনে যখন বাঁকুনি দিচ্ছিল, তখন তার হাইবুটের ডগাটা কেঁপে উঠছিল, বাতির ঝলকানি দেখা যাচ্ছিল তাতে। ভারি আশ্চর্য যে এমন আবহাওয়াতেও তার হাইবুট শুকনো, চকচকে। সবকিছুই তার চকচকে : বাদামি বেল্টটা, বোতামগুলো, টুপির ডগা, এমনকি দাড়ি-কামানো খুতনিটাও। সবুজ কাঁধপট্রিতে বসানো তারাগুলোও হলুদ ছটায় জ্বলজ্বল করছিল। একসঙ্গে দেখলে মনে হয় যেন কালপুরুষের মাঝের অংশটা।

ক্যাপ্টেনের হাঁটুর উপর জলে-কালচে-হয়ে-আসা একটা রেনকোট, তার উপর ছাতা। মস্ত কালো ছাতা, শাদা বাঁটটা বাঁকানো।

ছাতাটার দিকে চাইছিল ছেলেটা, ক্যাপ্টেনের সঙ্গে কথা কইবে কিনা ঠিক করতে পারছিল না। আর কী কথা কইবে সেটা ওর জানা আছে। নিজের আশ্চর্য পরিকল্পনাটা সে কেবল নিজের মধ্যে চেপে রাখতে পারছিল না, চাইছিলও না। ব্যাপারটা তো শুধু একলা ওর জন্যে নয়। সমস্ত আবিষ্কার, এমনকি সবচেয়ে ছোট আবিষ্কারটারও যে উচিত অন্যকে আনন্দ দেওয়া, এটা ছেলেটা অনুভব করছিল। কিন্তু ভয় হচ্ছিল তার, উচিতমতো হয়তো বলতে পারবে না।

‘কমরেড ক্যাপ্টেন,’ বলল ছেলেটা, ‘আপনার সঙ্গে একটু কথা কইতে চাই, কমরেড ক্যাপ্টেন।’

চোখ তুলল ক্যাপ্টেন, ক্যাপ্টেন যদি একটু অবাক হয়েও থাকে, সেটা ছেলেটার চোখে পড়ল না। মুখের ভাব ক্যাপ্টেনের অবিচলিত। হয়তো তাই হওয়াই উচিত।

‘বেশ তো,’ অনুমতি দিল ক্যাপ্টেন, ‘বল, কী বলবি।’

‘আপনি যদি চান, তাহলে আপনার ছাতায় আমি তারা ঐকে দিতে পারি,’ আবেদন জানাল ছেলেটা, মৃদু একটু দীর্ঘশ্বাসও ফেলল।

‘কিসের তারা?’

‘আকাশে যেমন থাকে,’ বলল ছেলেটা, ‘তা দেখে বলে দেওয়া যাবে...’

ক্যাপ্টেনের বাঁ ভুরুটা নড়ে উঠল।

‘দাঁড়া, দাঁড়া, ঠিক বুঝছি না। ঠিক করে গুছিয়ে বল। কোন আকাশ, কী উদ্দেশ্য?’

‘বেশ,’ রাজি হল ছেলেটা, ‘বুঝিয়ে বলছি। ব্যাপারটা হল এই, যদি ছাতাটা খুলে তার ভেতর দিকে নক্ষত্রগুলো আঁকা যায়, নক্ষত্র মানচিত্রে যেমন থাকে আর কি, তাহলে একটা ছোট্ট প্ল্যানেটারিয়াম হয়ে যাবে। আমিই এটা ভেবে বার করেছি।’ না বলে পারল না ছেলেটা।

‘কিন্তু কী জন্যে?’

‘তা জানি না... এমনি মাথায় এল।’ আনাড়ির মতো হাসল ছেলেটা, একটু কাঁধ নাড়াল।

‘আমি সে-কথা বলছি না,’ বুঝিয়ে বলল ক্যাপ্টেন। ‘তোর প্ল্যানেটারিয়ামটার উদ্দেশ্য কী? প্রত্যেকটা জিনিসেরই একটা না-একটা উদ্দেশ্য থাকে।’ কথা বলছিল সে জোরে নয়, তার প্রত্যেকটা কথাই যেন চাপা হাই-তোলা। চাঁছা-ছোলা থুতনিটা পর্যন্ত নড়ছিল না।

‘মানে... উদ্দেশ্য? উদ্দেশ্য হল এই। দিনের বেলাতেই বলে দেওয়া যাবে কোন তারাটা কোথায়। কিংবা মেঘচাকা রাতেও। শুধু ছাতাটাকে ঠিকমতো ধরে রাখা চাই.. প্রবতারার সঙ্গে মিলিয়ে নিতে হবে আগে, তারপর...’

‘বেশ হল, কিন্তু কী জন্যে?’

‘প্রবতারার দিকে কেন? কারণ এ তারাটা আকাশে বরাবর এক জায়গায় থাকে। ওটা যেন অক্ষ। কারণ পৃথিবী থেকে মনে হয় সব নক্ষত্র ওর চারপাশে ঘুরছে।’

আশ্চর্য, ক্যাপ্টেন কি এসব সত্যিই জানে না?

‘ও কথা বলছি না।’ একটু যেন ভুরু কঁচকাল ক্যাপ্টেন, ‘কোন তারাটা কোথায় তা জেনে হবে কী? অবস্থিতি নির্ণয়? কিন্তু ছাতায় কি তা হয়? তার নিখুঁত বৈজ্ঞানিক পদ্ধতি আছে। নাকি তোর অন্য উদ্দেশ্য আছে। কী করতে চাস?’

সত্যিই তো, কী উদ্দেশ্য? কী উপকার হবে সেটা ছেলেটা জানত না। আবিষ্কারেই খুশি হয়ে যায় সে, ভাবেনি তাতে কী উপকার হবে। চেনা তারাগুলোর দিকে একটু বন্ধুর মতো চোখ ঠারা, একে কি উপকার বলবে? নাকি ওটা অমনি।

আর কোন দিকে রয়েছে অভিজিৎ, অগস্ত্য কি শিশুমার তা জানা, আকাশে একটা তারা না দেখা গেলেও তা বলে দেওয়া, এর কি কোনো দরকার আছে?

নাকি তার কোনো দরকার নেই?

‘জানি না,’ জবাব দিল ছেলেটা, ক্যাপ্টেনের দিকে আর চাইল না, ‘আমি ভেবেছিলাম, জাহাজ যদি যায় চাঁদে কি মঙ্গলগ্রহে, আজ সেটা অমুক নক্ষত্রের কাছে, কাল আরেকটায়, অথচ আকাশ মেঘে ঢাকা, কিছুই দেখা যাচ্ছে না, তখন ছাতা খুললেই দেখা যাবে কোথায় কোন নক্ষত্র, কোনখান দিয়ে উড়ছে রকেট...’

‘উড়ে আগে পৌঁছক তো,’ বলল ক্যাপ্টেন, ‘কোনখান দিয়ে উড়ছে, তা বার করবে লোকেটর যন্ত্র।’

জানালার কাছে বসা লোকটা নড়েচড়ে টুপিটা ঠেলে দিল উপর দিকে।

‘কী বললেন, আবার রকেট কি স্পুথনিক ছেড়েছে নাকি?’

‘উঠে বসুন,’ ঘুমন্ত গলায় বলল কভাস্টার মেয়েটি, ‘নইলে জায়গামতো নামতো পারবেন না।’

ব্রেক কমল ট্রাম, আলগোছে উঠে দাঁড়াল ক্যাপ্টেন। লম্বা, খাড়া। সবুজ রেনকোটটা কাঁধে ফেলল।

‘ছাতায় আঁকাটাকা ভালো না।’ বলে পা বাড়াল দরজার দিকে। ছাতাটা লুকিয়ে রাখল রেনকোটের নিচে। হয়তো ছাতা নিয়ে হাঁটার নিয়ম নেই ক্যাপ্টেনদের, হয়তো নিজের জন্যে নয়, অন্য কারো জন্যে ছাতাটা নিয়েছিল সে।

‘ভালো নয়,’ ঠাট্টাভরে পুনরাবৃত্তি করল ছেলেটা আপন মনে।

ব্যর্থতায় ভয় নেই তার। আবিষ্কারের আনন্দ চাপা পড়ে ছিল অভিমানের তলে, এখন তা উষ্ণ করনার মতো উচ্ছল হয়ে উঠল। অপেক্ষায় রইল সে; হয়তো হঠাৎ এমন লোকের দেখা পাবে যার কাছে তারাগুলোর প্রয়োজন আছে।

দুজন লোক গাড়িতে উঠে পেছনের চাতালে দাঁড়িয়ে রইল, যদিও সমস্ত বৈশিষ্ট্যই ছিল ফাঁকা।

একজন কমবয়েসি, লম্বা, গায়ে খাটো, ফিকে রঙের রেনকোট। মুখ বলতে যেন মোটা মোটা কাচের প্রকাণ্ড চশমাটা আর টিপ কপালটা ছাড়া আর কিছুই নেই। মাথায় একরাশ কালচে কঁকড়া চুল; তাতে জলের ছিটে। দ্বিতীয় জনকে মনে হল বয়সে অনেক বড় আর মামুলি; মুখখানা বয়স্ক আর দিনের খাটুনিতে ক্লান্ত লোকের মতো, গায়ে সাটিনের কালো ওভারঅল, ধূসর টুপি। তাছাড়া ছাতা, সেটি তার বগলে।

কারো আসল নাম জানা না থাকলে ছেলেটা নিজেই তা ভেবে নিত। ভেবে নিত সঙ্গে সঙ্গেই। আপনিই মাথায় এসে যেত।

‘দাবাড়ে’ প্রথম লোকটির নাম দিল সে। আর দ্বিতীয় লোকটির বেলায় তার খুবই মানানসই লাগল ‘ওস্তাদ’ নামটা।

আলাপ করছিল দুজনে। আসলে কথা বলছিল কেবল ওস্তাদ, অন্য লোকটি ভদ্রতাভরে গুনছিল, আর মনে হয় বিশেষ আগ্রহ নিয়ে নয়।

‘আমি ওকে কাজের লোকের মতো বললাম, “তুই নিজেকে পেয়েছিস কী, আর্কিমিডিস* হয়ে গেছিস? চোখটা তোর কোথায়? এখানে কতটুকু পর্যন্ত ছাড় চলে? শূন্য শূন্য তিন। আর তোর দাঁড়াচ্ছে শূন্য এক।” আর ও বলে দিল : “ইচ্ছে হলে

* পুরাকালের বিখ্যাত গ্রিক গণিতজ্ঞ।

যান গিয়ে কর্তার কাছে নালিশ করুন। খামোকা এরকম মুখঝামটা সহিব না বলে দিচ্ছি”।’

‘বলল খামোকা?’ ব্যঙ্গের হাসি হাসল চশমাপরা।

‘হ্যাঁ, বলল খামোকা... তবে আমিও উকিলি প্যাঁচ ছাড়লাম। বললাম, “কর্তার কাছে আমি যাচ্ছি নে, তোর কর্তা আমিই, আর কাজটা তোকে হাতে-কলমে শেখাবার জন্যে এই হোজ পাইপটা নিয়ে ডাবল ভাঁজ করে তোর কোমরের নিচে এই সা...”’

কুচুটে তार्কিককে সে ঠিক কীভাবে শিক্ষা দিতে চাইছিল তা দেখাবার জন্যে সে তার ছাতাওয়ালা ডান হাতটা একটু ঘোরাল, কিন্তু দেখাতে পারল না। কিসের সঙ্গে যেন ধাক্কা খেল ছাতাটা আর পেছন থেকে শোনা গেল একটা নিঃশ্বাসের শব্দ, সঠিকভাবে বললে, হঠাৎ একটা যন্ত্রণার সময় দাঁতের ফাঁক দিয়ে টানা বাতাসের আওয়াজ।

‘মাপ করবেন!’ সঙ্গে সঙ্গেই বলল লোকটা ঘুরে দেখবার আগেই। তারপর ঘুরতেই দেখল ছেলেটাকে।

চোট খাওয়া হাঁটুটা হাত দিয়ে চেপে ধরেছিল ছেলেটা। পুরো এক সেকেন্ড ওস্তাদের মুখখানা হয়ে রইল বিহ্বল আর কোমল। তারপর ভুরু কৌঁচকাল লোকটা :

‘হল তো... জায়গা তো কম নেই। দূরে দাঁড়ালে ক্ষতি হত কী? চোট লেগেছে? ইস্ একেবারে ভেজা যে!’

রাগ ফলিয়ে সে হয়তো তার দোষটা চাপা দিতে চাইছিল; হয়তো-বা তাড়াতাড়ি ‘মাপ করবেন’ বলে ফেলার অস্বস্তিটা লুকোতে চাইছিল, কেননা ছোট ছেলেদের কাছে তো কেউ মাপ চায় না।

‘উধোর পিণ্ডি যে বুধোর ঘাড়ে হয়ে গেল, ভিক্তর সেমিওনোভিচ,’ একটু বাড়াবাড়ি রকমের হালকা সুরে বলল দাবাড়ে, ‘চেয়ে দেখতে হত।’

সিধে হয়ে দাঁড়াল ছেলেটা।

‘আমার নিজেরই দোষ... দাঁড়িয়ে ছিলাম...’ ওস্তাদের মুখের দিকে চেয়ে বলল ছেলেটা। দৃষ্টিতে তার অনুজ্ঞ একটা অনুরোধ।

‘ঠিক আছে... নিজের...’

‘সত্যি আমারই দোষ...’ প্রায় করুণ সুরে বলল ছেলেটা, ‘আনমনা হয়ে ছিলাম।’

ট্রামগাড়িতে আনমনা হওয়াটা কাব্যিক স্বভাবের লক্ষণ,’ দাবাড়ে এবার কথাটা বললে না হেসে— বলতে কি, বেশিরকম গুরুগম্ভীর সুরে। ‘ভাবনা নেই, পা-টা ভালো হয়ে যাবে... তাহলে ভিক্তর সেমিওনোভিচ, তারপর কী হল? আপনি হোজ পাইপটা পর্যন্ত বলেছেন...’

‘কাকু, একটু শুনুন,’ অনুচ্চ স্বরে তাড়াতাড়ি বলে গেল ছেলেটা, ‘দিন-না আপনার ছাতাটায় আমি নক্ষত্রমণ্ডলী ঐকে দিই। যেমন প্ল্যানেটারিয়মে হয় আর কি। ছাতাটা

খুললেই সঙ্গে সঙ্গে দেখা যাবে কোন নক্ষত্র কোথায়। অ'কাশে মেঘ থাকলেও, এমনকি দিনের বেলাতেও। শুধু ছাতাটার বাঁটটা ধরতে হবে ধ্রুবতারার দিকে। তারপর ঘোরালেই হল...' এবার ও বলে গেল সবটা একনাগাড়ে, জিজ্ঞাসার অপেক্ষা না করে, প্রথম কথাতেই সবকিছু খোলসা করে দেবার জন্যে।

লোককে যে সে নক্ষত্রমণ্ডলী উপহার দিচ্ছে!

এবার সে ইচ্ছে করেই 'তারা' বলল না, বলল 'নক্ষত্রমণ্ডলী'। তাতে অতিরিক্ত ব্যাখ্যার দরকার হল না। সঙ্গে সঙ্গেই বোঝা গেল আকাশের কথা হচ্ছে।

আর হয়তো ওর কথা শেষ পর্যন্ত শুনবে না এই ভয়ে সে কথা কইল হড়বড় করে, কোনো কোনো শব্দ গলার মধ্যেই ডুবে গেল, আবার পুনরুজ্জ্বল করল সেগুলোর, চেষ্টা করল যত তাড়াতাড়ি পারে সবকিছু বুঝিয়ে বলতে।

তারপর হঠাৎ থেমে গেল। হঠাৎ সে টের পেল যা বলবার সব বলা হয়ে গেছে। তাকে ওরা বাধা দেয়নি। চুপ করে গিয়ে সে বিশ্বলের মতো জবাবের প্রতীক্ষায় রইল।

'ব্যাপার বটে-এ', বলল ওস্তাদ, 'এটা তুই নিজেই ভেবে বার করেছিস নাকি?'

'মানে হ্যাঁ... তাতে কী? খুবই সোজা... কিন্তু তারা দেখা যাবে।' শেষ কথাগুলো বলবার সময় ছেলেটার গলার স্বর ভেঙে এল। তার মনে হল ওস্তাদও হয়তো জিগ্যেস করবে : 'কী উদ্দেশ্যে?' চোখ নামিয়ে সে ওস্তাদের কাদা-লাগা বোঁচা হাইবুটটার দিকে চেয়ে রইল।

'মন্দ নয় তো,' বলল দাবাড়ে।

ওস্তাদ কী খানিকটা ভেবে জিগ্যেস করল :

'এটা হাতে-কলমে দাঁড়াচ্ছে খানিকটা আকাশের ছকের মতো?'

'মানে হ্যাঁ, মানচিত্রের মতো!' খুশি হয়ে উঠল ছেলেটা, 'তবে তার চেয়ে ভালো। ভ্রাম্যমাণ প্র্যানেটারিয়মের মতো। জানা যাবে কোথায় কোন নক্ষত্রমণ্ডলী। দেখা যাবে মেঘের মধ্য দিয়েও...'

'দাঁড়া, দাঁড়া...' ওস্তাদ তার তামাক-খাওয়া হলদে আঙুলে জোরে জোরে থুতনি ঘসল, 'কয়েকটা জিনিস ঠিক মাথায় ঢুকছে না। এমনিতে অবিশ্যি বোঝা যাচ্ছে, তবে পুরো নয়... যেমন তোর ধ্রুবতারা। এটার মানে কী?'

'ভিক্টর সেমিওনোভিচ, আমি যা বুঝছি—' বাধা দিল দাবাড়ে, চশমা তার জুলজুল করে উঠল, 'ভেবে বার করেছে খাসা, যদিও নীতিটা খুবই সরল। আকাশের গোলকটাকে ভাগ করা হল চব্বিশ ভাগে। চব্বিশ ঘণ্টায় তো একদিন...'

'সেটা সবাই জানে,' ঠাট্টা করে হাসল ওস্তাদ।

'তার মানে,' বলল দাবাড়ে, 'এই সময়ের মধ্যে আকাশ আমাদের পুরো এক পাক প্রদক্ষিণ করবে। তাই তো?'

‘ঠিক তাই!’ সানন্দে বলে উঠল ছেলেটা, ‘আমি তো তাই বলতে যাচ্ছিলাম...’

‘দাঁড়া-দাঁড়া। তার মানে ছাতাটাকে ঘোরাতে হবে সময় অনুযায়ী। শুধু আগে থেকে হিসাব করে রাখলেই হল...’

‘আমি সব হিসাব করে রেখেছি, সত্যি বলছি!’ ছেলেটা এবার আশার চোখে চাইল উৎসাহী দাবাড়ের দিকে, ‘আমি মিলিয়ে দেখেছি। মানচিত্রের সঙ্গেও, আকাশের সঙ্গেও। সব ঠিকই হবে। আমি বুঝিয়ে দিচ্ছি। আর কীভাবে আগে প্রব-তারাকে বার করতে হবে...’

‘উঁহু, সত্যিই মন্দ নয় তো,’ ফের বলল দাবাড়।

‘তা বটে, তবে আমার মারিয়া পাভলভ্‌না কাণ্টা দেখলে কী বলবে, সেটা তোর কাছে মন্দ লাগছে না?’

‘কী যে বলেন, ভিক্টর সেমিওনোভিচ! কী আবার উনি বলবেন... তাঁরও ভালো লাগবে।’ এক মুহূর্তের জন্যে ভারিক্কি ভাবটা রেখে দাবাড় চোখ টিপল ছেলেটার দিকে।

ওস্তাদ সেটা লক্ষ করেনি। ছাতাটা সে তার সামনে হাতের তালুতে রেখে ঘোরাচ্ছিল, দেখছিল, মন স্থির করতে পারছিল না। ছাতাটা যেন একটা জীবন্ত প্রাণী, যেন ভয় পাচ্ছে ছেলেটা তার অনিষ্ট করবে।

‘তা আঁকবি কী দিয়ে?’

‘খড়ি দিয়ে। ভয় নেই, আমি খুব সাবধানে আঁকব।’

‘তা তোর পরিকল্পনাটা কী?’ জিগ্যেস করল ওস্তাদ, ‘সবক’টা তারাতেই ফুটকি দিবি?’

‘কী যে বলেন! সব কি কেউ মনে রাখতে পারে। আমি শুধু আঁকব বড় বড়গুলোকে, নক্ষত্রমণ্ডলীগুলোকে দেখাব।’

‘তাহলে তাদের নামও লিখে দিস,’ নিঃশ্বাস ফেলল ওস্তাদ, ‘নইলে লাভ কী? আমি সপ্তর্ষিমণ্ডল ছাড়া আর কিছুই চিনি না। এমনকি শিশুমারও নয়... লিখে দিবি তো?’

‘নিশ্চয় লিখে দেব!’ সানন্দে বলল ছেলেটা।

ভেজা পকেটে হাত ঢুকিয়ে খড়ি খুঁজতে লাগল সে।

‘ব্যাপার বটে-এ,’ টেনে টেনে বলল ওস্তাদ, তারপর হঠাৎ তার বড় বড় হলদে দাঁত বার করে হাসল, ‘ছাতা মাথায় বাজারে যাবে মারিয়া পাভলভ্‌না, লুদ্ধক না অভিজিৎ কোনো একটা তারা দেখবে, তারপর হাতে-কলমে একেবারে জমা জলগুলোর মধ্যে! কাণ্ড হবে একখানা! তা যাক গে। আঁক। এখনো অনেক পথ যেতে।’ এই বলে ছাতা খুলল সে।

ছাতাটা কিন্তু কালো নয়। জলে ভেজায় এবং গুটনো থাকায় বাতির ঝাপসা আলোয় মনে হচ্ছিল যেন কালো। এখন সবাই দেখল ছাতাটা বাদামি রঙের, সেই সঙ্গে ছেয়ে-ছেয়ে খাঁজ।

আকাশ কখনো কি হয় ছেয়ে-ছেয়ে খাঁজকাটা বাদামি?

নীরবে খড়িটা পকেটে পুরল ছেলেটা।

‘ধুর ধুর তোকে, নয় একটু খারাপই হবে, কী হয়েছে!’ ভেজা জুতোয় মাড়ানো মেখেটায় খোলা ছাতাটা ঠুকল ওস্তাদ, ‘মানে কী জানিস, বাঁটদুটো একইরকম।’ দাবাডেকে সে ব্যাখ্যা করল, ‘প্রায়ই গোলমাল হয়ে যায়। এ ছাতাটা ক্লাভদিয়ার, ওই যে আমাদের রেট ঠিক করে যে।’

‘কী আফসোস!’ বলল দাবাড়ে।

টিকিয়ে টিকিয়ে চলেছে ট্রামটা। চাতালের উপর মিটমিট করছে বাতির ঘুমন্ত আলো। ঝিমুচ্ছে বিরল দুচার জন যাত্রী। শুধু জানালার বাইরে অশ্রান্ত ঝরে যাচ্ছে বৃষ্টি।

সাত নম্বর ট্রামটা ছাড়ল লোহা-কারখানা থেকে শহর-কেন্দ্রের দিকে। অনেকক্ষণ ট্রামে কেউ উঠল না, প্রথম স্টপে যারা উঠেছিল, তারাই চলেছে।

তারপর উঠল একটা খোকা। গায়ে খাটো রেনকোট, পায়ে রবারের হাইবুট, হাইবুটটা খুবই ঢিলা, পায়ে লটপট করছিল। ‘মায়ের জুতো’ ভাবল ছেলেটা।

সামনের চাতালে গিয়ে দাঁড়াল খোকা। একটা হাতে তার দুধের ক্যান, অন্য হাতে খোলা ছাতা।

ছোট সবুজ ক্যানটা নিশ্চিন্তেই ছিল, শুধু একবার সিঁড়িতে তার তলাটা ঠোকর খায় আর সরোষে ভেঙচি কাটে ঢাকনিটা। তবে সেটা তেমন ভয়ঙ্কর নয়, ফিতে দিয়ে কবজার সঙ্গে আটকা ছিল ঢাকনিটা, কখনো কোথায় হারিয়ে যাওয়া সম্ভব ছিল না।

কিন্তু বাগ মানছিল না ভারি ছাতাটা। টান টান কালো কাপড়ে হাট করে খোলা ছাতাটা কিছুতেই দরজা দিয়ে ঢুকতে চাইছিল না। তাছাড়া অত বড় আর বেয়াড়া ছাতাটাকে এক হাতে কি সামলাতে পারে ওইটুকুন একটা খোকা?

ট্রাম ছাড়ল। ঝাঁকুনিতে কেঁপে উঠল খোকা। তারপর রেগে গায়ের সবখানি জোর দিয়ে টানতে লাগল ছাতাটাকে।

‘ভেঙে ফেলবি যে,’ ছেলেটি বলল, ‘সত্যি কী শুরু করেছিস তুই?’

এগিয়ে গিয়ে সে ছাতাটার বাট ধরল।

‘বন্ধ করতে হয় আগে।’ বলে বন্ধ করল। ছাতাটা মুড়ে গিয়ে বাধ্য হয়ে উঠল।

পুরনো স্কুল ইউনিফর্মের ভাঙা টুপির তল থেকে চাইল খোকাটা, দোষীর মতো চোখ মিটমিট করে বলল :

‘খুব কড়া, বন্ধ হতে চায় না।’

‘কড়া!... এমন রাতে এইটুকুন একটা খোকাকে পাঠানো! যাচ্ছিস কোথায়?’ কড়া গলায় জিগ্যেস করল ছেলেটা। এই প্রথম শ্রেণির ছাত্র, হয়তো-বা এখনো স্কুলেই ভর্তি হয়নি, এর কাছে সে এখন বয়স্ক, শক্তিশালী।

‘ক্রিম কিনতে যাচ্ছি,’ ভীকুর মতো বলল খোকা, ফের চোখ তুলল। তার হাট করে মেলা ভয় পাওয়া চোখদুটো টুপির ছায়ায় মনে হচ্ছিল ভারি কালো আর বড় বড়। খোকা বুঝে উঠতে পারছিল না : কে জানে হয়তো রাতে, তাতে আবার বৃষ্টিতে দোকানে যাওয়া তার বারণ; হয়তো তাকে জেরা করার পুরো অধিকার আছে এই ভুরু কৌচকানো ছেলেটার। এফুনি হয়তো বলে উঠবে, ‘চল থানায়।’ হয়তো আরো ভয়ঙ্কর কিছু একটাও বলতে পারে...

‘দেখবি, তোর ছাতায় আমি রাতের তারা ঐকে দেব?’ বলল ছেলেটা।

নিজেই সে জানত না কী তাতে লাভ। খোকা তো জানেও না নক্ষত্রের কীভাবে ঘোরে। কিন্তু কথাটা কেমন যেন বেরিয়ে এল আচমকা, মুখ ফসকে। যেন জিভের ডগায় আটকে ছিল, ছাতা দেখামাত্র ঝাঁপিয়ে পড়বে বলে।

খোকার চোখ আরো কালো আর বড় হয়ে উঠল।

‘রাতের তারা?’ ঞ্চ কুঁচকে জিগ্যেস করল খোকা। ছোট ভুরুটা কপালে তুলল।

‘হ্যাঁ, তারা,’ জবাব দিল ছেলেটা। ভাবছিল এফুনি ছেলেটাকে নক্ষত্রমণ্ডলী ঐকে দেবে। অন্তত এবার তার কপাল ভালো।

‘ছাতাটা হবে ঠিক একটা ছোট্ট আকাশের মতো, বুঝলি তো?’ বোঝাল সে, ‘চারিদিকে মেঘ-বৃষ্টি, কিন্তু তোর মাথার উপর তারা। ঠিক যেন আসল আকাশ। দেখবি?’

‘ছোট্ট আকাশ?’ প্রায় যেন গান গেয়ে উঠল খোকা।

‘হ্যাঁ, হ্যাঁ! আয় দে...’

হয়তো অত তাড়াহুড়া না করলে ভালো হত। তাড়াহুড়োয় ভয় পেয়ে গেল খোকা।

‘না, না!’ চিৎকার করে আপত্তি জানিয়ে সে ছাতাটা আঁকড়ে ধরল, ‘না, না, হাত দিও না!’

কিছু দূরে বসেছিলেন দুজন মহিলা। নিশ্চয় ছেলেটার ভয় পাওয়া চিৎকার শুনে এক ঝটকায় মুখ ফেরালেন। কে পেছনে লেগেছে খোকাটার?

‘এক্কেবারে বোকা তুই,’ ক্লান্ত গলায় বলল ছেলেটা, ‘আমি তোর ছাতা কেড়ে নিতে যাচ্ছিলাম না... ভেবেছিলাম ঐকে দেব, এমন তোর ছাতা হবে যা আর কারো নেই। ভারি ইয়ে তুই...’

ওখান থেকে সরে গিয়ে একটি ফাঁকা বেঞ্চিতে বসল সে।

ট্রাম ছুটছে অন্ধকার পার্ক বরাবর। জানালার ওপাশে আলো দেখা যাচ্ছে না। যেন তা স্বচ্ছ নয়। শার্শিটা একটা কালো আয়নার মতো, তাতে নিজের ছবিই চোখে পড়ছিল তার।

আর নিজের পেছনে ও দেখল খোকাকে ।

অলক্ষ্যে কাছিয়ে এল খোকা । লোহার চাকার ঝকঝকানিতে তার রবারের হাইবুটের শব্দ শোনা যাচ্ছিল না । কাছিয়ে এসে দাঁড়িয়ে রইল বেঞ্চির কাছে, ভারি ছোট্ট, কেমন যেন দোষী-দোষী ।

‘অনেক তারা আঁকবে তুমি?’

‘অনেক,’ খুশি হয়ে বলল ছেলেটা, ঘুরে বসল । ‘বস, আমি তোকে সব বুঝিয়ে দিচ্ছি ।’

পাশেই বসল খোকা ।

ছাতাটা খুলল ছেলেটা । ডগাটা গুঁজল সামনের সিটের পিঠে, আর বাঁটটা রাখল নিজের কাঁধে । এবার সামনে তার ছোট্ট একটা কালো গম্বুজ ।

‘এই দ্যাখ!’ টানটান কাপড়টায় খড়ি ঘসল সে, ‘এইখানে, এক্কেবারে মাঝখানটায়, চিরকাল এইখানে থাকবে ধ্রুবতারা ।’

‘চিরকাল?’ জিগ্যেস করল খোকা, ফের তার ছোট্ট ছোট্ট ভুরু কুঁচকে ।

‘বরাবর ।’

‘আর দিনের বেলায়?’ সেয়ানার মতো খোকা হাসল ।

‘দিনের বেলাতেও । শুধু সূর্যের আলোয় তারা দেখা যায় না ।’

চোখ মিটমিট করল খোকা ।

‘এই দ্যাখ,’ বলে চলল ছেলেটা, ‘এইখানে সাতটা তারা, সাত মুনির মতো দেখতে । এই হল সপ্তর্ষিমণ্ডল...’

‘সপ্তর্ষি?’

‘হ্যাঁ ।’ অধীর হয়ে চোখ কুঁচকাল ছেলেটা, ‘কেন, কখনো শুনিসনি?’

খোকা মাথা নাড়ল ।

‘এইগুলো বুঝি তারা?’ খড়ির বিন্দুগুলোর দিকে সে আঙুল দেখাল ।

‘মানে... হ্যাঁ,’ সাবধানে বলল ছেলেটা ।

‘উঁহ ।’ সজোরে মাথা নাড়ল খোকা, ‘ওরকম না । ছটা বেরুচ্ছে এমন তারা আঁকো ।’

‘কেমন ছটা?’

‘এইরকম!’ বলে খোকা শূন্যে পঞ্চমুখী একটা তারা এঁকে দেখাল, ‘বড় বড় করে । ছেলেটা হতাশে তার হাত নামিয়ে নিয়ে জানালায় দিকে ফিরল ।

‘তারা ওরকম হয় না ।’

‘আঁকো-না!’ আশ্তে মিনতি করল খোকা ।

‘ওরকম বড় বড় তারা সব আঁটবে না ।’ মুখ না ফিরিয়েই জবাব দিল সে ।

‘তা হোক, কিছু তো আঁটবে...’

‘সত্যিকারের তারা হবে না ওগুলো।’

‘নিজেই বললে আঁকবে, আর...’ কষ্টে কথাগুলো বলতে পারল থোকা।

শেষ পর্যন্ত ওর দিকে ফিরে তাকাল ছেলেটা। টুপির ছায়াটা এখন আর ওর মুখে পড়েনি, ভেজা ভেজা কালচে চোখের উপর ট্রামের বাতির ছটা।

ঠিক যেন অভিমানের ঝিলিক।

দীর্ঘনিঃশ্বাস ফেলল ছেলেটা। অভিমান কী তা সে জানে।

‘বেশ আঁকছি,’ বলল সে।

ঝনঝন, ঝকঝক, ঢংঢং করে চলেছে আধশূন্য রাতের ট্রামগাড়ি। এক-একবার থামছে আবার ছুটছে। উঠছে-নামছে যাত্রীরা। আর সে বেঞ্চিটায় বসে আছে দুটি ছেলে, একজন ছোট্ট, আরেকজন কিছু বড়, সন্তর্পণে যাদু ঘনিয়ে উঠছে সেখানে; কালো ছাতাটা বদলে যাচ্ছে রূপকথার আকাশে।

বড় বড়, শাদা শাদা তারা আঁকল ছেলেটা : পঞ্চমুখী, অষ্টমুখী, দশমুখী। এমন সব নক্ষত্রমণ্ডলী গড়ে তুলল ওরা, যা কোনো জ্যোতিষী কখনো দেখেনি। ছেলেটার কাঁধ ঘেঁষে বসে ছিল থোকা, নড়ছিল না। মুখ তার একটু হাঁ হয়ে আছে, নিচের ঠোঁটটা ঝুলে আছে একটা গোলাপি অর্ধচন্দ্রের মতো। তারাগুলো থেকে চোখ না সরিয়েই থোকা হাইবুট থেকে বাদামি রঙের মোজা পরা পা-দুখানা বার করে নিল, বেঞ্চির উপর গোড়ালি রেখে হাঁটুদুটো হাত দিয়ে জড়িয়ে ধরল। এভাবে বসায় আরাম বেশি। পরিত্যক্ত হাইবুট জোড়া দুলতে থাকল, ঠেলাঠেলি করল পরস্পরের সঙ্গে, ভেতরে তাদের লাল আস্তর দেওয়া, মনে হচ্ছিল যেন অবাক হয়ে হাঁ করে আছে। বুঝতে পারছে না কী ঘটছে ওখানে।

আর সিটের একেবারে প্রান্তে অধীর হয়ে ঠুনঠুন করতে লাগল ভুলে যাওয়া ক্যানটা। কাঁপছিল গাড়িটা, আর মনে হচ্ছিল যেন খুব ছোট্ট, কৌতূহলী কেউ ক্যানটার ভেতরে লাফালাফি করছে, মাথা দিয়ে ঢাকনিটা তুলে দেখতে চাইছে কী হচ্ছে বাইরে।

চটপট নিপুণভাবে ঐকে গেল ছেলেটা। প্রথমটা অসুবিধা হচ্ছিল : ভেজা কাপড়ে খড়ির দাগ ধরছিল না। কিন্তু ছেলেটা উপায় বার করল। প্রথমে ধারটা ঐকে হালকা আঁচড়ে তারাগুলো ভরে তুলতে লাগল।

‘আচ্ছা,’ হঠাৎ খেয়াল হল তার। কেবল এখনই খেয়াল হল, ‘বাড়িতে তোকে বকবে না তো?’

‘না, বকবে না।’

জুলজুল করছে খোকার চোখ। এমন সুন্দর জিনিসের জন্যে কেউ কখনো বকতে পারে!

‘একটা চাঁদ আঁকো না?’ আনন্দে ফিসফিস করে মিনতি করলে খোকা, ‘এই জায়গাটায়...’

‘গোল চাঁদ, নাকি চন্দ্রকলা।’

‘গোল... চন্দ্রকলা দুই-ই।’

‘আরে না,’ থামিয়ে দিল ছেলেটা, ‘এ তো হয় না।’

‘তাহলে গোল চাঁদ।’

একটা বড় পূর্ণিমার চাঁদ আঁকল ছেলেটা, কাপড়ের আকাশ হয়ে উঠল আরও আশ্চর্য।

‘আর একটা স্পুথনিক,’ অনুরোধ করল খোকা।

স্পুথনিকটার চেহারা দাঁড়াল একটা গাজরের মতো, মাথায় তার ঝুঁটি। খোকা কিন্তু খুশি হল। ম’থার উপর ছাতাটা তুলে বাঁট ধরে ঘুরতে লাগল সে। ছোট্ট আকাশের ধার ঘেঁষে ছুটেতে লাগল স্পুথনিক, সেই সঙ্গে চাঁদ আর তারারাও ঘুরতে লাগল এক রূপকথার চড়কদোলায়...

‘ওই যা,’ বলে উঠল ছেলেটা, ‘আর থাম!’ খোকার হাত চেপে ধরল সে। থেমে গেল আকাশ। ‘কোথায় যাচ্ছি জানিস? কোথায় তোর দোকান?’

দূলে উঠল আকাশ। ঝট করে হাইবুটে পা ঢোকাল খোকা। চোখ তার এখন একেবারে গোল, মুখখানা একেবারে হাঁ।

‘কাঁদবি না বলে দিচ্ছি,’ বলল ছেলেটা।

কিন্তু কী করবে সে এই খোকাটাকে নিয়ে? নক্ষত্র উপহার দিয়ে তারপর অমনভাবে ফেলে আসা যে চলে না।

‘ঠিক আছে, ক্রিম তোর পালাবে না।’

নেমে অন্য গাড়ি ধরে ফিরে গেল তারা। দোকানটা খুঁজে বার করে ক্রিম কিনল, তারপর স্টেপে এসে দাঁড়াল ট্রামের জন্যে। দাঁড়িয়ে রইল অনেকক্ষণ, একই ছাতাটার নিচে। বৃষ্টির ফোঁটাগুলো এখন হয়ে উঠছে বিরল আর বড় বড়। চড়বড় করে তা পড়ছে ছাতার উপর। ভেজা পিচঢালা রাস্তাটা থেকে প্রতিফলিত হচ্ছে ল্যাম্প-পোস্টের বাতি, তাতে আলো হয়ে উঠছে ছাতার নিচের শাদা শাদা তারা আর চাঁদ।

ছেলেটা ফুটপাথ থেকে নেমে গেল দেখতে গাছগুলোর ওপাশে ট্রামগাড়ির আলো চোখে পড়ছে কিনা।

‘যাচ্ছ কোথায়? আমাদের আকাশের নিচে দাঁড়িয়ে থাকো,’ উদ্ভিন্ন হয়ে বলল খোকা।

ট্রাম যখন এসে পড়েছে, তখন ওর খেয়াল হল :

‘যাহ্, কোপেক তিনটি তো ফেলা হয়নি!’

ওই ট্রামে কভাক্টর ছিল না। ছিল শুধু একটা ক্যাশবাক্স, যাত্রীরা নিজেরাই সেখানে তিন কোপেক ফেলে দিয়ে একটা করে টিকিট ছিঁড়ে নেয়।

‘তাতে কী হয়েছে,’ সান্ত্বনা দিল ছেলেটা, ‘এবার গিয়ে ছ’কোপেক ফেলবি। এই তো কথা।’

‘হ্যাঁ, একই কথা,’ সায় দিল খোকা।

গাড়িতে উঠতে তাকে সাহায্য করল ছেলেটা। সাহায্য করেই চলে গেল।

খোকা ভেবেছিল হাত নেড়ে তাকে বিদায় জানাবে। কিন্তু কী করে? এক হাতে ছাতা, অন্য হাতে ক্রিমের ক্যান। তাই শুধু চেয়ে রইল ওই বড়সড় দিলদরিয়া ছেলেটার দিকে, যে তাকে এক আশ্চর্য আকাশ দিয়েছে।

খোকাকে বিদায় দিয়ে ছেলেটা ফিরল দোকানটায়। আগের বার এখান থেকে বেরোবার সময় তার মনে হয়েছিল দরজার কাছে যেন একটা তিন-কোপেকি মুদ্রা পড়ে আছে। খোকার সামনে তখন সেটা তুলতে তার কেন জানি লজ্জা হয়েছিল। অথচ কোপেক তিনটে তার দরকার। বিনা ভাড়ায় যেতে তার ইচ্ছে করছিল না। বিছছিরি লাগে। তাই ফিরল ছেলেটা।

দরজার কাছে তিন-কোপেকটা নেই। ভেবেছিল রাস্তায় বেরোবে, কিন্তু এখন সেখানে হাওয়া দিচ্ছে আর এমন জোর বৃষ্টি নেমেছে যে মনে হয় রাস্তাটা ফুটছে।

আগেই ভিজে যাওয়া ছেলেটার পক্ষে এ বৃষ্টিটা সইবার মতো মনে হল না। সংকীর্ণ লবিটায় দাঁড়িয়ে পড়ল সে, ঠিক করল বৃষ্টি ধরা পর্যন্ত অপেক্ষা করবে। ছুটে ঢোকা লোকজনদের যাতে ব্যাঘাত না হয় তার জন্যে সে দাঁড়িয়ে রইল দেয়াল ঘেঁষে। বৃষ্টির তোড় থেকে বাঁচার জন্য তারা তাড়াতাড়ি ছুটে আসছিল দোকানটায়।

তাড়া দেখা গেল না কেবল একজনের। ইনি হলেন বেশ মোটামতো এক গিল্লি, গায়ে হুড় দেওয়া স্বচ্ছ রেনকোট। ঢুকতেই গোটা লবিটা ভরে গেল তার দেহে। সশব্দে নিঃশ্বাস নিতে নিতে সেখানেই থেমে গেল। হাতে তার প্লাস্টিকের রঙিন ফিতে দিয়ে বোনা একটা ব্যাগ। লবির আলোয় তা ঝকঝক করছিল। ব্যাগের ভেতর থেকে ময়ূরের সবুজ লেজের মতো বেরিয়ে আছে একগোছা পৈঁয়াজকলি। তাড়াহুড়া করে আসা-যাওয়া করছিল লোকে, দেবে যাচ্ছিল সবুজ লেজটা, কেঁপে উঠছিল ব্যাগটা আর ছেলেটার প্যান্টে এসে লাগছিল ভেজা পৈঁয়াজকলির ছোঁয়া।

ব্যাগের মালিক তার প্রকাণ্ড মুখখানা ফেরাল ছেলেটার দিকে। চোখদুটো তার কেমন যেন লালচে।

‘এটা আবার এখানে কেন?’ কথাটা সে বলল এতই হড়বড় করে যে দাঁড়াল ‘এটাবার খানেকেন?’ ‘এটাবার খানেকেন?’ ফের কথাটার পুনরুক্তি করে সে যন্ত্রের মতো তার গোল মুঠোয় ব্যাগের হাতলটা আরো জোরে চেপে ধরল, ‘কী চাই ছোঁড়ার? দাঁড়িয়ে আছিস কেন?’

‘তাতে আপনার কী?’ বলল ছেলেটা।

‘তোদের আমরা ভালোই চিনি!’ হাঁসফাঁস করে উঠল রঙিন ব্যাগের মালিক, ‘পরের পকেটে নজর।’

রাগ ফুঁসে উঠল ছেলেটার মনে, কিন্তু সে রাগ বরফজলের মতো ঠাণ্ডা ও স্বচ্ছ। চেষ্টামেচি করলে না সে, চোখও নড়াল না।

এক মুহূর্ত চুপ করে দেখে লালচে চোখদুটোর দিকে সরাসরি তাকিয়ে স্পষ্ট করে বলল :

‘ধুমসো হাতি। ময়দার বস্তা।’

তারপর ছুটে বেরিয়ে গেল দোকান থেকে। পেছনে শোনা গেল দম-আটকানো চিৎকার। ছেলেটা কিন্তু পেছনে না তাকিয়ে মরিয়ার মতো হাত দুলিয়ে ছুটতে লাগল। ছুটছিল ভয় পেয়ে নয়, গলায় কান্না ঠেলে আসছিল বলে।

তবে এবারও ছেলেটাকে শান্ত করে তুলল বৃষ্টি। তারপর বৃষ্টি নিজেও শান্ত হয়ে এল, সমতাল আর মৃদু।

ছেলেটা তখনো ছুটছিল, তবে জোরে নয়, শেষ পর্যন্ত থামল চেখত আর পাবলিক মরোজভ রাস্তার মোড়ে। এখানে ট্রাম থামে। ছেলেটা ঠিক করল ট্রামে চেপে বাড়ি ফিরবে। টিকিটের পয়সা নেই যখন, বিনা টিকিটেই, জানত বাড়িতে দুশ্চিন্তা শুরু হয়েছে, খোঁজাখুঁজি করছে, আরো অনেক ভোগান্তি আছে আজ তার কপালে, কিন্তু সেকথা সে ভাবল কেমন ক্লান্তভাবে, উদাস মনে।

দাঁড়িয়ে ট্রামের জন্যে অপেক্ষা করতে লাগল সে।

ট্রাম যাচ্ছিল নানা ধরনের : পুরনো, লজ্জাভে, আবার নতুন ট্রামও আছে, তাদের অটোমেটিক দুয়ার, রূপোলি ঘন্টি। কিন্তু যে নম্বরের ট্রামটা তার দরকার, তার দেখা নেই।

বড় বড় গোল গোল ফোঁটায় বৃষ্টি হয়েই চলেছে...

হঠাৎ ওর মাথায় বৃষ্টির ফোঁটাগুলো বন্ধ হয়ে গেল। ফোঁটাগুলো তখন আছড়ে পড়ছিল রাস্তার অ্যাসফল্টে আর গাছের পাতায় পাতায়।

মাথা তুলল সে, দুটো কালো কালো খাঁজকাটা গম্বুজ তার মাথার উপর এসে মিলেছে, বৃষ্টি থেকে বাঁচাচ্ছে তাকে।

নাও, আবার এক ঝামেলা! ঠিক করল ছাতার তল থেকে সরে যাবে, রেগে পা বাড়াল সে। কিন্তু কে-একজন তাকে থামাল :

‘তুই যে একেবারে হাড় পর্যন্ত ভিজে গেছিস।’

কথাটা বলল একটা মেয়ে। ছেলেটার মনে হল যেন ওটা উপহাস। ভেজা পকেটে হাত ঢুকিয়ে সে ঝট করে ঘুরে দাঁড়াল।

পেছনে দাঁড়িয়ে আছে দুজন। ওরাই তার মাথায় ছাতা ধরে ছিল। একজন পুরুষ আর মেয়েটি। মুখ প্রায় ধরা যায় না। রাস্তার আলো কেবল বেণি থেকে খসা একটুখানি চুল ছুঁয়ে গেছে মেয়েটার। পুরুষমানুষটা পুরোপুরি ছায়া-ঢাকা। লম্বা, কালো স্যুট, স্বল্পভাষী।

‘তুই-যে ভিজে জবজবে হয়ে গেছিস,’ পুনরুক্তি করল মেয়েটা।

‘সত্যি?’ ব্যঙ্গ করে বলল ছেলেটা, ‘আর আমি ভাবছিলাম আমি একেবারে শুকনো।’
খুক করে হেসে উঠল মেয়েটা :

‘ওটা তোর ভুল। আসলে তুই ভিজে জবজবে। জলে-পড়া মুরগির বাচ্চার মতো।’

জবাবে সঙ্গে সঙ্গেই পিত্তিঝালানো কিছু-একটা বলা দরকার ছিল, পুরুষমানুষটা সেটা হতে দিল না।

‘লেনোচকা, চুপ করে থাক,’ নিচু ঘড়ঘড়ে গলায় বলল সে।

ছেলেটার মনে হল নিশ্চয় লোকটার মুখখানা হবে শক্ত গোছের, কিন্তু ক্লান্ত, তাতে টানটান চড়া বলিরেখা আছে।

‘খাম বাপু,’ বলল লোকটা, ‘তুই যদি তোর সখাদের সঙ্গে অমনভাবে কথা বলিস, তাহলে সত্যি বলছি, আমি কিন্তু ওদের পক্ষ নেব।’

‘সখা!’ খিলখিলিয়ে হেসে উঠল মেয়েটা।

ছেলেটা ধীরে ধীরে, কিন্তু দৃঢ় পায়ে বেরিয়ে গেল ছাতার তল থেকে।

‘মিছেমিছি জলে ভিজছিস,’ অপরিচিত লোকটা বলল পেছন থেকে।

‘বৃষ্টি হচ্ছে, তাতে আমার কী দোষ?’ জবাব দিল ছেলেটা।

‘সেটা ঠিক... তবে এখন তুই মিছেমিছি ভিজছিস। কারো ওপর রাগ ফলাচ্ছিস নাকি?’

‘ফলালেই-বা!’ বলল ছেলেটা।

‘তা তোর যা ইচ্ছে,’ নিঃশ্বাস ফেলল লোকটা।

‘নিশ্চয়,’ জবাব দিল ছেলেটা।

‘বাবা, ওকে ঘাঁটিও না,’ বাধা দিল মেয়েটা। ‘হল ফুটাবে।’

বোঝাই যায় মেয়েটার ধৈর্যগুণ নেই।

এদিকে ট্রামের এখনো দেখা নেই...

ছেলেটার ভেজা কুর্তটা হয়ে উঠল নিরেট আর অয়েলকুথের মতো চকচকে। ঝাঁক ঝাঁক জলের গুলির মতো তার উপর বৃষ্টি পড়ছিল সশব্দে।

‘অনেকদিন আমি দেশে ছিলাম না, বৃষ্টিতে ভেজার অভ্যেস চলে গেছে,’ বলল মেয়েটার বাবা। ‘তাই আমার ভুলও হতে পারে, তাহলেও আমার মনে হয় ওইভাবে দাঁড়িয়ে দাঁড়িয়ে ভেজাটা তেমন মজাদার নয়।’

‘অনেকক্ষণ ট্রামের দেখা নেই,’ ভাবল ছেলেটা, ‘পায়ে হেঁটেই বাড়ি যেতে হয়।’ এবং পায়ে হেঁটেই এগুল সে।

‘দাঁড়া, দাঁড়া,’ পেছন থেকে সেই প্রশান্ত কণ্ঠস্বরটা ভেসে এল। ‘ছাতাটা নে। সতি বলছি। আমাদের একটাতেই হয়ে যাবে। ফেরত না দিলেও চলবে!’

‘দেখাতে চাইছেন উনি কেমন দয়ালু,’ ভাবল ছেলেটা, এবং বলল :

‘ছাতায় আমার দরকার নেই। অন্তত বৃষ্টি থেকে মাথা বাঁচাবার জন্যে ছাতা আমার লাগবে না।’

শেষ কথাটা কেমন জানি আপনা থেকেই জিভ থেকে বেরিয়ে এল। কিন্তু তার জন্যে আফসোস করবে না ছেলেটা। কথাটা বলার পর সে ভাবছিল একটা জবাব আসবে। কিন্তু লোকটা আর মেয়েটা চুপ করেই রইল। হয়তো অবাক হয়ে গেছে!

তখন সে সরাসরিই জিগ্যেস করল :

‘ভাবছেন ছাতা দরকার কেবল বৃষ্টি থেকে বাঁচাবার জন্যে?’

‘উঁহু, কে বলল?’ বেশ গম্ভীরভাবেই বলল লোকটা, ‘আমরা তা ভাবি না। যেমন, ছাতা নিয়ে ছাদ থেকে লাফানো খুবই আনন্দের কাজ...কিংবা তার শিকগুলো খসানো...’

‘আর বাঁট-টা যদি বাঁকানো হয়, তাহলে কারো পায়ে লাগিয়ে ল্যাং মারা যায়,’ সমান গম্ভীরভাবেই যোগ দিল মেয়েটা, ‘খুব সুবিধে তাতে।’

তারপর দুজনেই অনুচ্ছেদে হেসে উঠল, আর তাতে যেন অপমান করার কোনো ভাব ছিল না। ছেলেটার মনে হল, একেবারেই কোনো অপমান নেই তাতে। তবে পুরনো ক্ষোভ আর ব্যর্থতা কি তার কম!

‘হাসছেন!’ বলল সে, ‘ছাতাটা দিয়ে দিতেও আপনাদের কষ্ট হচ্ছে না। আমি যাতে বৃষ্টিতে না ভিজি, তার জন্যে ছাতাটা দিয়ে দিতেও...’

‘এই এতটুকুনও কষ্ট হচ্ছে না,’ সায় দিল লেনা।

‘কিন্তু অন্য কাজে দিতে হলে নিশ্চয়ই কষ্ট হত...’

‘অন্য লোকের চেয়ে তুই ভালো-টা কীসে...’ অবাক হল বাপ।

‘আমি সে কথা বলছি না,’ গোমড়ামুখে বলল ছেলেটা, ‘আমি বলছিলাম অন্য কথা, লোকের কথা নয়... বেশ, দিন, আমি আপনাদের নক্ষত্র একে দিচ্ছি। আঁকব?’

ও একেবারেই ভাবেনি যে ওরা রাজি হয়ে যাবে। সঙ্গে সঙ্গেই ওরা বুঝল ব্যাপারটা কী। প্রথমটা ছেলেটা ভেবেছিল ওরা নিতান্ত করুণা করছে তাকে।

‘ওই যে আপনাদের ট্রাম আসছে,’ বলল ছেলেটা। এবার তার ভাগ্য পরীক্ষা হবে। তার দৃঢ় ধারণা ছিল, ট্রাম আসতেই বাপে-মেয়েতে চটপট উঠে পড়বে, সেখানে যে শুকনো, সেখানে যে জ্বলজ্বলে আলো।

‘আসুক, এই তো আর শেষ ট্রাম নয়, আরো আসবে...’ জবাব দিল লোকটা।

‘ওই কিওস্টার ওখানে যাওয়া যাক,’ প্রস্তাব দিল মেয়েটা। ‘আলো আছে ওখানে... আর সত্যিই ওই সব নক্ষত্রমণ্ডলী জানিস?’

‘একেবারে খুঁকি!’ মনে মনে ভাবল ছেলেটা। নাকি মনে মনে নয়, ফিসফিস করে হয়তো বলেই ফেলেছিল, কেননা বাপ আপত্তি করল:

‘কী যে বলিস, প্রায় বিয়ের যুগি হয়ে উঠেছে।’

‘বাবা! কী বলছ!’

‘চটখিস কেন! আমি যে বললাম “প্রায়”।’

বন্ধ ফাঁকা কিওস্টায় জ্বলজ্বল করছিল একটা বাতি আর কাচের কেসের ওপাশ থেকে পথচারীদের দিকে বোকার মতো চেয়ে দেখছিল প্লাস্টিকের সব পুতুল।

ওইখানে ছেলেটা তার নবপরিচিতদের দিকে চেয়ে দেখল। লোকটার সত্যিই শক্তপানা মুখ, তাতে চড়া চড়া বলিরেখা, মুখের দুপাশে শক্ত ভাঁজ। একটু যেন চেনা মুখ। আর মেয়েটা তাদের পাইওনিয়র নেতা ল্যুসার মতো, যে চলে গেছে ভাদিভস্তকে।

ছাতাটাকে ছেলেটা দেয়ালে ঠেসে ধরল, আর পেছন থেকে লোকটা আর তার মেয়ে অন্য ছাতাটা মেলে ধরল, যাতে ছেলেটা না ভেজে।

খড়ি বার করল ছেলেটা।

‘না, না, খড়ি দিয়ে নয়।’ ওকে থামাল লোকটা, তারপর নানাখাপী একটা ছুরি এগিয়ে দিল তার দিকে, ‘খড়ি তো মুছে যাবে, আলোতে দেখাও যাবে না। ফুটো করার একটা শূল আছে ওতে। নে, ফুটো কর...’

লোহার বন্‌বন্‌ তুলে ছুটে জ্বলজ্বলে ট্রামগুলো আসছে, যাচ্ছে, নীরব হয়ে যাচ্ছে রাস্তার অন্ধকারে। ঝরঝর করছে বৃষ্টি, ঝমঝম করছে, ছাঁট দিচ্ছে। এইসব শব্দ যেন এক আনাড়ি তবু ভারি ফুর্তির কোনো গানের মতো।

সূক্ষ্ম একটা কিরণের মতো উজ্জ্বল ছুঁচলো শূলটা দিয়ে ছেলেটা কালো আকাশে তারা ফুটিয়ে চলল।

মাঝে মাঝে থেমে যাচ্ছিল পথচারীরা, অবাক হচ্ছিল এই দেখে যে প্রায় নতুন একটা ছাতা ফুটো করে চলেছে তিনটে উন্মাদ।

মাঝে মাঝে পেছন থেকে মেয়েটার বাবা ফিসফিস করে নক্ষত্রমণ্ডলীর নাম বলছিল :
'কালপুরুষ... আচ্ছা... এটা হল লঘু...'

'এবার ছাতাটা তুমি সঙ্গে নেবে?' মেয়েটিও জিগ্যেস করল ফিসফিস করে।

'হ্যাঁ,' বলল লোকটা।

ওদের কথাটা ঠিক বুঝল না ছেলেটা, তাহলেও কিছু জিজ্ঞাসা করল না। ফুটো করার কাজ চালাতে চালাতে শুধু বলল :

'যাই বলুন, খড়্‌ই ভালো। দেখুন-না ছাতাটা ফুটোয় ভরে গেল।'

'তাতে এসে-যাবে না,' বলল লোকটা, 'আমি যেখানে যাচ্ছি, সেখানে বৃষ্টি হয় না।'

'নিশ্চয় মরুভূমিতে,' সিদ্ধান্ত করল ছেলেটা। তাহলেও অনুমানটো যাচাই করার জন্য জিজ্ঞাসা করল :

'দক্ষিণে?'

'যা সত্যি তা সত্যি। একেবারে দক্ষিণে।'

'সেখানে বৃষ্টি হয় না,' সানন্দে ভাবল ছেলেটা, 'তার মানে ছাতাটা উনি নিয়ে যাবেন কেবল আমার নক্ষত্রগুলোর জন্যে।' এই ভেবে ভারি ভালো লাগল তার। এ সন্ধ্যার সবচেয়ে ভালো ভালো ঘটনাগুলোই কেবল মনে পড়তে লাগল তার। দেখা গেল ভালো ঘটনা কম নয়; অল্পপরিচিত সেই মেয়েটি, হাইবুট পরা মজার খোকাটা... এরা দুজন...

হঠাৎ আবার একটা দৃশ্চিন্তা শুরু হল তার।

'কিন্তু দক্ষিণে যে ভারি অন্ধকার রাত। ফুটো দিয়ে যে কিছু দেখতে পাবেন না!'

'দেখা যাবে,' বলল লোকটা, 'আমি যেখানে যাচ্ছি সেখানে রাত খুব ফরসা।'

'তাজ্জব,' ভাবল ছেলেটা, কিন্তু আর বেশি জিগ্যেস করলে না, সঙ্কোচ হল। তাছাড়া পরিহাসপ্রিয় লেনা তাকে কৌতূহলী ভাববে, এটা সে চাইছিল না।

'এইবার আপনাদের সব বুঝিয়ে দিচ্ছি,' বলল সে, কাজ তার শেষ হয়ে গেছে।
'খুব সোজা, ছাতার ডগাটা ধরতে হবে ধ্রুবতারার দিকে...'

'নে হয়েছে,' আস্তে করে বলল লোকটা, 'বোঝাবার দরকার নেই। আমি নিজেই ও যন্ত্রটা বুঝি।'

বিব্রতভাবে চুপ করে গেল ছেলেটা। কথাটা তার বিশ্বাস হল না, ভাবল নিশ্চয় কিছু বোঝেনি।

‘খুব সোজা,’ অনিশ্চিতভাবে বলল ছেলেটা। ‘শুধু মনে রাখতে হবে প্রবতারাটা কোথায়...’

‘জানি রে,’ বলল ওই বিচিত্র লোকটা, ‘জানি রে, খোকা। সেইটেই সব নয়। তুই কিন্তু অনেক কিছু হিসাব করিসনি।’

‘কী হিসাব করিনি?’ ত্রস্ত হয়ে জিগ্যেস করল ছেলেটা। তাকে ‘খোকা’ বলায় রাগ করার কথা পর্যন্ত সে ভুলে গেল।

‘আকাশ খুব জটিল জিনিস। কী জানিস, নক্ষত্রদের অবস্থান শুধু দিনের সময় অনুসারে নয়, বছর জুড়েও বদলায়। তাছাড়া অনুপাতগুলো তোর খুব যথাযথ হয়নি। তাছাড়া, মনে আছে কি তোর, প্রবতারাটা ঠিক কোথায়? শুধু মানচিত্র মনে থাকলেই হয় না, আকাশটাকেও মনে রাখতে হয়।’

‘তার মানে সব বৃথা...’ ক্ষীণ কণ্ঠে বলল ছেলেটা, ‘তাহলে কেন আপনি...’

‘বৃথা নয়,’ জবাব দিল অপরিচিত। ‘তাহলেও সাবাস তোকে। আর তোর ভুলগুলোয় আমার ক্ষতি হবে না... তাছাড়া প্রবতারা তো সেখানে থাকবে না।’

‘“সেখানে” মানে কোথায়?’ অবাক হয়ে জিগ্যেস করল ছেলেটা।

লোকটা বলল :

‘কুমেরুতে।’

... চুপ করে গেল ছেলেটা। এরকম একটা লোকের সঙ্গে দেখা হয়ে গেলে যাই হোক কিছু কথা বলা সহজ নয় তো। যাবে কুমেরুতে। পৃথিবীর অন্য প্রান্তে। যেখানে অন্যরকম সব তারা। প্রবতারা যেখানে দেখা যায় না।

‘আপনি... ঠাট্টা করছেন-না তো?’ ফিসফিস করল ছেলেটা।

‘উঁহু,’ বলল কুমেরুগামী লোকটা। ‘অবিশ্যি ফুটো করা এক ছাতা সঙ্গে নিয়ে যাওয়া হাস্যকর লাগতে পারে। কিন্তু কী জানিস... হঠাৎ ছাতাটা খুলে আমাদের উত্তরের তারাগুলো দেখে নেওয়া মন্দ হবে না। সত্যি বলছি। যতই বলি, সত্যিকারের তারাগুলোর মতোই ওরা দেখাবে।’

‘হাত তোর পাকা,’ বলল মেয়েটা।

সবচেয়ে প্রধান কথাটা জিগ্যেস করতে সাহস পাচ্ছিল না ছেলেটা।

‘রাগ করবেন না যেন,’ মিনতি করল ছেলেটা, ‘কেমন? মানে বলছিলাম কী... আপনি আপনার নামটা বলবেন?’

‘একতরফা জেরা,’ একটু হাসল লোকটা। ‘তা কী আর করা যায়...’

এবং নামটা বলল।

‘ইস্!’ ফিসফিসিয়ে উঠল ছেলেটা। আর এই ‘ইসে’ এবার কোনো উপহাস ছিল না, ক্ষোভ ছিল না, ছিল শুধু বিস্মিত, বিহ্বল হাসি। এ নামটা ছেলেটার মনে ছিল।

না, ঠিক কখন এবং কোথায় সে নামটা শুনেছে তা তার মনে নেই। কিন্তু নামটা মনে আছে। স্মৃতিতে তার এ নামটা জড়িয়ে আছে তার প্রিয় জিনিসগুলোর সঙ্গে— দূর দূর দ্বীপপুঞ্জ নিয়ে লেখা বই, দুর্বোধ্য সব গালভরা নামের সামুদ্রিক ঝড়, গ্রহ তারা আর পৃথিবীর যত প্রহেলিকার সঙ্গে। ও নামটা যেন কোনো-এক আধভোলা সুন্দর গানের কথার মতো অনেককিছু মনে পড়িয়ে দিতে থাকল তার। এমনকি যা কখনো দেখেনি, তা-ও মনে পড়ে যায়, ছবির মতো ফুটে ওঠে। খুব খুব করে যদি ইচ্ছে হয়, তাহলে দেখা যাবে বৈকি বিষুবরেখার কাছে সমুদ্রের তরঙ্গে তরঙ্গে রূপোলি উড়ন্ত মাছ, দেখা যাবে সেই সমুদ্রের খাঁড়িগুলো যেখানে মায়াবিনীর অশান্ত ডাকটা অবিরাম প্রতিধ্বনিত হয়ে চলে, দেখা যাবে ব্যাটিস্কিয়ারের* প্রশস্ত আলোয় উদ্ঘাটিত সমুদ্রের গভীরতার কিকমিকে গোধূলি, বরফ-ভাঙা জাহাজ আর স্টিমারের তুহিন মাণ্ডুল, যাচ্ছে তারা সেই দেশে যেখানে বরফের পাহাড় ধীরে ধীরে তীর থেকে আলাদা হয়ে ক্রমবর্ধমান গর্জনে তলিয়ে যাচ্ছে সবুজ মহাসিন্ধুতে...

‘আমি জানি... আপনি ক্যাপটেন,’ আস্তে করে বলল ছেলেটা। জোরে কথা বলার ইচ্ছে হল না তার, যেন ভয় পাচ্ছিল এই আশ্চর্য, রহস্যময় সাক্ষাতের আনন্দ যেন তাতে নষ্ট হবে। ‘আপনি ক্যাপটেন...’

‘তা, বলতে কি...’ শান্তভাবে বলল ক্যাপটেন, ‘হ্যাঁ, একদিক থেকে সত্যিই ক্যাপটেন।’

‘পেঙ্গুইন দেখেছেন আপনি?’ জিগ্যোস করেই ভয়ানক বিব্রত লাগল তার, এ যে একেবারে ছেলেমানুষি প্রশ্ন, ষষ্ঠ শ্রেণিতে যে পড়ে তার পক্ষে মানায় না, মানায় ওই খোকাকটাকে, যার জন্যে সে তারা একে দিয়েছিল।

ক্যাপটেন হাসল।

‘তোর অভিনন্দন জানিয়ে দেব ওদের। খুশি হবে। নাকি বরং একজোড়া পেঙ্গুইন ছানা এনে দেব তোকে। কী বলিস?’

এ ঠাট্টায় অপমান বোধ করল না ছেলেটা। কল্পনায় তার ভেসে উঠল মজাদার সব পেঙ্গুইন-ছানা, লাল লাল খাবার উপর ভারিক্কি চালে থপ থপ করে হাঁটছে। ভেবে হেসে উঠল সে। হাসল ক্যাপটেন। মেয়েটাও...

* বিশেষ এক যন্ত্র যাতে পর্যবেক্ষক সমুদ্রের গভীরে নেমে যায়।

স্টপ থেকে খানিকটা দূরে, অন্ধকার মোড়টার কাছে বনবন করে উঠল ট্রামগাড়ি, দেখা গেল তার আলোভরা জানালা, তার থেকে ছিটকে উঠল সবুজ ফুলকি। লাল সবুজ আলো-জ্বালা সেই পনের নম্বর ট্রাম, যার জন্যে অপেক্ষা করছিল ক্যাপ্টেন।

‘আর এক মিনিট,’ ভাবল ছেলেটা।

বড়জোর দুই মিনিট, যদি ট্র্যাফিক সিগন্যালটার কাছে ট্রামটা খানিকটা থামে। থামল না ট্রামটা।

তাহলেও আনন্দ গেল না ছেলেটার। দুঃখের হালকা একটু ছায়ায় তা যেন নরম হয়ে উঠল। ঘরের জুলজুলে বাতির উপর সবুজ শেড পরালে যেমন হয়।

‘এই তো, আর কি,’ ক্যাপ্টেনের দিকে চেয়ে ফিসফিস করে বলল ছেলেটা। বলতে চেয়েছিল, ‘এই তো আপনাদের ট্রাম এসে গেছে,’ কিন্তু ভারি লম্বা কথাটা।

‘হ্যাঁ,’ জবাব দিল ক্যাপ্টেন। ছেলেটা টের পেল তার বাঁ কাঁধে কুর্তাটা যেন মুহূর্তের জন্যে ভারি হয়ে উঠেছে। হাত দিয়ে চাপ দিল ক্যাপ্টেন।

‘যদি চাস, তোর জন্যে ধর, ওদেশের কালো নুড়ি নিয়ে আসব? সত্যিকারের কুমেরুর নুড়ি। জায়গাটায় রকমারি জিনিস তো বেশি নেই।’

এটা কিন্তু ঠাট্টা নয়।

‘নিশ্চয় আনবেন!’ উচ্ছল গলায় বলল ছেলেটা।

‘ভুলে যাবি না তো? ফিরব ছ’মাস পরে।’

‘আমি?’ বলল ছেলেটা, ‘ভুলে যাব?’

‘তাহলে ঠিকানাটা শোন...’

‘দরকার নেই!’ প্রায় যেন ভয় পেয়ে গেল ছেলেটা।

সোজাসুজি ঠিকানা নিয়ে রাখার ইচ্ছে হল না তার। ছয় মাস পরে ও নিজেই খুঁজে বের করবে ক্যাপ্টেনকে। সেটা হবে আরো ভালো। আর খুঁজে বার করতে সে পারবে বইকি। এমন লোককে খুঁজে বার করা কি আর অসম্ভব?!

এসে থামল ট্রাম, দুয়ার খুলে গেল।

‘দেখবেন, আমি আপনাকে খুঁজে বের করব,’ তাড়াতাড়ি করে বলল ছেলেটা।

‘তা জানি। নক্ষত্রগুলোর জন্যে ধন্যবাদ।’

ক্যাপ্টেন মেয়েকে আগে উঠতে দিয়ে তারপর নিজে উঠল পাদানিতে।

‘আরে শোন, নে এটা!’ হঠাৎ চোঁচিয়ে উঠল মেয়েটা, বাপের কাঁধের উপর দিয়ে তার না-আঁকা ছাতাটা বাড়িয়ে দিল, ‘নে, নে, আমরা থাকি স্টপের কাছেই।’

‘নে,’ বলল ক্যাপ্টেন।

‘কী দরকার? আমি তো এমনিতেই ভেজা মোরগছানা।’ কথাটা বলেই ভয় হল ছেলেটার— মেয়েটা হয়তো ভাববে এখনো সে তার ঠাট্টাটা ভোলেনি? ‘বৃষ্টিটা মোটেই ঠাণ্ডা নয়,’ তাড়াতাড়ি করে সে বোঝাল, ‘কিছু হবে না।’


ভয়ঙ্কর ক্যাঁচক্যাঁচ করে উঠল দরজাটা, এইবার তা বন্ধ হবে।

‘নাম কী তোর?’ জিগ্যেস করল ক্যাপ্টেন।

‘স্নাভকা।’ বলে সে ঝকঝকে রাস্তার উপর পা বাড়াল বাড়ির দিকে।

বড় বড় উষ্ণ ফোঁটায় বৃষ্টি ঝরছিল তার উপর, প্রতিটি ফোঁটায় আকাশ থেকে বয়ে আনা আলোর এক-একটা ফুলকি। ঠিক যেন ওই উপর থেকে তারা এক-একটা ক্ষুদে ক্ষুদে নক্ষত্র ধরে এনেছে, নির্মেষ রাতের আকাশে যা ছড়িয়ে থাকে ধুলোর মতো।

এগোল স্নাভকা, হাসল, নক্ষত্রের ফোঁটাগুলো ধরতে লাগল ঠোট পেতে।







চিরায়ত গ্রন্থমালা
এবং
চিরায়ত বাংলা গ্রন্থমালা
শীর্ষক দুটি সিরিজের আওতায়
বাংলাভাষাসহ পৃথিবীর বিভিন্ন দেশ
ও ভাষার শ্রেষ্ঠ রচনাসমূহকে
পাঠক সাধারণের কাছে সহজলভ্য করার লক্ষ্যে
বিশ্বসাহিত্য কেন্দ্র
একটি উদ্যোগ গ্রহণ করেছে।
এই বইটি 'চিরায়ত গ্রন্থমালা'র
অন্তর্ভুক্ত।
বইটি আপনার জীবনকে দীপান্বিত করুক।



বিশ্বসাহিত্য কেন্দ্র



* 9 8 4 1 8 0 4 0 0 X 2 0 2 *